

欽定唐書

卷二百二十二之二百二十五


土岐文庫

文庫17

W202

31

三十一



文庫 17
W202
31

010185193816

昭和六十年二月一日
土岐善唐氏寄

唐書卷二百二十一上

宋 端 明 殿 學 士 宋 祁 撰

列傳第一百四十七上

南蠻



南詔或曰鶴拓曰龍尾曰苴咩曰陽劍本哀牢夷後烏蠻別種也夷語王為詔其先渠帥有六自號大詔曰蒙構詔越析詔浪窳詔澄賧詔施浪詔蒙舍詔兵將不能相君蜀諸葛亮討定之蒙舍詔在諸部南故稱南詔居永昌姚州之間鐵橋之南東距爨東南屬交趾西摩伽陀西北與吐蕃接南女主西南驪北抵益州東北際黔巫王都羊苴咩城別都曰善闡府王坐東嚮其臣有所陳以狀言而不稱臣王自稱曰元猶朕也謂其下曰昶猶卿爾也官曰坦綽曰布燮曰久贊謂之清平官所以決國事輕重猶唐宰相也曰會望曰正會望曰員外會望曰大軍將曰員外猶試官也幕爽主兵琮爽主戶籍慈爽主禮罰爽主刑勸爽主官人厥爽主工館萬爽主財用引爽主客禾爽主商賈皆清平官會望大軍將兼之曰爽會曰彌勤曰勤齊掌賦爽總三省也乞託主馬祿託主牛巨託主倉廩亦清平官會望大軍將兼之曰爽會曰彌勤曰勤齊掌賦稅曰兵孺司掌機密大府主將曰演習副曰演覽中府主將曰繕齋副曰繕覽下府主將曰澹會副曰澹

乾隆四年校刊 唐書卷二百二十一上列傳

覽小府主將曰幕搗副曰幕覽府有陀曾若管記有陀西若判官大抵如此凡調發下文書衆邑必占其期百家有總佐一千家有治人官一萬家有都督一凡田五畝曰雙上官授田四十雙上戶三十雙以是而差壯者皆爲戰卒有馬爲騎軍人歲給韋衫袴以邑落遠近分四軍以旗幟別四方面一將統千人四軍置一將凡敵入境以所入面將禦之王親兵曰朱弩佉直佉直帶也擇鄉兵爲四軍羅直子戴朱鞮整負犀革銅盾而跣走險如飛百人置羅直子統一人望直蠻者在蘭蒼江西男女勇捷不鞍而騎善用矛劍短甲蔽脅腹鞮整皆插貓牛尾馳突若神凡兵出以望直子前驅以清平子弟爲羽儀王左右有羽儀長八人清平官見王不得佩劍唯羽儀長佩之爲親信有六曹長曹長有功補大軍將大軍將十二與清平官等列日議事王所出治軍壁稱節度次補清平官有內算官代王裁處外算官記王所處分以付六曹外則有六節度曰弄棟永昌銀生劍川柘東麗水有二都督會川通海有十臉夷語臉若州曰雲南臉白厓臉亦曰勃弄臉品澹臉造川臉蒙舍臉大整臉亦曰史臉直咩臉亦曰陽臉蒙秦臉大和臉趙川臉那鮮山之西多瘴歎地平草冬不枯自曲靖州至滇池人水耕食蠶以柘蠶生閱二旬而蠶織錦繡精緻大和那鮮而西人不蠶剖波羅樹實狀若紫紐縷而幅之覽臉并產鹽最鮮白惟王得食取足輒滅龜昆明城諸井皆產鹽不征羣蠻食之永昌之西野桑生石上其材上屈兩向而下植取以爲弓不筋漆而

利名曰賦弓長川諸山往往有金或披沙得之麗水多金馱越臉之西多薦草產善馬世稱越臉駮始生若羔歲中紐莎糜之飲以米潘七年可御日馳數百里王出建八旗紫若青白旂雉嬰二有旄鏃紫囊之翠蓋王母曰信麼亦曰九麼妃曰進武信麼出亦建八旗絳旂自曹長以降繫金佉直尙絳紫有功加錦又有功加金波羅金波羅虎皮也功小者矜背不袖次止于矜婦人不粉黛以蘇澤髮貴者綾錦裙襦上施錦一幅以兩股辮爲鬟髻耳綴珠貝瑟瑟虎魄女嫠婦與人亂不禁婚夕私相送已嫁有姦者皆抵死俗以寅爲正四時大抵與中國小差膾魚寸以胡瓜椒菽和之號鵝闕吹瓢笙笙四管酒至客前以筵推盞勸醢以繒帛及貝市易貝者大若指十六枚爲一覓師行人齋糧斗五升以二千五百人爲一營其法前傷者養治後傷者斬犁田以一牛三夫前挽中壓後驅然專于農無貴賤皆耕不繇役人歲輸米二斗一藝者給田二收乃稅王蒙氏父子以名相屬自舍危以來有譜次可考舍危生獨邏亦曰細奴邏高宗時遣使者入朝賜錦袍細奴邏生邏盛炎邏盛炎生炎閻武后時盛炎身入朝妻方娠生盛邏皮喜曰我又子雖死唐地足矣炎閻立死開元時弟盛邏皮立生皮邏閻授特進封臺登郡王炎閻未有子時以閻羅鳳爲嗣及生子還其宗而名承閻遂不改開元末皮邏閻逐河蠻取大和城又襲大整城守之因城龍口夷語山坡陀爲和故謂大和以處閻羅鳳天子詔賜皮邏閻名歸義當是時五詔徵歸義獨邏乃厚

以利曠劍南節度使王昱求合六詔爲一制可歸義已并羣蠻遂破吐蕃驕大入朝天子亦爲加禮又以破緡蠻功馳遣中人冊爲雲南王賜錦袍金鈿帶七事於是徙治大和城天寶初遣閻羅鳳子鳳迦異入宿衛拜鴻臚卿恩賜良異七載歸義死閻羅鳳立襲王以其子鳳迦異爲陽瓜州刺史初安寧城有五蠻井人得煮鬻自給玄宗詔特進何履光以兵定南詔境取安寧城及井復立馬援銅柱乃還鮮于仲通領劍南節度使卞忞少方略故事南詔嘗與妻子謁都督過雲南太守張虔陀私之多所求丐閻羅鳳不應虔陀數詬斬之陰表其罪由是忿怨反發兵攻虔陀殺之取姚州及小夷州凡三十二明年仲通自將出戎嶺州分二道進次曲州靖州閻羅鳳遣使者謝罪願還所虜得自新且城姚州如不聽則歸命吐蕃恐雲南非唐有仲通怒囚使者進薄白崖城大敗引還閻羅鳳歛戰鬻築京觀遂北臣吐蕃吐蕃以爲弟夷謂弟鍾故稱贊普鍾給金印號東帝揭碑國門明不得已而叛嘗曰我上世奉中國累封賞後嗣容歸之若唐使者至可指碑澡祓吾罪也會楊國忠以劍南節度當國乃調天下兵凡十萬使侍御史李宓討之輦餉者尙不在涉海而疫死相踵於道宓敗于大和城死者十八亦會安祿山反閻羅鳳因之取嶺州會同軍據清溪關以破越析臬于贈西而降尋傳驪諸國尋傳蠻者俗無絲績踈履榛棘不苦也射彘猪生食其肉戰以竹籠頭如兜鍪其西有裸蠻亦曰野蠻漫散山中無君長作檻舍以居男少女多無田

農以木皮蔽形婦或十或五共養一男子廣德初鳳迦異築柘東城諸葛亮石刻故在文曰碑卽仆蠻爲漢奴夷畏誓常以石擋梧大厯十四年閻羅鳳以鳳迦異前死立其孫異牟尋以嗣異牟尋有智數善撫衆略知書母李獨錦蠻女也獨錦蠻亦烏蠻種在秦藏川南天寶中命其長爲歸州刺史世與南詔婚聘異牟尋立悉衆二十萬入寇與吐蕃并力一趨茂州踰文川擾灌口一趨扶文掠方維白頃一侵黎雅叩邛邛關令其下曰爲我取蜀爲東府工伎悉送邛城歲賦一緡於是進陷城聚人率走山德宗發禁衛及幽州軍以援東川與山南兵合大敗異牟尋衆斬首六千級禽生捕傷甚衆顛踣崖峭且十萬異牟尋懼更徙苴咩城築表十五里吐蕃封爲日軍王然吐蕃責賦重數悉奪其險立營候歲索兵助防異牟尋稍苦之故西瀘令鄧回者唐官也往嶺州破爲所虜閻羅鳳重其惇儒號蠻利俾教子弟得筆撈故國中無不憚後以爲清平官說異牟尋曰中國有禮義少求責非若吐蕃恠刻無極也今棄之復歸唐無遠戍勞利莫大此異牟尋善之稍謀內附然未敢發亦會節度使韋臯撫諸蠻有威惠諸蠻頗得異牟尋語白于臯時貞元四年也臯乃遣諜者遺書吐蕃疑之因責大臣子爲質異牟尋愈怨後五年乃決策遣使者三人異道趨成都遺臯帛書曰異牟尋世爲唐臣曩緣張虔陀志在吞侮中使者至不爲澄雪舉部惶窘得生異計鮮于仲通比年舉兵故自新無繇代祖棄背吐蕃欺孤背約神川都督論訥舌使浪人利羅式

眩惑部姓發兵無時今十二年此一忍也天禍蕃廷降爵蕭墙太子弟兄流竄近臣橫汗皆尙結贊陰計以行屠害平日功臣無一二在訥舌等皆冊封王小國奏請不令上達此二忍也又遣訥舌逼城于鄙弊邑不堪利羅式私取重賞部落皆驚此三忍也又利羅式罵使者曰滅子之將非我其誰子所富當爲我有此四忍也今吐蕃委利羅式甲士六十侍衛因知懷惡不謬此一難忍也吐蕃陰毒野心輒懷搏噬有如媼生實汚辱先人辜負部落此二難忍也往退渾王爲吐蕃所害孤遺受欺西山女王見奪其位拓拔首領並蒙誅刈僕固志忠身亦喪亡每慮一朝亦被此禍此三難忍也往朝廷降使招撫情心無二詔函信節皆送蕃廷雖知中夏至仁業爲蕃臣吞聲無訴此四難忍也曾祖有寵先帝後嗣率蒙襲王人知禮樂本唐風化吐蕃詐給百情懷惡相戚異牟尋願竭誠日新歸款天子請加戍劍南西山涇原等州安西鎮守揚兵四臨委回鶻諸國所在侵掠使吐蕃勢分力散不能爲疆此西南隅不煩天兵可以立功云且贈臯黃金丹砂臯護送使者京師使者奏異牟尋請歸天子爲唐藩輔獻金示順革丹赤心也德宗嘉之賜以詔書命臯遣諜往覘臯令其屬崔佐時至羊苴咩城時吐蕃使者多在陰戒佐時衣牂柯使者服以入佐時曰我乃唐使者安得從小夷服異牟尋夜迎之設位陳煥佐時卽宣天子意異牟尋內畏吐蕃顧左右失色流涕再拜受命使其子閻勸及清平官與佐時盟點蒼山載書四一藏神祠石室一沈西洱水

一置祖廟一以進天子乃發兵攻吐蕃使者殺之刻金契以獻遣曹長段南羅趙迦寬隨佐時入朝初吐蕃與回鶻戰殺傷甚乃調南詔萬人異牟尋欲襲吐蕃陽示寡弱以三千人行許之卽自將數萬踵後晝夜行大破吐蕃於神川遂斷鐵橋溺死以萬計俘其五王乃遣弟湊羅棟清平官尹仇寬等二十七人入獻地圖方物請復號南詔帝賜賚有加拜仇寬左散騎常侍封高溪郡王明年夏六月冊異牟尋爲南詔王以祠部郎中袁滋持節領使成都少尹龐頌副之崔佐時爲判官俱文珍爲宣慰使劉幽巖爲判官賜黃金印文曰貞元冊南詔印滋至大和城異牟尋遣兄蒙細羅勿等以良馬六十迎之金鑲玉珂兵振鐸夾路陳異牟尋金甲蒙虎皮執雙鐸鞘執矛千人衛大象十二引于前騎軍徒軍以次列詰旦授冊異牟尋率官屬北面立宣慰使東向冊使南向乃讀詔冊相者引異牟尋去位跪受冊印稽首再拜又受賜服備物退曰開元天寶中其曾祖及祖皆蒙冊襲王自此五十年貞元皇帝洗痕錄功復賜爵命子子孫承爲唐臣因大會其下享使者出銀平脫馬頭盤二謂滋曰此天寶時先君以鴻臚少卿宿衛皇帝所賜也有笛工歌女皆垂白示滋曰此先君歸國時皇帝賜胡部龜茲音聲二列今喪亡略盡唯二人故在酒行異牟尋坐奉觴滋前滋受觴曰南詔當深思祖考成業抱忠竭誠承爲西南藩屏使後嗣有以不絕也異牟尋拜曰敢不承使者所命滋還復遣清平官尹輔等七人謝天子獻鐸鞘浪劍鬱刃生金瑟瑟牛

黃琥珀氍毹絲象犀越睽統倫馬鐸鞘者狀如殘刃有孔傍遙出麗水飾以金所擊無不洞夷人尤寶月以血祭之鬱刃鑄時以毒藥并冶取迎躍如星者凡十年乃成淬以馬血以金犀飾鐔首傷人卽死浪人所鑄故亦名浪劍王所佩者傳七世矣異牟尋攻吐蕃復取昆明城以食鹽池又破施蠻順蠻並虜其王置白崖城因定磨些蠻隸昆山西爨故地破茫蠻掠弄棟蠻漢裳蠻以實雲南東北施蠻者在鐵橋西北居大施睽斂尋睽男子衣繪布女分髮直額爲一髻垂後跣而衣皮順蠻本與施蠻雜居劍共諸川咩羅皮鐸羅望旣失造川浪穹奪劍共地由是徙鐵橋在劍睽西北四百里號劍羌磨些蠻與施順二蠻皆烏蠻種居鐵橋大婆小婆三探覽昆池等川土多牛羊俗不頽澤男女衣皮俗好飲酒歌舞茫蠻本關南種茫其君號也或呼茫詔永昌之南有茫天連茫吐婢大睽茫昌茫鮮茫施大抵皆其種樓居無城郭或漆齒或金齒衣青布短袴露髻以繪布縲腰出其餘垂後爲飾婦人垂五色婆羅籠象纒如牛養以耕弄棟蠻白蠻種也其部本居弄棟縣鄙地昔爲哀州有首領爲刺史誤殺其參軍契族北走後散居磨些江側故劍共諸川亦有之漢裳蠻本漢人部種在鐵橋惟以明霞纏頭餘尙同漢服十五年異牟尋謀擊吐蕃以邏川靈北等城當寇路乃峭山深塹修戰備帝許出兵助力又請以大臣子弟質于臯臯辭因請乃盡合成都咸道就學且首昆明嶺州與吐蕃接不先加兵爲虜所脅反爲我患請臯圖之時唐兵比歲屯

京西湖方大峙糧用南北並攻取故地然南方轉饟稽期兵不悉集是夏虜麥不熟疫癘仍興贊普死新君立臯揣虜未敢動乃勸異牟尋緩舉萬全愈于速而無功今境上兵十倍往歲且行營皆在嶺州扼西瀘吐蕃路昆明弄棟可以無虞異牟尋請期它年吐蕃大臣以歲在辰兵宜出謀襲南詔閣衆治道將以十月圍嶺州軍屯昆明凡八萬皆命一歲糧贊普以舅擣都羅爲都統遣尙乞力欺徐濫鑠屯西貢川異牟尋與臯相聞臯命部將武免率弩士三千赴之亢榮朝以萬人屯黎州韋良金以二萬五千人屯嶺州約南詔有急皆進軍過俄準添城者南詔饋吐蕃引衆五萬自曩貢川分二軍攻雲南一軍自諾濟城攻嶺州異牟尋畏東蠻磨些難測懼爲吐蕃鄉導欲先擊之臯報嶺州實往來道扞蔽數州虜百計窺之故嚴兵以守屯壁相望糧械處處有之東蠻庸敢懷貳乎異牟尋乃檄東磨些諸蠻內糧城中不者悉燒之吐蕃顯城將楊萬波約降事洩吐蕃以兵五千守臯將擊破之萬波與籠官拔顯城以來徙其人二千于宿川臯將扶忠義又取末恭城俘繫牛羊千計贊普大將旣煎讓律以兵距卜貢川一舍而屯國師馬定德率種落出降西貢節度監軍野多輸煎者贊普乞立贊養子當從先贊普殉亦詣忠義降於是虜氣衰軍不振欺徐濫鑠至鐵橋南詔毒其水人多死乃徙納川壁而待是年虜霜雪早兵無功還期以明年吐蕃苦唐詔犄角亦不敢圖南詔臯令免按兵嶺州節級鎮守雖南詔境亦所在屯戍吐蕃憊野戰數北

乃屯三瀘水遣論妄熱誘瀘諸蠻復城悉攝悉擣吐蕃險要也蠻酋潛導南詔與臯部將杜毗羅狙擊十七年春夜絕瀘破虜屯斬五百級虜保鹿危山毗羅伏以待又戰虜大奔於時康黑衣大食等兵及吐蕃大會皆降獲甲二萬首又合鬼主破虜于瀘西吐蕃君長共計不得嵩州患未艾常爲兩頭蠻挾唐爲輕重謂南詔也會虜荐饑方葬贊普調斂煩至是大料兵率三戶出一卒虜法爲大調集又聞唐兵三萬入南詔乃大懼兵戍納川故洪諾濟臘聿實五城欲悉師出西山劍山收嵩州以絕南詔臯卽上言京右諸屯宜明斥候番斂田邪隴焚萊可困虜入臯遣將邢毗以兵萬人屯南北路趙昱萬人戍黎雅州異牟尋謂臯曰虜聲取嵩州實窺雲南請武免督軍進羊苴咩若虜不出者請以來年二月深入時虜兵三萬攻鹽州帝以虜多詐疑繼以大軍詔臯深鈔賊鄙分虜勢臯表賊精鎧多置南屯今向鹽夏非全軍欲掠河曲党項畜產耳俄聞虜破麟州臯督諸將分道出或自西山或由平夷或下隴陀和石門或徑神川納川與南詔會是時回鶻太原邪靈涇原軍獵其北劍南東川山南兵震其東鳳翔軍當其西蜀南詔深入克城七焚堡百五十所斬首萬級獲鎧械十五萬圍昆明維州不能克乃班師振武靈武兵破虜二萬涇原鳳翔軍敗虜原州惟南詔攻其腹心俘獲最多帝遣中人尹偕尉異牟尋而吐蕃盛屯昆明神川納川自守異牟尋比年獻方物天子禮之

唐書卷二百二十二上

唐書卷二百二十二上考證

南蠻傳上獨邏亦曰細奴邏○舊書獨邏作迦獨龐以細奴邏爲迦獨龐子未詳孰是

唐書卷二百二十二上考證

唐書卷二百二十一上考證

唐書卷二百二十一中

宋 端 明 殿 學 士 宋 祁 撰

列傳第一百四十七中

南蠻

元和三年異牟尋死詔太常卿武少儀持節弔祭子尋閣勸立或謂夢湊自稱驃信夷語君也改賜元和
 印章明年死子勸龍晟立淫肆不道上下怨疾十一年為弄棟節度王嵯巔所殺立其弟勸利詔少府少
 監李銑為冊立弔祭使勸利德嵯巔賜氏蒙封大容蠻謂兄為容長慶三年始賜印是歲死弟豐祐立豐
 祐趨敢善用其下慕中國不肯連父名穆宗使京兆少尹韋審規持節臨冊豐祐遣洪成曾趙龍些楊定
 奇入謝天子於是西川節度使杜元穎治無狀障候弛沓相蒙時大和三年也嵯巔乃悉眾掩攻戎檣三
 州陷之入成都止西郛十日慰資居人市不擾肆將還乃掠子女工技數萬引而南人懼自殺者不勝計
 救兵逐嵯巔身自殿至大度河謂華人曰此吾南境爾去國當哭眾號慟赴水死者十三南詔自是工文
 織與中國埒明年上表請罪比年使者來朝開成會昌間再至大中時李琢為安南經略使苛墨自私以
 斗鹽易一牛夷人不堪結南詔將段酋遷陷安南都護府號白衣沒命軍南詔發朱弩佉首三千助守然

朝貢猶歲至從者多杜棕自西川入朝表無多內蠻僭豐祐怒卽慢言索質子會宣宗崩使者告哀是時豐祐亦死坦綽曾龍立肅朝廷不弔卹又詔書乃賜故王以草具進使者而遣遂僭稱皇帝建元建極自號大禮國懿宗以其名近玄宗嫌諱絕朝貢乃陷播州安南都護李鄴屯武州咸通元年爲蠻所攻棄州走天子斥鄴以王寬代之明年攻豈管經略使李弘源兵少不能拒奔蠻州南詔亦引去詔殿中監段文楚爲經略使數改條約衆不悅以胡懷玉代之南詔知邊人困甚剽掠無有不入寇杜棕當國爲帝謀遣使者弔祭示恩信并詔驛信以名嫌册命未可舉必易名乃得封帝乃命左司郎中孟穆持節往會南詔陷潯州穆不行安南桃林人者居林西原七綰洞首領李由獨主之歲歲戍邊李琢之在安南也奏罷防冬兵六千人謂由獨可當一隊遏蠻之入蠻酋以女妻由獨子七綰洞舉附蠻王寬不能制三年以湖南觀察使蔡襲代之發諸道兵二萬屯守南詔憚畏不敢出會詔左庶子蔡京經制嶺南息襲功有所欲沮壞之乃言南方自無虞武夫倖功多聚兵耗餽運請遣戍兵惜財用襲執不可願留五千兵累表不報卽極陳南詔伺隙久有十必死狀朝廷昏肆不省也京還奏得意甚復詔爲宣慰安撫使卽建析廣州爲嶺南東道邕州爲西道以襲象藤巖爲隸州乃拜京西道節度使京褊忤貪克峻條令爲炮熏劊斫法下愁毒爲軍中所逐走藤州矯制作攻討使印召鄉兵比道軍攻邕州不克衆潰貶死崖州以桂管觀察使鄭

愚代節度南詔攻交州進略安南襲請救發湖荆桂兵五千屯邕州嶺南韋宙奏南詔必襲邕管不先防近而圖遠恐搆虛絕糧道且深入乃詔襲按軍海門詔鄭愚分兵禦之襲請濟師以山南東道兵千人赴之南詔曾將楊思儋麻光高以兵六千薄城而屯四年正月攻益急襲錄異半尋盟言繫矢上射入其營不答俄而城陷襲閔宗死者七十人幕府樊綽取襲印走度江荆南兵入東鄆苦戰斬南詔二千級是夜蠻遂屠城有詔諸軍保嶺南更以秦州經略使高駢爲安南都護帝見輸發頻罷遊幸不奏樂宰相杜悰以爲非是止之南詔稍逼邕州鄭愚自陳非將帥才願更擇人會康承訓自義成來朝乃授嶺南西道節度使發荆襄洪鄂兵萬人從之承訓辭兵寡乃大興諸道兵五萬往六月置行交州於海門進爲都護府調山東兵萬人益戍以容管經略使張茵鎮之因命經略安南茵逗遛不敢進安南之陷將吏遣人多客伏溪洞詔所在招還球卹之免安南賦入二年韋宙請分兵屯容藤披蠻勢五年南詔回掠潯州以搗西口縛賣之以易蠻金故開門降南詔盡殺戍卒而士珍遂臣于蠻安南久屯兩河銳士死瘴毒者十七宰相楊收議罷北軍以江西爲鎮南軍募彊弩二萬建節度且地便近易調發詔可夏侯孜亦以張茵懦不足事悉以兵授高駢駢以選士五千度江敗林邑兵於邕州擊南詔龍州屯蠻酋燒質畜走酋龍遣楊緝

思助曾遷共守安南以范昺些爲安南都統趙諾眉爲扶邪都統七年六月駢次交州戰數勝士酣鬪斬其將張詮李澐龍舉衆萬人降拔波風三壁緝思出戰敗還走城士乘之超堞入斬曾遷昺些諾眉上首三萬級安南平初曾龍遣清平官董成等十九人詣成都節度使李福將廷見之成辭曰皇帝奉天命改正朔請以敵國禮見福不許導譯五返日旰士倦議不決福怒命武士摔辱之械繫于館俄而劉潼代福節度卽挺其繫表縱還有詔召成等至京師見別殿賜物良厚慰遣還國明年曾龍使楊曾慶等來謝釋囚初李師望建言成都經總蠻事曠日不能決請析邛蜀嘉眉黎雅嵩七州爲定邊軍建節度制機事近且速天子謂然卽詔師望爲節度使治邛州邛距成都才五舍嵩州最南去邛乃千里緩急首尾不相副而師望利專制諱不言稟積無厭私賄以百萬計又欲激蠻怒幸有功乃殺曾慶等旣而戍士怒將醢師望以逞會召還以竇滂代之滂胥冒尤不法誅責苛纖甚師望時蠻役未興而定邊已困曾龍怨殺其使十年乃入寇以軍綴青溪關密引衆伐木開道徑雪岐盛夏卒凍死者二千人出沐源闕嘉州破屬蠻遂次沐源滂遣海兵五百往戰一軍覆曾龍乃身自將督衆五萬侵嵩州攻青溪關屯將杜再榮絕大度河走諸屯皆退保北涯蠻攻黎州詭服漢衣濟江襲犍爲破之裴回陵榮間焚廬舍掠糧畜薄嘉州刺史楊恣與南詔夾江而軍士攢射蠻不得進陰自上游濟背擊王師殺忠武將顏慶師恣走嘉州陷明年正

月攻杜再榮滂自勒兵戰曾龍遣使者十輩請和滂信之語未半蠻桴爭岸譟而進滂不知所爲將自殺武靈將苗全緒止之殊死戰蠻稍卻滂乃遁全緒殿而行黎州陷人走匿山谷蠻掠金帛不勝負入自邛崃關圍雅州遂擊邛州是冬滂棄州壁導江儲貲時械皆亡矣曾龍進攻成都次眉州坦綽杜元忠日夜教曾龍取全蜀於是西川節度使盧耽遣其副王偃中人張思廣約和蠻疆之使南面拜然卒不見曾龍而還蠻次新津耽復遣副譚奉祀好言申約蠻留之耽畏援軍未集卽飛請天子降大使通好以紓其深入懿宗馳遣太僕卿支詳爲和蠻使蠻本無謀不能乘機會鼓行亟驅但虺結蠅營狙鹵剽小利處處留屯故蜀孺老得扶攜悉入成都閭里皆滿戶所占地不得過一牀雨則冒箕盜自庇城中并爲竭則共飲摩訶池至爭摔溺死者或筮沙取滴飲之死不能具棺卽共坎瘞故瀘州刺史楊慶復爲耽治攻具蘭石置牢城兵八將主之樹筮格夜列炬照城守具雄新又選悍士三千號突將爲長刀巨槌斧分左右番休日隸于軍士心侈欲闕而曾龍自雙流徐行內欲報董成之辱因給耽請上介至軍議事耽遣節度副使柳榮往見杜元忠議和元忠妄言帝見耽請具車蓋葆嬰榮未能決還蠻以三百騎負幄幕來大言曰供帳隨蜀王聽事爲驛信行在耽不許乃馳去蠻稍前傅外郭於是游奕使王晝督援兵二千屯毗橋竇滂亦以其軍自導江來將與大軍犄角然戰不甚力小不勝卽保廣漢自以失定邊觀成都陷得薄其罪會

有詔斥徙軍遂無功耽部將李自孝者與刺史喻士珍善士珍臣蠻自孝陰與賊通乃說耽城下時韋相
瀕水頽城舉府不之覺蠻攻城自孝守陴樹磨以自表磨所指蠻輒攻之爲下所覺耽殺自孝以徇城左
有民樓肆蠻俯射城中耽募勇士燒之器械俱盡二月蠻以雲梁鵝車四面攻士叫譟鵝車未至陴者以
巨索鉤繫投膏炬車焚箱間蠻卒盡死耽遣李瑋張察率突將戰城下俘斬二千級蠻徹民鄣落爲蓬籠
如車蓋下設枕木推而前不及城丈匿蠻其內以穴墉楊忝以嬰貯糞滯波蠻蠻不能處注以鐵液蓬籠
皆火然南詔負衆益治器械斧斤晝夜有聲將繫錦樓衆失色耽遣將出三面苦戰蠻引卻蠻利夜晦輒
薄城聞呼嘯衆奮奮城上施鐵籠千炬賊來不得隱屯夫終夜哄蠻不能侵支詳遣謀與約好且謂耽毋
多殺以速蠻和是時傳言救師至城中合謀開門士爭出迎軍南詔搏戰不解日入判官程克裕以北門
兵二千乘之蠻乃走耽猶遣之書謝不得已交兵且請和士脫鎧迎支詳陳所齎植二旗署曰賜雲南
幣物謂蠻使者曰天子詔雲南和解而兵薄成都奈何請退舍撤警以修好或勸詳蠻多詐毋入死地詳
不行蠻復圍成都夜穿西北隅墜且乃覺卽頽焚火于墉蠻皆死穴中以鐵絙曳雲輜仆之燎作少選盡
益固守是時帝遣東川節度使顏慶復爲大度河制置劍南應接使兵次新都博野將曾元裕敗蠻兵斬
二千級南詔騎數萬晨壓官軍以驍犬將宋威以忠武兵戰斬首五千獲馬四百尾南詔退屯星宿山威

進戍沱江曾龍遣酋望至支詳所請和詳曰今列城固守北軍望功歸語而主審自度耽遣銳將趣蠻壁
燒攻具殺二千人爲南詔所躡卻而潰蠻聞鳳翔山南軍且來乃迎戰毗橋不勝趨沱江爲伏士所擊又
敗城中出突將夜火蠻營曾龍坦縹身督戰後三日王師奪昇遷梁蠻大敗夜燒亭傳乘火所向雨矢射
王師威疏軍行嚮矢所發叢射之兩軍不能決各解去曾龍知不敵夜徹營南奔至雙流江無梁計窮將
赴水死或止之曰今北軍與成都兵合若來追我無類矣不如僞和以紓急不然死未晚乃來請三日梁
成而濟卽斷梁按隊緩驅黎州刺史嚴師本收散卒保邛州曾龍懼圍二日去蠻俘華民必剝耳鼻已縱
之既而居人刻木爲耳鼻者什八慶復之來衆以其弟慶師死于蠻必甘心及成都不破以己功輕乃按
軍廣溪縱殘寇人人切齒初成都無隍塹乃教耽濬隍廣三丈作戰棚于埤列左右屯營別五區區卒
五十時早莢夾壕後三年合拱又爲大旛連弩自是南詔憚之曾龍年少嗜殺戮親戚異己者皆斬兵出
無靈歲諸國更讎忿屢覆衆國耗虛蜀之役男子十五以下悉發婦耕以餉軍十四年坦縹復寇蜀緡舟
大度河以濟爲刺史黃景復擊却之衆循河而南夜梓上流兵夾攻瀕水諸屯景復敗走還黎州蠻躡追
爲景復所敗會蠻踵來還攻大度河仆旗息鼓請曰坦縹欲上書天子白寃事戍兵信之不戰橋成而濟
黎州陷遂攻雅州擊定邊軍卒潰入邛州成都大震人亡入玉壘關士乘城坦縹遣使者王保成等四十

人齋驪信書遺節度使牛叢欲假道入朝請懇蜀王故殿叢欲許之楊慶諫曰蠻無信彼禮屈辭甘詐我
也請斬其使留二人還書叢因責之曰詔王之祖六詔最小夷也天子錄其勤合六詔爲一傳附庸成都
名之以國許子弟入太學使習華風今乃自絕王命且雀蛇犬馬猶能報德王乃不如蟲鳥乎比成都以
武備未修故令爾突我疆場然毗橋沱江之敗積弊附城不四年復來今吾有十萬衆捨其半未用以千
人爲軍十軍爲部驍將主之凡部有疆弩二百縛斧輔之勁弓二百越銀刀輔之長戈二百撥刀輔之短
矛二百連鎚輔之又軍四面面有鐵騎五百悉收芻薪米粟牛馬犬豕清野待爾吾又能以旁騎略爾樵
采我日出以一部與爾戰部別二番日中而代日昃一部至以夜屯月明則戰黑則休夜半而代凡我兵
五日一殺敵爾乃晝夜戰不十日憎且死矣州縣繕甲厲兵犄角相從皆蠻之深讎雖女子能斷髮薄賊
況疆夫烈士哉爾祖嘗奴事西蕃爲爾仇家今顧臣之何恩讎之戾邪蜀王故殿先世之寶宮非邊夷所
宜舍神怒人憤驪信且死叢猶火郊民室廬觀閣嚴兵爲固守計坦綽至新津而還回寇黔中經略使秦
匡謀懼奔荆南會僖宗立遣金吾將軍韓重持節往使俄攻黎州景復擊走之乾符元年劫略嵩雅間破
黎州入邛峽關掠成都成都閉三日蠻乃去詔徙天平軍高駢領西川節度使乃奏蠻小醜勢易制而蜀
道險館饑窮邈今左神策所發長武河東兵多用度繁廣且彼皆扼制羌戎不可以弛備詔乃罷長武等

兵駢至不淹月閩精騎五千逐蠻至大度河奪鎧馬執酋長五十斬之收邛峽關復取黎州南詔遁還駢
召景復責大度河之敗斬以徇戌望星清溪等關南詔懼遣使者詣駢結好而踵出兵寇邊駢斬其使初
安南經略判官杜曠爲蠻所俘其妻宗室女也故酋龍使奉書丐和駢答曰我且將百萬衆至龍尾城問
爾罪酋龍大震自南詔叛天子數遣使至其境酋龍不肯拜使者遂絕駢以其俗尚浮屠法故遣浮屠景
仙攝使往酋龍與其下迎謁且拜乃定盟而還遣清平官酋望趙宗政質子三十入朝乞盟請爲兄弟若
舅甥詔拜景仙鴻臚卿檢校左散騎常侍駢結吐蕃尙延心嗚末魯耨月等爲間築戎州馬湖沐源川大
度河三城列屯拒險料壯卒爲平夷軍南詔氣奪酋龍患瘧死僞諡景莊皇帝子法嗣改元貞明承智
大同自號大封人法年少好畋獵酣逸衣絳紫錦罽鍍金帶國事瀕決大臣乾符四年遣陀西段琬寶詣
邕州節度使辛讜請修好詔使者答報未幾寇西川駢奏請與和親右諫議大夫柳韜吏部侍郎崔潛醜
其事上言遠蠻畔逆乃因浮屠誘致又議和親垂笑後世駢職上將謀乖謬不可從遂寢蠻使者再入朝
議和親而駢徙荆南持前請不置宰相鄭畋搆爭不決皆賜罷辛讜遣幕府徐雲虔攝使者往覘到善
闕府見騎數十曳長矛擁絳服少年朱纒約髮典客伽佗酋孫慶曰此驪信也問天子起居下馬揖客取
使者佩刀視之自解左右鈕以示乃除地割三丈版命左右馳射每一人射法駢馬逐以爲樂數十發止

引客就幄俛子捧瓶孟四女子侍樂飲夜乃罷又遣問客春秋大義送使者還是時駢徙節鎮海効邊等沮議帝蒙弱不能曉下詔尉解西川節度使崔安潛上言蠻蕃鳥獸心不識禮義安可以賤隸尙貴主失國家大體潛等議可用臣請募義征子率十戶一保願發山東銳兵六千戍諸州比五年蠻可爲奴久之帝手詔問安潛和親事答曰雲南姚州譬一縣中國何資於彼而遣重使加厚禮彼且妄謂朝廷畏怯無能爲脫有它請陛下何以待之且天宗近屬不可下小蠻夷臣比移書不言舅甥黜所僭也有如蠻使者不復至當遣諜人伺其隙可以得志南詔知蜀疆故襲安南陷之都護會奔邕府戍兵潰會西川節度使陳敬瑄申和親議時盧攜復輔政與豆盧瑑皆厚駢乃譎說帝曰陛下初卽位遣韓重使南詔將官屬留蜀期年費不貲蠻不肯迎及駢節度西川招唃末繕甲訓兵蠻夷震動遣宗政入獻見天子附驥信再拜雲虔之使驃信答拜其於禮不爲少宣宗皇帝收三州七關平江嶺以南至大中十四年內庫貲積如山戶部延資充滿故宰相敏中領西川庫錢至三百萬緡諸道亦然咸通以來蠻始叛命再入安南邕管一破黔州四盜西川遂圍盧耽召兵東方戍海門天下騷動十有五年賦輸不內京師者過半中藏空虛士死瘴癘煨骨傳灰人不念家亡命爲盜可爲痛心前年留宗政等南方無虞及遣還彼猶冀望蒙法立三年比兵不出要防其蓄力以間我虞今朝廷府庫匱甲兵少牛叢有北兵七萬首尾奔衝不能救況

安南客戍單寡涉冬寇禍可虞誠命使者臨報縱未稱臣且伐其謀外以縻服蠻夷內得蜀休息也帝謂然乃以宗室女爲安化長公主許婚拜嗣曹王龜年宗正少卿爲雲南使大理司直徐雲虔副之內常侍劉光裕爲雲南內使霍承錫副之及還具言驃信誠款以爲敬瑄功故進檢校司空賜一子官法遣宰相趙隆眉楊奇混段義宗朝行在迎公主高駢自揚州上言三人者南詔心腹也宜止而鳩之蠻可圖也帝從之隆眉等皆死自是謀臣盡矣蠻益衰中和元年復遣使者來迎主獻珍怪饜屬百牀帝以方議公主車服爲解後二年又遣布燮楊奇肱來迎詔檢校國子祭酒張譙爲禮會五禮使徐雲虔副之宗正少卿嗣號王約爲婚使未行而黃巢平帝東還乃歸其使法死僞諡聖明文武皇帝子舜化立建元中興遣使款黎州修好昭宗不答後中國亂不復通先是有時傍矣川羅識二族通號八詔時傍母歸義女也其女復妻閩羅鳳初咩羅皮之敗時傍入居遼州誘上浪千餘勢稍張爲閩羅所猜徙置白崖城後與矣川羅識詣神川都督求自立爲詔謀洩被殺矣川羅識奔神川都督送之羅些城

蒙嵩詔最大其王嵩輔首死無子弟佉陽照立法陽照死子照原立喪明子原羅質南詔歸義欲并國故歸其子原羅衆果立之居數月使人殺照原逐原羅遂有其地

越析詔或謂磨些詔居越析州西距巖葱山一日行貞元中有蒙酋張尋求烝其王波衝妻因殺波衝

劍南節度使召尋求至姚州殺之部落無長以地歸南詔波衝兄子于贈持王所寶鐔鞘東北度瀘邑于龍佑河纒百里號雙舍使部酋楊墮居河東北歸義樹壁侵于贈不克閻羅鳳自請往擊楊墮破之于贈投瀘死得鐔鞘故王出軍必雙執之

浪穹詔其王豐時死子羅鐔立羅鐔望立爲浪穹州刺史與南詔戰不勝挈其部寶劍川更稱劍浪死子望偏立望偏死子偏羅矣立偏羅矣死子羅君立貞元中南詔擊破劍川虜羅君徙永昌凡浪穹遼眺施浪總謂之浪人亦稱三浪

遼眺詔其王豐咩初據遼眺爲御史李知古所殺子咩羅皮自爲遼川州刺史治大釐城歸義襲敗之復入遼眺與浪穹施浪合拒歸義既戰大敗歸義奪遼眺咩羅皮走保野共川死子皮羅鄧立皮羅鄧死子鄧羅顛立鄧羅顛死子顛文託立南詔破劍川虜之徙永昌

施浪詔其王施望欠居矣苴和城有施各皮者亦八詔之裔據石和城閻羅鳳攻虜之而施望欠孤立故與咩羅皮合攻歸義不勝歸義以兵脅降其部施望欠以族走永昌獻其女遣南詔丐和歸義許之度蘭江死弟望千走吐蕃吐蕃立爲詔納之劍川衆數萬望千死子于旁羅顛立南詔破劍川于旁羅顛走瀘北三浪悉滅唯于旁羅顛及矣川羅識子孫在吐蕃

贊曰唐之治不能過兩漢而地廣於三代勞民費財禍所繇生晉獻公殺嫡賊二公子號爲闇君明皇一日殺三庶人昏蔽甚矣嗚呼父子不相信而遠治閻羅鳳之罪士死十萬當時寃之懿宗任相不明藩鎮屢畔南詔內侮屯戍思亂庸勛乘之倡戈橫行雖凶渠殲夷兵連不解唐遂以亡易曰喪牛于易有國者知戒西北之虞而不知患生於無備漢亡於董卓而兵兆於冀州唐亡於黃巢而禍基於桂林易之意深矣

唐書卷二百二十二中

唐書卷二百二十二中考證

南蠻傳中子尋閣勸立○舊書作宜蒙閣

子勸龍晟立○舊書作龍蒙盛

唐書卷二百二十二中考證

唐書卷二百二十二中考證

唐書卷二百二十二下

宋 端 明 殿 學 士 宋 祁 撰

列傳第一百四十七下

南蠻

環王本林邑也一曰占不勞亦曰占婆直交州南海行三千里地東西三百里而羸南北千里西距真臘
 霧温山南抵奔浪陀州其南大浦有五銅柱山形若倚蓋西重巖東涯海漢馬援所植也又有西屠夷蓋
 援還留不去者才十戶隋末孽衍至三百皆姓馬俗以其寓故號馬留人與林邑分唐南境其地冬温多
 霧雨產虎魄猩猩獸結遼鳥以二月為歲首稻歲再熟取檳榔瀋為酒椰葉為席俗凶悍果戰鬥以麝塗
 身日再塗再澡拜謁則合爪頓頰有文字喜浮屠道治金銀像大或十圍呼王為陽蒲逋王妻為陀陽阿
 熊太子為阿長逋宰相為婆漫地王所居曰占城別居曰齊國曰蓬皮勢王衣白氎古貝斜絡臂飾金珮
 為纓髮戴金華冠如章甫妻服朝霞古貝短裙冠纓如王王衛兵五千戰乘象藤為鎧竹為弓矢率象
 千馬四百分前後不設刑有罪者使象踐之或送不勞山界自死隋仁壽中遣將軍劉芳伐之其王范梵
 志挺走以其地為三郡置守令道阻不得通梵志哀遺眾別建國邑武德中再遣使獻方物高祖為設九

乾隆四年校刊

唐書卷二百二十二下列傳

部樂饗之貞觀時王頭黎獻馴象鑿鎖五色帶朝霞布火珠與婆利羅利二國使者偕來林邑其言不恭羣臣請問罪太宗曰昔符堅欲吞晉衆百萬一戰而亡隋取高麗歲調發人與爲怨乃死匹夫手朕敢妄議發兵邪赦不問又獻五色鸚鵡白鸚鵡數訴寒有詔還之頭黎死子鎮龍立獻通天犀雜寶十九年摩訶慢多伽獨弒鎮龍滅其宗范姓絕國人立頭黎婿婆利門爲王大臣共廢之更立頭黎女爲王諸葛地者頭黎之姑子父得罪奔真臘女之王不能定國大臣共迎諸葛地爲王妻以女永徽至天寶凡三入獻至德後更號環王元和初不朝獻安南都護張舟執其僞驩愛州都統斬三萬級虜王子五十九獲戰象勅鐙婆利者直環王東南自交州汎海歷赤土丹丹諸國乃至地大洲多馬亦號馬禮表長數千里多火珠大者如雞卵圓白照數尺日中以艾藉珠輒火出產瑋瑁文螺石埧初取柔可治既鏤刻卽堅有舍利鳥通人言俗黑身朱髮而拳鷹爪獸牙穿耳傳噲以古貝橫一幅縲于腰古貝草也緝其花爲布粗曰貝精曰氈俗以夜爲市自掩其面王姓利利邪伽名護路那婆世居位縵班絲貝綴珠爲飾坐金榻左右持白拂孔雀翼出以象駕車羽蓋珠箔鳴金擊鼓鼈爲樂其東卽羅利也與婆利同俗隋煬帝遣常駿使赤土遂通中國赤土西南入海得婆羅總章二年其王旃達鉢遣使者與環王使者偕朝環王南有殊禁者汎交趾海三月乃至與婆羅同俗貞觀二年使者上方物九年甘棠使者入朝國居海南十二年僧高

武令迦乍鳩密四國使者朝貢僧高直水真臘西北與環王同俗其後鳩密王尸利鳩摩又與富那王尸利提婆跋摩等遣使來貢僧高等國永徽後爲真臘所并

盤盤在南海曲北距環王限少海與狼牙脩接自交州海行四十日乃至王曰楊粟其民瀕水居比木爲柵石爲矢鏃王坐金龍大榻諸大人見王交手抱肩以跪其臣曰敦耶索濫曰崑崙帝也曰崑崙勃和曰崑崙敦諦索甘亦曰古龍古龍者崑崙聲近耳在外曰那延猶中國刺史也有佛道士祠僧食肉不飲酒道士謂爲貪不食酒肉貞觀中再遣使朝其東南有哥羅一曰箇羅亦曰哥羅富沙羅王姓矢利波羅名米失鉢羅累石爲城樓闕宮室茨以草州二十四其兵有弓矢稍笈以孔雀羽飾纛每戰以百象爲一隊一象百人鞍若檻四人執弓稍在中賦率輸銀二銖無絲紵惟古貝畜多牛少馬非有官不束髮凡嫁娶納檳榔爲禮多至二百盤婦已嫁從夫姓樂有琵琶橫笛銅鈸鐵鼓鼈死者焚之取燼貯金罍沉之海東南有拘婁密海行一月至南距婆利行十日至東距不述行五日至西北距文單行六日至與赤土墮和羅同俗永徽中獻五色鸚鵡

扶南在日南之南七十里地卑窪與環王同俗有城郭宮室王姓古龍居重觀柵城椹葉以覆屋王出乘象其人黑身鬚髮保行俗不爲寇盜田一歲種三歲穫國出剛金狀類紫石莢生水底石上人沒水取之

可以刻玉扣以殺角乃泮人喜鬪雞及猪以金珠香爲稅治特牧城俄爲真臘所并益南徙那弗那城武德貞觀時再入朝又獻白頭人二白頭者直扶南西人皆素首膚理如脂居山穴四面峭絕人莫得至與參半國接

真臘一曰吉蔑本扶南屬國去京師二萬七百里東距車渠西屬驃南瀕海北與道明接東北抵驩州其王利利伊金那貞觀初并扶南有其地戶皆東嚮坐上東客至屑檳榔龍腦香蛤以進不飲酒比之淫與妻飲房中避尊屬有戰象五千良者飼以肉世與參半驃通好與環王乾陀洹數相攻自武德至聖歷凡四來朝神龍後分爲二半北多山阜號陸真臘半南際海饒陂澤號水真臘半水真臘地八百里王居婆羅提拔城陸真臘或曰文單曰婆鏤地七百里王號筮屈開元天寶時王子率其屬二十六來朝拜果毅都尉大厯中副王婆彌及妻來朝獻馴象十一擢婆彌試殿中監賜名賓漢是時德宗初卽位珍禽奇獸悉縱之蠻夷所獻馴象畜苑中元會充廷者凡三十二悉放荆山之陽及元和中水真臘亦遣使入貢文單西北屬國曰參半武德八年使者來道明者亦屬國無衣服見衣服者共笑之無鹽鐵以竹弩射鳥獸自給

訶陵亦曰社婆曰闍婆在南海中東距婆利西墮婆登南瀕海北真臘木爲城雖大屋亦覆以枿欄象牙

爲牀若席出瑇瑁黃白金犀象國最富有穴自湧鹽以柳花椰子爲酒飲之輒醉宿昔壞有文字知星厯食無七節有毒女與接輒苦瘡人死尸不腐王居闍婆城其祖吉延東遷於婆露伽斯城旁小國二十八莫不臣服其官有三十二大夫而大坐敢兄爲最貴山上有郎卑野州王常登以望海夏至立八尺表景在表南二尺四寸貞觀中與墮和羅墮婆登皆遣使者入貢太宗以璽詔優答墮和羅丐良馬帝與之至上元間國人推女子爲王號悉莫威令整肅道不舉遺大食君聞之齎金一囊置其郊行者輒避如是三年太子過以足躡金悉莫怒將斬之羣臣固請悉莫曰而罪實本於足可斷趾羣臣復爲請乃斬指以徇大食聞而畏之不敢加兵大厯中訶陵使者三至元和八年獻僧祇奴四五色鸚鵡類伽鳥等憲宗拜內四門府左果毅使者讓其弟嘉美並官之訖大和再朝貢咸通中遣使獻女樂墮和羅亦曰獨和羅南距盤盤北迦邏舍弗西屬海東真臘自廣州行五月乃至國多美犀世謂墮和羅犀有二屬國曰曇陵陀洹曇陵在海洲中陀洹一曰壽陀洹在環王西南海中與墮和羅接自交州行九十日乃至王姓察失利名婆那字婆末無蠶桑有稻麥麻豆畜有白象牛羊豬俗喜樓居謂爲干欄以白氎朝霞布爲衣親喪在室不食燔屍已則剔髮浴于池然後食貞觀時並遣使者再入朝又獻婆律膏白鸚鵡首有十紅毛齊于翅因丐馬銅鍾帝與之墮婆登在環王南行二月乃至東訶陵西迷黎車北屬海俗與訶陵同種稻月一

熟有文字以貝多葉寫之死者實金子口以劍貫其體加婆律膏龍腦衆香積薪燔之

投和在真臘南自廣州西南海行百日乃至王姓投和羅名脯邪迄遙官有朝請將軍功曹主簿贊理贊府分領國事分州郡縣三等州有參軍郡有金威將軍縣有城有局長官得選僚屬自助民居率樓閣置壁王宿衛百人衣朝霞耳金環金縷被頸寶飾革履頻盜者死次穿耳及頰而劓其髮盜鑄者截手無賦稅民以地多少自輸王以農商自業銀作錢類榆莢民乘象及馬無鞍勒繩穿頰御之親喪斷髮爲孝焚尸斂灰于嬰沈之水貞觀中遣使以黃金函內表并獻方物

瞻博或曰瞻婆北距兢伽河多野象羣行顯慶中與婆岸千支弗舍跋若磨臘四國並遣使者入朝千支在西南海中本南天竺屬國亦曰半支跋若唐言五山也北距多摩莫又有哥羅舍分脩羅分甘畢三國貢方物甘畢在南海上東距環王王名旃陀越摩有勝兵五千哥羅舍分者在南海南東墮和羅脩羅分者在海北東距真臘其風俗大略相類有君長皆柵郭二國勝兵二萬甘畢才五千又有多摩莫東距婆鳳西多隆南千支弗北訶陵地東西一月行南北二十五日行其王名骨利詭云得大卵剖之獲女子美色以爲妻俗無姓婚姻不別同姓王坐常東向勝兵二萬有弓刀甲稍無馬果有波那婆宅護遮菴摩石榴其國經薩盧都訶盧君那盧林邑諸國乃得交州顯慶中貢方物

室利佛逝一曰尸利佛誓過軍徒弄山二千里地東西千里南北四千里而遠有城十四以二國分總西曰耶婆露斯多金汞砂龍腦夏至立八尺表影在表南二尺五寸國多男子有囊它豹文而犀角以乘且耕名曰它牛豹又有獸類野豕角如山羊名曰零肉味美以饋膳其王號曷蜜多咸亨至開元間數遣使者朝表爲邊吏侵掠有詔廣州慰撫又獻侏儒僧祇女各二及歌舞官使者爲折衝以其王爲左威衛大將軍賜紫袍金鈿帶後遣子入獻詔宴于曲江宰相會冊封賓義王授右金吾衛大將軍還之

名蔑東接真陀桓西但游南屬海北波刺其地一月行有州三十以十二月爲歲首王衣朝霞賦二十取一交易皆用金準直其人短小兄弟共娶一妻婦總髮爲角辨夫之多少王號斯多題龍朔初使者來貢

單單在振州東南多羅磨之西亦有州縣木多白檀王姓利利名尸陵伽日視事有八大臣號八坐王以香塗身冠雜寶瓔近行乘車遠乘象戰必吹蓋擊鼓盜無輕重皆死乾封總章時獻方物羅越者北距海五千里西南哥谷羅商賈往來所湊集俗與墮羅鉢底同歲乘舶至廣州州必以聞

驪古朱波也自號突羅朱闍婆國人曰徒里拙在永昌南二千里去京師萬四千里東陸真臘西接東天竺西南墮和羅南屬海北南詔地長二千里廣五千里東北表長屬羊苴咩城凡屬國十八曰迦羅婆提

曰摩禮烏特曰迦梨迦曰半地曰彌臣曰坤朗曰偈奴曰羅聿曰佛代曰渠論曰婆梨曰偈陀曰多歸曰摩曳餘卽舍衛瞻婆闍婆也凡鎮城九曰道林王曰悉利移曰三陀曰彌諾道立曰突旻曰帝偈曰達梨謀曰乾唐曰末浦凡部落二百九十八以名見者三十二曰萬公曰充惹曰羅君潛曰彌綽曰道雙曰道嬰曰道勿曰夜半曰不惡奪曰莫音曰伽龍朕曰阿梨吉曰阿梨闍曰阿梨忙曰達磨曰求潘曰僧塔曰提梨郎曰望騰曰擔泊曰祿烏曰乏毛曰僧迦曰提追曰阿末邏曰逝越曰騰陵曰歐啤曰磚羅婆提曰祿羽曰陋蠻曰摩地勃絲彌臣至坤朗又有小崑崙部王名茫悉越俗與彌臣同絲坤朗至祿羽有大崑崙王國王名思利泊婆難多珊那川原大於彌臣絲崑崙小王所居半日行至磨地勃柵海行五月至佛代國有江支流三百六十其王名思利些彌他有川名思利毗離芮土多異香北有市諸國估舶所湊越海卽闍婆也十五日行踰二大山一曰正迷一曰射鞬有國其王名思利摩訶羅闍俗與佛代同經多茸補邏川至闍婆八日行至婆賄伽盧國土熱衢路植椰子檳榔仰不見日王居以金爲甕廚覆銀瓦爨香木堂飾明珠有二池以金爲隄舟楫皆飾金寶驃王姓困沒長名摩羅惹其相名曰摩訶思那王出與以金繩牀遠則乘象嬪史數百人青甕爲圓城周百六十里有十二門四隅作浮圖民皆居中鉛錫爲瓦荔支爲材俗惡殺拜以手抱臂稽顙爲恭明天文喜佛法有百寺琉璃爲甕錯以金銀丹彩紫鐵塗地覆以

錦罽王居亦如之民七歲祝髮止寺至二十有不違其法復爲民衣用白氎朝霞以蠶帛傷生不敢衣戴金花冠翠冒絡以雜珠王宮設金銀二鐘寇至焚香擊之以占吉凶有巨白象高百尺訟者焚香跪象前自思是非而退有災疫王亦焚香對象跪自咎無桎梏有罪者束五竹捶背重者五輕者三殺人則死土宜菽粟稻梁蔗大若脛無麻麥以金銀爲錢形如半月號登伽佗亦曰足彈陀無膏油以臘雜香代炷與諸蠻市以江豬白氎琉璃罽岳相易婦人當頂作高髻飾銀珠琲衣青婆裙披羅段行持扇貴家者傍至五六近城有沙山不毛地亦與波斯婆羅門接距西舍利城二十日行西舍利者中天竺也南詔以兵疆地接常羈制之貞元中王雍羌聞南詔歸唐有內附心異牟尋遣使楊加明詣劍南西川節度使韋皋請獻夷中歌曲且令驃國進樂人於是臯作南詔奉聖樂用正律黃鍾之均宮徵一變象西南順也角羽終變象戎夷革心也舞六成工六十四人贊引二人序曲二十八疊舞南詔奉聖樂字舞人十六執羽翟以四爲列舞南字歌聖主無爲化舞詔字歌南詔朝天樂舞奉字歌海字脩文化舞聖字歌雨露罩無外舞樂字歌闍土丁零塞皆一章三疊而成舞者初定執羽簫鼓等奏散序一疊次奏第二疊四行贊引以序入將終雷鼓作於四隅舞者皆拜金聲作而起執羽稽首以象朝覲每拜跪節以鉦鼓次奏拍序一疊舞者分左右蹈舞每四拍揖羽稽首拍終舞者拜復奏一疊蹈舞拊揖以合南字字成徧終舞者北面跪歌

導以絲竹歌已俯伏鉦作復揖舞餘字皆如之唯聖字詞末皆恭揖以明奉聖每一字曲三疊名爲五成
次急奏一疊四十八人分行罄折象將臣禦邊也字舞畢舞者十六人爲四列又舞闕四門之舞遽舞入
徧兩疊與鼓吹合節進舞三退舞三以象三才三統舞終皆稽首逡巡又一人舞億萬壽之舞歌天南滇
越俗四章歌舞七疊六成而終七者火之成數象天子南面生成之恩六者坤數象西南向化凡樂三十
工百九十六人分四部一龜茲部二大鼓部三胡部四軍樂部龜茲部有羯鼓拊鼓腰鼓雞婁鼓短笛大
小箏築拍板皆八長短箏橫笛方響大銅鈸貝皆四凡工八十八人分四列屬舞筵四隅以合節鼓大鼓
部以四爲列凡二十四居龜茲部前胡部有箏大小箏篋五絃琵琶橫笛短笛拍板皆八大小箏築皆
四工七十二人分四列屬舞筵之隅以導歌詠軍樂部金鑊金鐸皆二柶鼓金鉦皆四鉦鼓金飾蓋垂流
蘇工十二人服南詔服立闕四門舞筵四隅節拜合樂又十六人畫半臂執柶鼓四人爲列舞者服南詔
衣絳裙襦黑頭囊金佉苴畫皮鞞首飾鉢額冠金寶花鬘襦上復加畫半臂執羽翟舞俯伏以象朝拜襦
襦畫鳥獸草木文以八綵雜華以象庶物咸遂羽葆四垂以象天無不覆正方位以象地無不載分四
列以象四氣舞爲五字以象五行秉羽翟以象文德節鼓以象號令遠布振以鐸明采詩之義用龜茲等
樂以象遠夷悅服鉦鼓則古者振旅獻捷之樂也黃鍾君聲配運爲土明土德常盛黃鍾得乾初九向爲

其宮則林鍾四律以正聲應之象大君南面提天統於上乾道明也林鍾得坤初六其位西南西南感至
化於下坤體順也太簇得乾九二是爲人統天地正而三才通故次應以太簇三才既通南呂復以羽聲
應之南呂酉西方金也羽北方水也金水悅而應乎時以象西戎北狄悅服然後姑洗以角音終之姑洗
也洗濯也以象南詔背吐蕃歸化洗過日新阜以五宮異用獨唱殊音復述五均譜分金石之節奏一曰
黃鍾宮之宮軍士歌奉聖樂者用之舞者服南詔衣秉翟俯伏拜拊合南詔奉聖樂五字唱詞五舞者乃
易南方朝天之服絳色七節襦袖節有青襍排袷以象鳥翼樂用龜茲胡部金鉦柶鼓鏡貝大鼓二曰太
簇商之宮女子歌奉聖樂者用之合以管絃若奏庭下則獨舞一曲樂用龜茲鼓笛各四部與胡部等合
作琵琶笙篋篋皆八大小箏築箏五絃琵琶長笛短笛方響各四居龜茲部前次貝一人大鼓十二分左
右餘皆坐奏三曰姑洗角之宮應古律林鍾爲徵宮女子歌奉聖樂者用之舞者六十四人飾羅縠襦袖
間以八采曳雲花履首飾雙鳳八卦綵雲花鬘執羽爲拜拊之節以林鍾當地統象歲功備萬物成也雙
鳳明律呂之和也八卦明道相爲用也綵雲象氣也花鬘象冠也合奉聖樂三字唱詞三表天下懷聖也
小女子字舞則碧色襦袖象角音主木首飾巽卦應姑洗之氣以大人略後象六合一心也樂用龜茲胡
部其鉦柶鏡篋皆覆以綵畫飾以花趺上陳錦綺垂流蘇按瑞圖曰王者有道則儀鳳在鼓故羽葆鼓栖

以鳳凰鉦棲孔雀鏡鐸集以翔鷲鉦捫頂足又飾南方鳥獸明澤及飛走翔伏鉦捫鏡鐸皆一人執擊之
貝及大鼓工伎之數與軍士奉聖樂同而加鼓笛四部四曰林鍾徵之宮斂拍單聲奏奉聖樂丈夫一人
獨舞樂用龜茲鼓笛每色四人方響二置龜茲部前二隅有金鉦中植金鐸二貝二鈴鉞二大鼓十二分
左右五曰南呂羽之宮應古律黃鍾爲君之宮樂用古黃鍾方響一大琵琶五絃琵琶大箏篋倍黃鍾戚
篋小戚篋等笙塤箎擗箏軋箏黃鍾篋倍笛節鼓拍板等工皆一人坐奏之絲竹緩作一人獨唱歌工
復通唱軍士奉聖樂詞雍羌亦遣弟悉利移城主舒難陀獻其國樂至成都章阜復譜次其聲以其舞容
樂器異常乃圖畫以獻工器二十有二其音八金貝絲竹匏革牙角金二貝一絲七竹二匏二革二牙一
角二鈴鉞四制如龜茲部周圍三寸貫以韋擊磬應節鐵板二長三寸五分博二寸五分面平背有柄係
以韋與鈴鉞皆飾條紛以花氎縷爲藥螺貝四大者可受一升飾條紛有鳳首箏篋二其一長二尺腹廣
七寸鳳首及頂長二尺五寸面飾虺皮絃一十有四項有軫鳳首外向其一頂有條軫有龜首箏二其一
形如鼉長四尺有四足虛腹以鼉皮飾背面及仰肩如琴廣七寸腹闊八寸尾長尺餘卷上虛中施關以
張九絃左右一十八柱其一面飾彩花傳以虺皮爲別有龍首琵琶一如龜茲製而頂長二尺六寸餘腹
廣六寸二龍相向爲首有軫柱各三絃隨其數兩軫在項一在頸其覆形如師子有雲頭琵琶一形如前

面飾虺皮四面有牙釘以雲爲首軫上有花象品字三絃覆手皆飾虺皮刻捍撥爲舞崑崙狀而彩飾之
有大匏琴二覆以半匏皆彩畫之上加銅甌以竹爲琴作虺文橫其上長三尺餘頭曲如拱長二寸以條
繫腹穿甌及匏本可受二升大絃應太簇次絃應姑洗有獨絃匏琴以班竹爲之不加飾刻木爲虺首張
絃無軫以絃繫頂有四柱如龜茲琵琶絃應太簇有小匏琴二形如大匏琴長二尺大絃應南呂次應應
鍾有橫笛二一長尺餘取其合律去節無爪以蠟寶首上加師子頭以牙爲之穴六以應黃鍾商備五音
七聲又一管唯加象首律度與荀勗笛譜同又與清商部鍾聲合有兩頭笛二長二尺八寸中隔一節節
左右開衝氣穴兩端皆分洞體爲笛量左端應太簇管末三穴一姑洗二蕤賓三夷則右端應林鍾管末
三穴一南呂二應鍾三大呂下托指一穴應清太簇兩洞體七穴共備黃鍾林鍾兩均有大匏笙二皆十
六管左右各八形如鳳翼大管長四尺八寸五分餘管參差相次製如笙管形亦類鳳翼竹爲簧穿匏達
本上古八音皆以木漆代之用金爲簧無匏音唯驪國得古製又有小匏笙二製如大笙律應林鍾商有
三面鼓二形如酒釭高二尺首廣下銳上博七寸底博四寸腹廣不過首冒以虺皮束三爲一碧條約之
下當地則不冒四面畫驪國工伎執笙鼓以爲飾有小鼓四製如腰鼓長五寸首廣三寸五分冒以虺皮
牙釘彩飾無柄搖之爲樂節引贊者皆執之有牙笙穿匏達本漆之上植二象牙代管雙簧皆應姑洗有

三角笙亦穿匏達本漆之上植三牛角一簧應姑洗餘應南呂角銳在下穿匏達本柄背皆直有兩角笙亦穿匏達本上植二牛角簧應姑洗匏以彩飾凡曲名十有二一曰佛印驪云沒馱彌國人及天竺歌以事王也二曰讚婆羅花驪云囉莽第國人以花爲衣服能淨其身也三曰白鶴驪云答都美其飛止遂情也四曰白鶴游驪云蘇謾底哩謂翔則摩空行則徐步也五曰鬪羊勝驪云來乃昔有人見二羊鬪海岸疆者則見弱者入山時人謂之來乃者勝勢也六曰龍首獨琴驪云彌思彌此一絃而五音備象王一德以畜萬邦也七曰禪定驪云擊寶詩謂離俗寂靜也七曲唱舞皆律應黃鍾商八曰甘蔗王驪云遏思略謂佛教民如蔗之甘皆悅其味也九曰孔雀王驪云桃臺謂毛采光華也十曰野鵝謂飛止必雙徒侶畢會也十一曰宴樂驪云嚙聰綱摩謂時康宴會嘉也十二曰滌煩亦曰笙舞驪云扈那謂時滌煩啓以此適情也五曲律應黃鍾兩均一黃鍾商伊越調一林鍾商小植調樂工皆崑崙衣絳氍朝霞爲蔽膝謂之被襴兩肩加朝霞絡腋足臂有金寶銀釧冠金冠左右珥璫條貫花鬘珥雙簪散以氍初奏樂有贊者一人先導樂意其舞容隨曲用人或二或六或四或八至十皆珠貫拜首稽首以終節其樂五譯而至德宗授舒難陀太僕卿遣還開州刺史唐次述驪國獻樂頌以獻太和六年南詔掠其民三千徙之柘東兩鑿蠻自曲州靖州西南昆川曲軌晉靈喻獻安靈距龍和城通謂之西鑿白蠻自彌鹿升麻二川南至

步頭謂之東鑿烏蠻西鑿自云本安邑人七世祖晉南寧太守中國亂遂王蠻中梁元帝時南寧州刺史徐文盛召詣荆州有鑿瓊者據其地延袤二千餘里士多駿馬犀象明珠既死子震翫分統其衆隋開皇初遣使朝貢命韋世冲以兵戍之置恭州協州昆州未幾叛史萬歲擊之至西洱河滇池而還震翫懼而入朝文帝誅之諸子沒爲奴高祖卽位以其子弘達爲昆州刺史奉父喪歸而益州刺史段綸遣俞大施至南寧治共範川誘諸部皆納款貢方物太宗遣將擊西鑿開青蛉弄棟爲縣鑿蠻之西有徒莫祇蠻儉望蠻貞觀二十三年內屬以其地爲傍望覽丘求五州隸郎州都督府白水蠻地與青蛉弄棟接郎州亦隸弄棟西有大勃弄小勃弄二川蠻其西與黃瓜葉榆西洱河接其衆完富與蜀均無會長喜相讎怨永徽初大勃弄楊承顛私署將帥寇麻州都督任懷玉招之不聽高宗以左領軍將軍趙孝祖爲郎州道行軍總管與懷玉討之至羅侯山其酋長禿磨蒲與大鬼主都干以衆塞菁口孝祖大破之夷人尙鬼謂主祭者爲鬼主每歲戶出一牛或一羊就其家祭之送鬼迎鬼必有兵因以復讎云孝祖按軍多聚城逐北至周近水大會儉彌干鬼主董朴瀕水爲柵以輕騎逆戰孝祖擊斬彌干禿磨蒲鬼主十餘級會大雪戰凍死者略盡孝祖上言小勃弄大勃弄常誘弄棟叛今因破白水請遂西討詔可孝祖軍入夷人皆走險小勃弄酋長歿盛屯白旗城率萬騎戰敗斬之進至大勃弄楊承顛嬰城守孝祖招之不從磨軍進執承

顛餘屯大者數萬小數千皆破降之西南夷遂定罷郎州都督更置戎州都督彝弘達既死以彝歸王爲南寧州都督居石城襲殺東蠻首領蓋驍及子蓋敢徙共範川有兩蠻大鬼主崇道者與弟日進日用居安寧城左聞章仇兼瓊開步頭路築安寧城羣蠻震駭共殺築城使者玄宗詔蒙歸義討之師次波州歸王及崇道兄弟千餘人泥首謝罪赦之俄而崇道殺日進及歸王歸王妻阿妊烏蠻女也走父部乞兵相仇於是諸蠻亂阿妊遣使詣歸義求殺夫者書聞詔以其子守隅爲南寧州都督歸義以女妻之又以一女妻崇道子輔朝然崇道守隅相攻討不置阿妊訴歸義爲興師營昆川崇道走黎州遂虜其族殺輔朝收其女崇道俄亦被殺諸蠻稍離弱閩羅鳳立召守隅并妻歸河談不通中國阿妊由主其部落歲入朝恩賞蕃厚閩羅鳳遣昆川城使楊牟利以兵脅西蠻徙戶二十餘萬於永昌城東蠻以言語不通多散依林谷得不徙自曲靖州石城升麻昆川南北至龍和皆殘于兵日進等子孫居永昌城烏蠻種復振徙居西蠻故地與峯州爲隣貞元中置都督府領羈縻州十八烏蠻與南詔世昏姻其種分七部落一曰阿芋路居曲州靖州故地二曰阿猛三曰夔山四曰暴蠻五曰盧鹿蠻二部落分保竹子嶺六曰磨彌斂七曰勿鄧土多牛馬無布帛男子鬻髮女人被髮皆衣牛羊皮俗尙巫鬼無拜跪之節其語四譯乃與中國通大部落有大鬼主百家則置小鬼主勿鄧地方千里有卽部六姓一姓白蠻也五姓烏蠻也又有初囊五

姓皆烏蠻也居卽部臺登之間婦人衣黑繒其長曳地又有東欽蠻二姓皆白蠻也居北谷婦人衣白繒長不過膝又有粟蠻二姓雷蠻二姓夢蠻三姓散處黎嵩戎數州之鄙皆隸勿鄧勿鄧南七十里有兩林部落有十低三姓阿屯三姓虧望三姓隸焉其南有豐琶部落阿諾二姓隸焉兩林地雖陁而諸部推爲長號都大鬼主勿鄧豐琶兩林皆謂之東蠻天寶中皆受封爵及南詔陷嵩州遂羈屬吐蕃貞元中復通款以勿鄧大鬼主苴嵩兼卽部團練使封長川郡公及死子直驃離幼以苴夢衝爲大鬼主數爲吐蕃侵獵兩林都大鬼主苴那時遣章阜書乞兵攻吐蕃阜遣將劉朝彩出銅山道吳鳴鶴出清溪關道鄧英俊出定蕃柵道進逼臺登城吐蕃退壁西貢川據高爲營苴那時戰甚力分兵大破吐蕃青海臘城二節度軍於北谷青海大兵馬使乞藏遮遮臘城兵馬使悉多楊朱節度論東柴大將論結突梨等皆戰死執籠官四十五人鎧仗一萬牛馬稱是進拔于葱柵乞藏遮遮尙結贊子也以尸還其下曩貢節度蘇論百餘人行哭伎一人立尸左一人問之曰瘡痛乎曰然卽傳藥曰食乎曰然卽進膳曰衣乎曰然卽命裘又問歸乎曰然以馬載尸而去詔封苴那時爲順政郡王苴夢衝爲懷化郡王豐琶部落大鬼主驃傍爲和義郡王給印章袍帶三王皆入朝宴麟德殿賞賚加等歲給其部祿鹽衣綵黎嵩二州更就賜之以山阻多爲盜侵亡失所賜畢令二州爲築館有賜約酋長自至授賜而遣之然苴夢衝內附吐蕃斷南詔使路畢

遣嵩州總管蘇危以兵二百召夢衝至琵琶川聲其罪斬之披其族爲六部以樣棄主之及苴驃離長乃命爲大鬼主驃傍年少驍敢數出兵攻吐蕃吐蕃聞道焚其居室部落亡所賜印章臯爲請復得印驃蠻西有昆明蠻一曰昆彌以西洱河爲境卽葉榆河也距京師九千里土畝濕宜秔稻人辨首左衽與突厥同隨水草畜牧夏處高山冬入深谷尙戰死惡病亡勝兵數萬武德中嵩州治中吉偉使南寧囚至其國諭使入朝貢求內屬發兵戍守自是歲與牂柯使偕來龍朔三年矩州刺史謝法成招慰比樓等七千戶內附總章三年置祿州湯望州咸亨三年昆明十四姓率戶二萬內附析其地爲股州總州敦州以安輯之股州居戎州西北總州居西南敦州居南遠不過五百餘里近三百里其後又置盤麻等四十一州皆以首領爲刺史昆明東九百里卽牂柯國也兵數出侵地數千里元和八月上表請盡歸牂柯故地開成元年鬼主阿珮內屬會昌中封其別帥爲羅殿王世襲爵其後又封別帥爲滇王皆牂柯蠻也東距辰州二千四百里其南千五百里卽交州也無城郭土熱多霜雨稻粟再熟無徭役戰乃屯聚刻木爲契盜者倍三而償殺人者出牛馬三十倍與東謝同首領亦姓謝氏至龍羽有兵三萬武德三年遣使者朝以其地爲牂州拜龍羽刺史封夜郎郡公其北百五十里有別部曰兗州蠻勝兵二萬亦來朝貢以地爲兗州開元中牂柯酋長元齊死孫嘉藝襲官封其後乃以趙氏爲酋長二十五年趙君道來朝其裔有趙國珍

天寶中戰有功閩羅鳳叛宰相楊國忠兼劍南節度使以國珍有方略授黔中都督屢敗南詔護五溪十餘年天下方亂其部獨寧終工部尙書貞元中官其酋長趙主俗亦以裏朝貢不絕至十八年五遣使朝元和二年詔黔南觀察使常以本道將爲押領牂柯昆明等使自是數使或朝正月訖開成不絕遣故事戎夷朝貢將至都中官驛勞於郊旣及館恩禮尤渥西蠻之南有東謝蠻居黔州西三百里南距守宮獠西連夷子地方千里宜五穀爲畬田歲一易之衆處山巢居汲流以飲無賦稅刻木爲契見貴人執鞭而拜賞有功者以牛馬銅鼓犯小罪則杖大事殺之盜物者倍償昏姻以牛酒爲聘女歸夫家夫慙避之旬日乃出會聚擊銅鼓吹角椎髻韜以絳垂于後坐必踞常帶刀劍男子服衫襖大口袴以帶斜絳右肩以螺殼虎豹狻猊犬羊皮爲飾有謝氏世爲酋長部落尊畏之其族不育女自以姓高不可以嫁人貞觀三年其酋元深入朝冠烏熊皮若注旄以金銀絡額被毛帔韋行滕著履中書侍郎顏師古因是上言昔周武王時遠國入朝太史次爲王會篇今蠻夷入朝如元深冠服不同可寫爲王會圖詔可帝以地爲應州卽拜元深刺史隸黔州都督府又有南謝首領謝疆亦來朝以其地爲莊州授疆刺史建中三年大酋長檢校蠻州長史資陽郡公宋鼎與諸謝朝賀德宗以其國小不許訴於黔中觀察使王礎以州接牂柯願隨牂柯朝賀礎奏牂蠻二州戶繁力疆爲隣蕃所憚請許三年一朝詔從之元和中辰徽蠻酋張

伯靖嫉本道督欵苛刻聚眾叛侵播費二州黔中經略使崔能荆南節度使嚴綬湖南觀察使柳公綽討之三歲不能定伯靖上表請隸荆南乃降崔能內恨之更請調荆南湖南桂管軍爲援約西原十洞兵皆出可以成功公卿議者皆以爲便宰相李吉甫曰伯靖挾怨而叛壓以大兵而招之可不戰自定乃命能兵母出獨詔嚴綬招伯靖率家屬詣江陵降授右威衛翊府中郎將東謝南有西趙蠻東距夷子西屬昆明南西洱河也山穴阻深莫知道里南北十八日行東西二十三日行戶萬餘俗與東謝同趙氏世爲酋長夷子渠帥姓季氏與西趙皆南蠻別種勝兵各萬人自古未嘗通中國黔州豪帥田康諷之故貞觀中皆遣使入朝西趙首領趙會摩率所部萬餘戶內附以其地爲明州授會摩刺史松外蠻尙數十百部大者五六百戶小者二三百凡數十姓趙楊李董爲貴族皆擅山川不能相君長有城郭文字頗知陰陽麻數自夜郎滇池以西皆莊躋之裔有稻麥粟豆絲麻薤桃李以十二月爲歲首布幅廣七寸正月蠶生二月熟男子氈革爲帔女衣絁布裙衫髻盤如髮飯用竹筍博而噉之烏杯貯羹如雞彝徒跣有舟無車死則坎地殯舍左屋之三年乃葬以蠶蚌封棺父母喪斬衰布衣不澡者四五年近者二三年爲人所殺者子以麻括髮墨面衣不緝居喪婚嫁不廢亦弗避同姓婚不親迎富室娶妻納金銀牛羊酒女所齋亦如之有罪者樹一長木擊鼓集眾其下疆盜殺之富者賞死燒屋奪其田盜者倍九而償賊盜淫則疆族

輸金銀請和而竊其妻處女釐婦不坐凡相殺必報力不能則其部助攻之祭祀殺牛馬親聯畢會助以牛酒多至數百人貞觀中嶺州都督劉伯英上疏松外諸蠻率薏苡附亟叛請擊之西洱河天竺道可通也居數歲太宗以右武侯將軍梁建方發蜀十二州兵進討會帥雙舍拒戰敗走殺獲十餘萬羣蠻震駭走保山谷建方諭降者七十餘部戶十萬九千署首領蒙和爲縣令餘眾感悅西洱河蠻亦曰河蠻道縣郎州走三千里建方遣奇兵自嶺州道千五百里掩之其帥楊盛大駭欲遁去使者好語約降乃遣首領十人納款軍門建方振旅還二十二年西洱河大首領楊同外東洱河大首領楊斂松外首領蒙羽皆入朝授官秩顯慶元年西洱河大首領楊棟附顯和蠻大首領王羅那郎昆梨盤四州大首領王伽衝率部落四千人歸附入朝貢方物其後茂州西南築安戎城絕吐蕃通蠻之道生羌爲吐蕃嚮導攻拔之增兵以守西洱河諸蠻皆臣吐蕃開元中首領始入朝授刺史會南詔蒙歸義拔大和城乃北徙更羈制於浪穹詔浪穹詔已破又徙雲南柘城黎州領羈縻奉上等州二十六開元十七年又領羈縻夏梁卜貴等州三十一南路有廓清道部落主三人婆鹽鬼主十人又有阿逼蠻分十四部落一曰大龍池二曰小龍池三曰控四曰直質五曰烏披六曰直質七曰威築水八曰戎列九曰婆狄十曰石地十一曰羅公十二曰訛十三曰離曼十四曰里漢黎叩二州之東又有凌蠻西有三王蠻蓋祚都夷白馬氏之遺種楊劉郝三姓

世爲長襲封王謂之三王部落疊贊而居號緇舍歲稟節度府帛三千匹以訶南詔而南詔亦密賂之覘成都虛實每節度使至酋長來謁節度使多奏威惠所懷以罔天子也前謁必請於都押衙且聽命都押衙不令者輒諷其叛常倚三王部落求姑息至唐末益甚雅州西有通吐蕃道三曰夏陽曰夔松曰始陽皆諸蠻錯居凡部落四十六距州三百餘里之外有百坡當品巖城中川鉗矣昌通鉗并七部落四百餘里之外有羅巖當馬三井束鋒名耶鉗恭畫重羅林籠羊林波林燒龍逢索古敢川驚川禍眉不燭十七部落五百餘里之外有諾祚三恭布嵐欠馬論川遠南卑盧夔龍曜川金川東嘉梁西嘉梁十三部落六百餘里之外有椎梅作重福林金林邏蓬五部落皆羈縻州也以首領襲刺史壽州新安城傍有大姓蠻一曰蒙蠻二曰夷蠻三曰訛蠻四曰狼蠻餘勿鄧及白蠻也戎州管內有馴鷗浪三州大鬼主董嘉慶累世內附以忠謹稱封歸義郡王貞元中狼蠻亦請內附補首領狼沙爲刺史然卒不出劍南西川節度使韋臯檄嘉慶兼押狼蠻又有魯望等部落徙居戎州馬鞍山以其遠邊徵戶給米二斛鹽五斤北又有浪稽蠻羅哥谷蠻東有婆秋蠻烏皮蠻南有離東蠻鍋銼蠻西有磨些蠻與南詔越析相姻婭自浪稽以下古滇王哀牢雜種其地與吐蕃接亦有姐羌古白馬氏之裔劍山當吐蕃大路屬石門柳壩二鎮置戍守捉以招討使領五部落一曰彌羌二曰鑠羌三曰胡叢其餘東欽磨些也又有夷望鼓路西望安

樂湯谷佛蠻野阿醜阿鵬仰蠻林井阿異十二鬼主皆隸壽州又有奉國苴伽十一部落春秋受賞於壽州然挾吐蕃爲輕重每節度使至諸部獻馬酋長衣虎皮餘皆紅帶束髮錦縷襖半臂旣見請匹錦斗酒折草招父祖魂以歸鄉里及遷襄錦植馬上而去又有顯養東魯諸蠻永徽三年與胡叢皆叛高宗以右驍衛將軍曹繼叔爲壽州道行軍總管戰斜山拔十餘城斬首七百獲馬犛牛萬五千姚州境有永昌蠻居古永昌郡地咸亨五年叛高宗以太子右衛副率梁積壽爲姚州道行軍總管討平之武后天授中遣御史裴懷古招懷至長壽時大首領董期率部落二萬內屬其西有撲子蠻趨悍以青裝羅爲通身袴善用竹弓入林射飛鼠無不中無食器以蕉葉藉之人多長大負排持稍而鬪又有望蠻者用木弓短箭鏃傳毒藥中者立死婦人食乳酷肥白跣足青布爲衫裳聯貫珂貝珠絡之髻垂于後有夫者分兩髻羣蠻種類多不可記有黑齒金齒銀齒三種見人以漆及鏤金銀飾齒寢食則去之直頂爲髻青布爲通袴有繡脚種刻踝至腓爲文有繡面種生踰月涅黛於面有雕題種身面涅黛有穿鼻種以金銀徑尺貫其鼻下垂過頤君長以綵係銀人率乃行其次以二花頭金釘貫鼻下出又有長髻種棟鋒種皆額前爲長髻下過臍行以物舉之君長則二女在前共舉其髻乃行安南有生蠻林覩符部落大厓中置德化州戶一萬又以潘歸國部落置龍武州戶千五百詔安南節度使綏定之貞元七年始以驩峯二州爲都督府

驪在安南限重海與文單占婆接峯統驪糜州十八與蜀蠻蠻接

南平獠東距智州南屬渝州西接南州北涪州戶四千餘多瘴癘山有毒草沙虱蝮蛇人樓居梯而上各爲干欄婦人橫布二幅穿中貫其首號曰通裙美髮髻垂於後竹筒三寸斜穿其耳貴者飾以珠璫俗女多男少婦人任役婚法女先以貨求男貧者無以嫁則賣爲婢男子左衽露髮徒跣其王姓朱氏號劍荔王貞觀三年遣使內款以其地隸渝州有飛頭獠者頭欲飛周項有痕如縷妻子共守之及夜如病頭忽亡比旦還又有烏武獠地多瘴毒中者不能飲藥故自鑿齒有甯氏世爲南平渠帥陳末以其帥猛力爲靈越太守陳亡自以爲與陳叔寶同日而生當代爲天子乃不入朝隋兵阻瘴不能進猛力死子長真襲刺史及討林邑長真出兵攻其後又率部落數千從征遼東煬帝召爲鴻臚卿授安撫太守遣還又以其族人甯宣爲合浦太守隋亂皆以地附蕭銑長真部越兵攻亓和於交阯者也武德初以靈越鬱林之地降自是交愛數州始通高祖授長真欽州都督甯宣亦遣使請降未報而卒以其子純爲廉州刺史族人道明爲南越州刺史六年長真獻大珠昆州刺史沈遜融州刺史歐陽世普象州刺史秦元覽亦獻筒布高祖以道遠勞人皆不受道明與高州首領馮暄談殿據南越州反攻姜州甯純以兵援之八年長真陷封山縣昌州刺史龐孝恭捨擊暄等走之明年道明爲州人所殺未幾長真死子據襲刺史馮暄談殿阻

兵相掠羣臣請擊之太宗不許遣員外散騎常侍韋叔諧員外散騎侍郎李公淹持節宣諭暄等溪洞首領皆降南方遂定大抵劍南諸獠武德貞觀間數寇暴州縣者不一巴州山獠王多馨叛梁州都督龐玉梟其首又破餘黨符陽白石二縣獠其後眉州獠反益州行臺郭行方大破之未幾又破洪雅二州獠俘男女五千口是歲益州獠亦反都督竇軌請擊之太宗報曰獠依山險當拊以恩信脅之以兵威豈爲人父母意耶貞觀七年東西玉銅獠反以右屯衛大將軍張士貴爲龔州道行軍總管平之十二年巫州獠叛夔州都督齊善行擊破之俘男女三千餘口鈞州獠叛桂州都督張寶德討平之明州山獠又叛交州都督李道彥擊走之是歲巴洋集壁四州山獠叛攻巴州遣右武侯將軍上官懷仁破之于璧州虜男女萬餘明年遂平十四年羅竇諸獠叛以廣州都督党仁弘爲竇州道行軍總管擊之虜男女七千餘人太宗再伐高麗爲船劍南諸獠皆半役雅邛眉三州獠不堪其擾相率叛詔發隴右峽兵二萬以茂州都督張士貴爲雅州道行軍總管與右衛將軍梁建方平之高宗初琰州獠叛梓州都督謝萬歲竟州刺史謝法興黔州都督李猛嘗討之萬歲法興入洞詔慰遇害顯慶三年羅竇生獠酋領多胡桑率衆內附上元末納州獠叛寇故茂都掌二縣殺吏民焚廨舍詔黔州都督發兵擊之大厯二年桂州山獠叛陷州刺史史李良遁去貞元中嘉州綏山縣婆籠川生獠首領甫枳兄弟誘生蠻爲亂剽居人西川節度使韋皋斬

之招其首領勇于等出降或請增柵東凌界以守阜不從曰無戎而城害所生也獠亦自是不擾境戎瀘間有葛獠居依山谷林菁踰數百里俗喜叛州縣撫視不至必合黨數千人持排而戰奉會帥為王號曰婆能出入前後植旗大中末昌瀘二州刺史貪吝以弱糴及羊羶獠市米麥一斛得直不及半羣獠訴曰當為賊取死耳刺史召二小吏撈之曰皆爾屬為之非吾過獠相視大笑遂叛立酋長始艾為王踰梓潼所過焚剽刺史劉成師誘降其黨斬首領七十餘人餘眾遁至東川節度使柳仲郢諭降之始艾稽首請罪仲郢賞遺之成都西北二千餘里有附國蓋漢西南夷也其東部有嘉良夷無姓氏地縱八百里橫四千五百里無城柵居川谷疊石為巢高十餘丈以高下為差作狹戶自內以通上王酋帥以金飾首胛垂金花徑三寸地高涼多風少雨宜小麥多白雉嘉良夷有水廣三十步附國水廣五十步皆南流以草為船附國南有薄緣夷西接女國三濮者在雲南徼外千五百里有文面濮俗鏤面以青涅之赤口濮裸身而折齒劉其臂使赤黑燹濮山居如人以幅布為裙貫頭而繫之丈夫衣穀皮多白蹄牛虎魄龍朔中遣使與千支弗磨臘同朝貢

西原蠻居廣容之南邕桂之西有寧氏者相承為豪又有黃氏居黃橙洞其隸也其地西接南詔天寶初黃氏驪與韋氏周氏儂氏相唇齒為寇害據十餘州韋氏周氏恥不肯附黃氏攻之逐于海濱至德初首

領黃乾曜真崇鬱與陸州武陽朱蘭洞蠻皆叛推武承斐韋敬簡為帥僭號中越王廖殿為桂南王莫瀛為拓南王相支為南越王梁奉為鎮南王羅誠為戎城王莫濬為南海王合眾二十萬緜地數千里署置官吏攻桂管十八州所至焚廬舍掠士女更四歲不能平乾元初遣中使慰曉諸首領賜詔書赦其罪約降於是西原環古等州首領方子彈甘令暉羅承韋張九解宋原五百餘人請出兵討承斐等歲中戰二百斬黃乾曜真崇廖殿莫瀛梁奉羅誠莫濬七人承斐等以餘眾面縛詣桂州降盡釋其縛差賜布帛縱之其種落張侯夏承與夷獠梁崇率覃問及西原酋長吳功曹復合兵內寇陷道州據城五十餘日桂管經略使邢濟擊平之執吳功曹等餘眾復圍道州刺史元結固守不能下進攻永州陷邵州留數日而去湖南團練使辛京杲遣將王國良戍武岡嫉京杲貪暴亦叛有眾千人侵掠州縣發使招之且服且叛建中元年城溱州以斷西原國良乃降貞元十年黃洞首領黃少卿者攻邕管圍經略使孫公器請發嶺南兵窮討之德宗不許命中人招諭不從俄陷欽橫潯貴四州少卿子昌河趨勇前後陷十三州氣益振乃以唐州刺史陽旻為容管招討經略使引師掩賊一日六七戰皆破之侵地悉復元和初邕州擒其別帥黃承慶明年少卿等歸款拜歸順州刺史弟少高為有州刺史未幾復叛又有黃少度黃昌驩二部陷賓鬱二州據之十一年攻欽橫二州邕管經略使韋悅破走之取賓鬱二州是歲復屠巖州桂管觀察使

裴行立輕其軍弱首請發兵盡誅叛者徵幸有功憲宗許之行立兵出擊彌更二歲妄奏斬獲二萬罔天子爲解自是邕容兩道殺傷疾疫死者十八以上調費闕亡縣行立陽曼二人當時莫不咎之及安南兵亂殺都護李象古擢唐州刺史桂仲武爲都護逗留不敢進貶安州刺史以行立代之尋召還卒長慶初以容管經略使留後嚴公素爲經略使復上表請討黃氏兵部侍郎韓愈建言黃賊皆洞獠無城郭依山險各治生業急則屯聚畏死前日邕管經略使德不能綏懷威不能臨制侵詐係縛以致憾恨夷性易動而難安劫州縣復私鬻貪小利不爲大患自行立陽曼建征討生事詭賞邕容兩管日以凋敝殺傷疾患十室九空百姓怨嗟如出一口人神共嫉二將繼死今嚴公素非撫御之才復尋往謬誠恐嶺南未有寧時昨合邕容爲一道邕與賊限一江若經略使居之兵鎮所處物力雄完則敵人不致輕犯容州則隔阻已甚以經略使居之則邕州兵少情見易啟蠻心請以經略使還邕州容置刺史便甚又比發南兵遠鄉羈旅疾疫殺傷續添續死每發倍難若募邕容千人以給行營糧不增而兵便習守則有威攻則有利自南討損傷嶺南人希賊之所處洞壘荒僻假如盡殺其人得其地在國計不爲有益容貸羈縻比之禽獸來則捍禦去則不追未有虧損朝廷願因改元大慶普赦其罪遣郎官御史以天子意丁寧宣諭必能謹叫聽命爲選材用威信者委以經略處理得方宜無使叛事不納初邕管既廢人不謂宜監察御史杜周

士使安南過邕州刺史李元宗白狀周士從事五管積三十年矣亦知其不便嚴公素遣人盜其橐周士憤死公素劾元宗擅以羅陽縣還黃少度元宗懼引兵一百持印章依少度穆宗遣監察御史敬僚按之僚嘗爲容州從事與公素暱傳致元宗罪以母老流驩州衆以爲不直黃賊更攻邕州陷左江鎮攻欽州陷千金鎮刺史楊嶼奔石南柵邕州刺史崔結擊破之明年又寇欽州殺將吏是歲黃昌瓊遣其黨陳少奇二十人歸款請降敬宗納之黃氏儂氏據州十八經略使至遣一人詣治所稍不得意輒侵掠諸州橫州當邕江官道嶺南節度使常以兵五百戍守不能制大和中經略使董昌齡遣子蘭討平峒穴夷其種黨諸蠻畏服有違命者必嚴罰之十八州歲輸貢賦道路清平其後儂洞最彊結南詔爲助懿宗與南詔約和二洞數構敗之邕管節度使辛讜以從事徐雲虔使南詔結和齋美貨啖二洞首領太州刺史黃伯蘊屯洞首領儂金意員州首領儂金勒等與之通驩員州又有首領儂金澄儂仲武與金勒襲黃洞首領黃伯善伯善伏兵瀼水雞鳴候其半濟擊殺金澄仲武唯金勒遁免後欲興兵報仇辛讜遣人持牛酒音樂解和并遺其母衣服母賢者也讓其子曰節度使持物與獠母非結好也以汝爲吾子前日兵敗瀼水士卒略盡不自悔復欲動衆兵忿者必敗吾將囚爲官老婢矣金勒感悟爲罷兵

贊曰唐北禽頡利西滅高昌焉耆東破高麗百濟威制夷狄方策所未有也交州漢之故封其外瀕海諸

蠻無廣土堅城可以居守故中國兵未嘗至及唐稍弱西原黃洞繼為邊害垂百餘年及其亡也以南詔詩曰患此中國以綏四方不以夷狄先諸夏也

唐書卷二百二十二下

唐書卷二百二十三上

宋 端 明 殿 學 士 宋 祁 撰

列傳第一百四十八上

姦臣

許敬宗字延族杭州新城人父善心仕隋為給事中敬宗幼善屬文大業中舉秀才中第調淮陽書佐俄直謁者臺奏通事舍人事善心為宇文化及所殺敬宗哀請得不死去依李密為記室武德初補澶州別駕太宗聞其名召署文學館學士貞觀中除著作郎兼修國史喜謂所親曰仕宦不為著作無以成門戶俄改中書舍人文德皇后喪羣臣衰服率更令歐陽詢貌醜異敬宗侮笑自如貶洪州司馬累轉給事中復修史以勞封高陽縣男檢校黃門侍郎高宗在東宮遷太子右庶子高麗之役太子監國定州敬宗與高士廉典機劇岑文本卒帝驛召敬宗以本官檢校中書侍郎駐驛山破賊命草詔馬前帝愛其藻警由是專掌誥令初太子承乾廢官屬張玄素令狐德棻趙弘智裴宣機蕭鈞皆除名為民不復用敬宗為言玄素等以直言被嫌忌今一槩被罪疑洗宥有所未至帝悟多所甄復高宗即位遷禮部尚書敬宗饗沓遂以女嫁蠻酋馮盎子多私所聘有司劾舉下除鄭州刺史俄復官為弘文館學士帝將立武昭儀大臣

切諫而敬宗陰懼帝私即妄言曰田舍子賸獲十斛麥尙欲更故婦天子富有四海立一后謂之不可何哉帝意遂定王后廢敬宗請削后家官爵廢太子忠而立代王遂兼太子賓客帝得所欲故詔敬宗待詔武德殿西闕頃拜侍中監修國史爵郡公帝嘗幸故長安城按蹕裴回視古區處問侍臣秦漢以來幾君都此敬宗曰秦居咸陽漢惠帝始城之其後符堅姚萇宇文周居之帝復問漢武開昆明池實何年對曰元狩二年將伐昆明實爲此池以肄戰帝乃詔與弘文學士討古宮室故區具條以聞進中書令仍守侍中敬宗於立后有助力知后鉗戾能固主以久己權乃陰連后謀逐韓瑗來濟褚遂良殺梁王長孫無忌上官儀朝廷重足事之威寵熾灼當時莫與比改右相辭疾拜太子少師同東西臺三品年老不任趨步特詔與司空李勣朝朔日聽乘小馬至內省帝東封泰山以敬宗領使次濮陽帝問寶德玄此謂帝何也德玄不對敬宗僂曰臣能知之昔帝顓頊始居此地以王天下其後夏后相因之爲寒泥所滅后緡方偃逃出自竇在此地也後昆吾氏因之而爲夏伯昆吾既衰湯滅之其頌曰韋顧既伐昆吾夏桀是也至春秋時衛成公自楚丘徙居之左氏稱相奪予享以舊地也由顓頊所居故曰帝丘臣聞有德者啟其國土失道者則喪其疆宇自古大都美國居者不一姓故有國家者不可不慎也帝曰書稱浮于濟深今濟與深斷不相屬何故而然對曰夏禹導沅水東流爲濟入于河今自深至温而入河水自此泚地過河而

南出爲滎又泚而至曹濮散出於地合而東汶水自南入之所謂洙爲滎東出于陶丘北又東會于汶是也古者五行皆有官水官不失職則能辨味與色潛而出合而更分皆能識之帝曰天下洪流巨谷不載祀典濟甚細而在四瀆何哉對曰瀆之言獨也不因餘水獨能赴海者也且天有五星運而爲四時地有五嶽流而爲四瀆人有五事用而爲四支五陽數也凶陰數也有奇偶陰陽焉陽者光曜陰者晦昧故辰隱而難見濟潛流屢絕狀雖微細獨而尊也帝曰善敬宗退矜曰大臣不可無學向德玄不能對吾恥之德玄聞之不屑曰人各有能不彊所不知吾所能也李勣曰敬宗多聞美矣寶之不彊不亦善乎初高祖太宗實錄敬播所譏信而詳及敬宗身爲國史竄改不平專出己私始虞世基與善心同遭賊害封德彝常曰昔吾見世基死世南匍匐請代善心死敬宗蹈舞求生世爲口實敬宗銜憤至立德彝傳盛誣以惡敬宗子娶尉遲敬德女孫而女嫁錢九隴子九隴本高祖隸奴也爲虛立門閥功狀至與劉文靜等同傳太宗賜長孫無忌威鳳賦敬宗猥稱賜敬德蠻酋龐孝泰率兵從討高麗賊笑其懦襲破之敬宗受其金乃稱屢破賊唐將言驍勇者唯蘇定方與孝泰曹繼叔劉伯英出其下遠甚然自貞觀後論次諸書自晉盡隋及東殿新書西域圖志姓氏錄新禮等數十種皆敬宗總知之賞賚不勝紀敬宗營第舍華僭至造連樓使諸妓走馬其上縱酒奏樂自娛嬖其婢因以繼室假姓虞子昂丞之敬宗怒黜虞奏斥昂嶺外久

乃表還咸亨初以特進致仕仍朝朔望續其俸祿卒年八十一帝爲舉哀詔百官哭其第冊贈開府儀同
三司揚州大都督陪葬昭陵太常博士袁思古議敬宗棄子荒微女嫁蠻落諡曰繆其孫彥伯訴思古有
嫌詔更議博士王福時曰何曾忠而孝以食日萬錢諡繆醜况敬宗忠孝兩棄飲食男女之累過之執不
改有詔尙書省雜議更諡曰蔡彥伯昂子也頗有文敬宗晚年不復下筆凡大典冊悉彥伯爲之嘗戲昂
曰吾兒不及若兒答曰渠父不如昂父後又納婢譖奏流彥伯嶺表遇赦還累官太子舍人既與思古有
憾欲邀擊諸路思古曰吾爲先子報仇耳彥伯慙而止垂拱中詔敬宗配饗高宗廟廷

李義府瀛州饒陽人其祖嘗爲射洪丞因客永泰貞觀中李大亮巡察劍南表義府才對策中第補門下
省典儀劉洎馬周更薦之太宗召見轉監察御史詔侍晉王王爲太子除舍人崇賢館直學士與司議郎
來濟俱以文翰顯時稱來李獻承華箴末云佞諛有類邪巧多方其萌不絕其害必彰義府方諂事太子
而文致若讜直者太子表之優詔賜帛高宗立遷中書舍人兼修國史進弘文館學士爲長孫無忌所惡
奏斥壁州司馬詔未下義府問計於舍人王德儉德儉者許敬宗甥孌而智善揣事因曰武昭儀方有寵
上欲立爲后畏宰相議未有以發之君能建白轉禍於福也義府卽代德儉直夜叩閣上表請廢后立昭
儀帝悅召見與語賜珠一斗停司馬詔書留復侍武后已立義府與敬宗德儉及御史大夫崔義玄中丞

袁公瑜大理正侯善業相推轂濟其姦誅棄骨顛大臣故后得肆志攘取威柄天子斂衽矣義府貌柔恭
與人言嬉怡微笑而陰賊褊忌著于心凡忤意者皆中傷之時號義府笑中刀又以柔而害物號曰人貓
永徽六年拜中書侍郎同中書門下三品封廣平縣男又兼太子右庶子爵爲侯洛州女子瀆于以姦繫
大理義府聞其美屬丞畢正義出之納以爲妾卿段寶玄以狀聞詔給事中劉仁軌侍御史張倫鞠治義
府且窮逼正義縊獄中以絕始謀侍御史王義方廷劾義府不引咎三叱之然後趨出義方極陳其惡帝
陰德義府故貸不問爲抑義方逐之未幾進中書令檢校御史大夫加太子賓客更封河間郡公詔造私
第諸子雖祿賁皆補清官初杜正倫爲黃門侍郎義府繼典儀及同輔政正倫恃先進不相下密與中書
侍郎李友益圖去義府反爲所誣交訟帝前帝兩黜之正倫爲橫州刺史義府普州刺史流友益峯州明
年召爲吏部尙書同中書門下三品母喪免奪喪爲司列太常伯同東西臺三品更葬其先永康陵側役
縣人牛車輸土築墳助役者凡七縣高陵令不勝勞而死公卿爭贈遺葬日詔御史節哭送車從騎相銜
帷幣奠帳自灞橋屬三原七十里不絕輜輶偶僭侈不法人臣送葬之盛無與比者殷王出閣又兼府
長史稍遷右相義府已貴乃言系出趙郡與諸李敘昭穆嗜進者往往尊爲父兄行給事中李崇德引與
同譜既謫普州亟削去義府銜之及復當國傳致其罪使自殺于獄貞觀中高士廉韋挺岑文本令狐德

蔡脩氏族志凡升降天下允其議於是州藏副本以爲長式時許敬宗以不載武后本望義府亦聘先世不見敘更奏刪正委孔志約楊仁卿史玄道呂才等定其書以仕唐官至五品皆昇士流於是兵卒以軍功進者悉入書限更號姓氏錄縉紳共嗤斬之號曰勳格義府奏悉收前志燒絕之自魏太和中定望族七姓子孫迭爲婚姻後雖益衰猶相夸尙義府爲子求婚不得遂奏一切禁止既主選無品鑿才而谿壑之欲惟賄是利不復銓判人人咨訕又母妻諸子賣官市獄門如沸湯自永徽後御史多制授吏部雖有調注至門下覆不留義府乃自注御史員外通事舍人有司不敢卻帝嘗從容戒義府曰聞卿兒子女婿擄法多過失朕爲卿掩覆可少勗之義府內倚后揣羣臣無敢白其罪者不虞帝之知乃勃然變色徐曰誰爲陛下道此帝曰何用問我所從得邪義府愕然不謝徐引去帝由是不悅會術者杜元紀望義府第有獄氣曰發積錢二十萬可以厭勝義府信之哀索殊急居母喪朔望給告卽羸服與元紀出野馮高窺覘災眚衆疑其有異謀又遣子津召長孫延謂曰吾爲子得一官居五日延拜司津監索謝錢七十萬右金吾倉曹參軍楊行穎白其贓詔司刑太常伯劉祥道與三司雜訊李勣監按有狀詔除名流嶺州子率府長史洽千牛備身洋及婿少府主簿柳元貞並流延州司議郎津流振州朝野至相賀三子及婿尤凶肆既敗人以爲誅四凶或作河間道元帥劉祥道破銅山大賊李義府露布榜于衢乾封元年大赦獨流

人不許還義府憤恚死年五十三自其斥天下憂且復用比死內外乃安上元初赦妻子還洛陽如意中贈義府揚州大都督崔義玄益州大都督王德儉袁公瑜魏相二州刺史各賜實封睿宗立詔停少子湛見李多祚傳

傅游藝衛州汲人載初初由合宮主簿再遷左補闕武后奪政卽上書詭說符瑞勸后當革姓以明受命后說擢給事中閏三月進同鳳閣鸞臺平章事卽拜鸞臺侍郎后乃黜唐稱周廢唐宗廟自稱皇帝賜游藝姓武氏以兄神童爲冬官尙書游藝嘗夢登湛露殿既寤以語所親有告其謀反者下獄自殺以五品禮葬之初游藝探后旨誣殺宗室復請發六道使後卒用其言萬國俊等既出天下被其酷游藝起一歲賜袍自青及紫人號四時仕宦然歲中卽敗前古少其比云

李林甫長平肅王叔良曾孫初爲千牛直長舅姜皎愛之開元初遷太子中允源乾曜執政與皎爲姻家而乾曜子瓘爲林甫求司門郎中乾曜素薄之曰郎官應得才望哥奴豈郎中材邪哥奴林甫小字也卽授以諭德累擢國子司業宇文融爲御史中丞引與同列稍懲刑吏部侍郎初吏部置長名榜定留放靈王私謁十人林甫曰願絀一人以示公遂榜其一曰坐王所囑放冬集時武惠妃寵傾後宮子壽王盛王尤愛林甫因中人白妃願護壽王爲萬歲計妃德之侍中裴光廷夫人武三思女嘗私林甫而高力士本

出三思家及光廷卒武請力士以林甫代爲相力士未敢發而帝因蕭嵩言自用韓休方具詔武適語林甫便爲休請休既相重德林甫而與嵩有隙乃薦林甫有宰相才妃陰助之卽拜黃門侍郎尋爲禮部尚書同中書門下三品再進兵部尚書皇太子鄂王光王被譖帝欲廢之張九齡切諫帝不悅林甫惘然私語中人曰天子家事外人何與邪二十四年帝在東都欲還長安裴耀卿等建言農人場圃未畢須冬可還林甫陽蹇獨在後帝問故對曰臣非疾也願奏事二都本帝王東西宮車駕往幸何所待時假令妨農獨赦所過租賦可也帝大悅卽駕而西始九齡繇文學進守正持重而林甫特以便佞故得大任每嫉九齡陰害之帝欲進朔方節度使牛仙客實封九齡謂林甫封賞待名臣大功邊將一上最可遽議要與公同爭林甫然許及進見九齡極論而林甫抑嘿退又漏其言仙客明日見帝泣且辭帝滋欲賞仙客九齡持不可林甫爲人言天子用人何不可者帝聞善林甫不專也由是益疏薄九齡俄與耀卿俱罷政事專任林甫相仙客矣初三宰相就位二人馨折趨而林甫在中軒鶩無少讓喜津津出眉宇間觀者竊言一鵬挾兩兔少選詔書出耀卿九齡以左右丞相罷林甫嘻笑曰尙左右丞相邪目志而送乃止公卿爲戰栗於是林甫進兼中書令帝卒用其言殺三子天下寃之大理卿徐嶠妄言大理獄殺氣盛鳥雀不敢棲今刑部斷死歲纔五十八而烏鵲巢獄戶幾至刑措羣臣賀帝而帝推功大臣封林甫晉國公仙客幽國

公及帝將立太子林甫探帝意數稱道壽王語祕不傳而帝意自屬忠王壽王不得立太子既定林甫恨謀不行且畏禍乃陽善韋堅堅太子妃兄也使任要職將覆其家以搖東宮及構堅獄而太子絕妃自明林甫計黜杜良姊之父有隣與婿柳勣不相中勣浮險欲助林甫乃上有隣變事捕送詔獄賜死逮引裴敦復李邕等皆林甫素惡者株連殺之太子亦出良姊爲庶人未幾適濟陽別駕魏林使誣河西節度使王忠嗣欲擁兵佐太子帝不信然忠嗣猶斥去林甫數白太子宜知謀帝曰吾兒在內安得與外人相聞此妄耳林甫數危太子未得志一日從容曰古者立儲君必先賢德非有大勳力於宗稷則莫若元子帝久之曰慶王往年獵爲豹傷面甚答曰破面不愈於破國乎帝頗惑曰朕徐思之然太子自以謹孝聞內外無惡言故飛語不得入帝無所發其猜林甫善刺上意時帝春秋高聽斷稍怠厭繩檢重接對大臣及得林甫任之不疑林甫善養君欲自是帝深居燕適沈疊衽席主德衰矣林甫每奏請必先餉遺左右審伺微旨以固恩信至褻夫御婢皆所款厚故天子動靜必具得之性陰密忍誅殺不見喜怒面柔令初若可親旣崖穿深阻卒不可得也公卿不由其門而進必被罪徙附離者雖小人且爲引重同時相若九齡李適之皆遭逐至楊慎矜張瑄盧幼臨柳升等緣坐數百人並相繼誅以王鉷吉溫羅希奭爲爪牙數興大獄衣冠爲累息適之子雪嘗盛具召賓客畏林甫乃終日無一人往者林甫有堂如偃月號月堂每

欲排搆大臣卽居之思所以中傷者若喜而出卽其家碎矣子岫爲將作監見權勢熏灼惕然懼常從游後園見輦重者跪涕曰大人居位久枳棘滿前一巨禍至欲比若人可得乎林甫不樂曰勢已然可奈何時帝詔天下士有一藝者得詣闕就選林甫恐士對詔或斥已卽建言士皆草茅未知禁忌徒以狂言亂聖聽請悉委尙書省長官試問使御史中丞監總而無一中程者林甫因賀上以爲野無留才俄兼隴右河西節度使改右相罷節度加累開府儀同三司實封戶三百咸寧太守趙奉璋得林甫隱惡二十條將言之林甫諷御史捕繫奉璋劾妖言抵死著作郎韋子春坐厚善貶帝嘗大陳樂勤政樓旣罷兵部侍郎盧絢按轡絕道去帝愛其醜藉稱美之明日林甫召絢子曰尊府素望上欲任以交廣若憚行且當請老竊懼從之因出爲華州刺史俄授太子員外詹事絢是廢於時有以材譽聞者林甫護前皆能得於天子抑遠之故在位恩寵莫比凡御府所貢遠方珍鮮使者傳賜相望帝食有所甘美必賜之嘗詔百僚闋歲貢於尙書省旣而舉貢物悉賜林甫輦致其家從幸華清宮給御馬武士百人女樂二部薛王別墅勝麗甲京師以賜林甫宅邸第田園水磴皆便好上腴車馬衣服侈靡尤好聲伎侍姬盈房男女五十人故事宰相皆元功盛德不務權威出入騎從簡寡士庶不甚引避林甫自見結怨者衆憂刺客竊發其出入廣騎先驅百步傳呼呵衛金吾爲清道公卿辟易趨走所居重關複壁絡版墜石一夕再徙家人亦莫

知也或帝不朝羣司要官悉走其門臺省爲空左相陳希烈雖坐府卒無人入謁林甫無學術發言陋鄙聞者竊笑善苑咸郭慎微使主書記然練文法其用人非諂附者一以格令持之故小小綱目不甚亂而人憚其威權久之又兼安西大都護朔方節度使俄兼單于副大都護以朔方副使李獻忠反讓還節度始厚王鉷爲盡力及鉷敗詔宰相治狀林甫大懼不敢面鉷獄具署名亦無所申救因以楊國忠代爲御史大夫林甫薄國忠材辱無所畏又以貴妃故善之及是權益盛貴震天下始交惡若仇敵然國忠方兼劍南節度使而南蠻入寇林甫因建遣之鎮欲離間之國忠入辭帝曰處置且訖亟還指日待卿林甫聞之憂懣是時已屬疾稍侵會帝幸溫湯詔以馬輦從御醫珍膳繼至詔旨存問中官護起居病劇巫者視疾云見天子當少間帝欲視之左右諫止乃詔林甫出廷中帝登降聖閣舉絳巾招之林甫不能興左右代拜俄而國忠至自蜀謁林甫牀下垂涕託後事因不食卒諸子護還京發喪贈太尉揚州大都督林甫居相位凡十九年固寵市權蔽欺天子耳目諫官皆持祿養資無敢正言者補闕杜璡再上書言政事斥爲下邳令因以語動其餘曰明主在上羣臣將順不暇亦何所論君等獨不見立仗馬乎終日無聲而飢三品獨豆一鳴則黜之矣後雖欲不鳴得乎由是諫爭路絕貞觀以來任蕃將者如阿史那社尒契苾何力皆以忠力奮然猶不爲上將皆大臣總制之故上有餘權以制於下先天開元中大臣若薛訥郭元振

張嘉貞王峻張說蕭嵩杜暹李適之等自節度使入相天子林甫疾儒臣以方略積邊勞且大任欲杜其本以久已權即說帝曰以陛下雄材國家富彊而夷狄未滅者繇文吏爲將憚矢石不身先不如用蕃將彼生而雄養馬上長行陣天性然也若陛下感而用之使必死夷狄不足圖也帝然之因以安思順代林甫領節度而擢安祿山高仙芝哥舒翰等專爲大將林甫利其虜也無入相之資故祿山得專三道動兵處十四年不徙天子安林甫策不疑也卒稱兵蕩覆天下王室遂微初林甫夢人暫而髻將逼己寤而物色得裴寬類所夢曰寬欲代我因李適之黨逐之其後楊國忠代林甫貌類寬云國忠素銜林甫及未葬陰諷祿山暴其短祿山使阿布思降將入朝告林甫與思約爲父子有異謀事下有司其壻楊齊宣懼妄言林甫厭呪上國忠劾其姦帝怒詔林甫淫祀厭勝結叛虜圖危宗社悉奪官爵斷棺剔取含珠金紫更以小櫬用庶人禮葬之諸子司儲郎中寧太常少卿嶼及岫等悉徙嶺南黔中各給奴婢三人籍其家諸婿若張博濟鄭平杜位元搗屬子復道光皆貶官博濟亦儉薄自肆爲戶部郎中部有考堂天下歲會計處博濟廢爲員外郎中廳事壯偉華敞供擬豐侈至千品別取都水監地爲考堂擅廢諸州籍帳錢不貲有司不敢言帝之幸蜀也給事中裴士淹以辯學得幸時肅宗在鳳翔每命宰相輒啟聞及房瑄爲將帝曰此非破賊才也若姚元崇在賊不足滅至宋璟曰彼實直以取名耳因歷評十餘人皆當至林甫曰是

子妬賢嫉能舉無比者士淹因曰陛下誠知之何任之久邪帝默不應至德中兩京平大赦唯祿山支黨及林甫楊國忠王鉷子孫不原天寶時嘗鏤玉爲玄元皇帝及玄宗肅宗像於太清宮復琢林甫陳希烈像列左右序代宗時或言林甫陰險嘗不利先帝宗廟幾危奈何留像至今有詔瘞宮中廣明初盧攜爲太清宮使發地得其像輦送京兆毀之云

陳希烈者宋州人博學尤深黃老工文章開元中帝儲思經義自褚無量元行沖卒而希烈與康子元馮朝隱進講禁中其應答詔問敷盡微隱皆希烈爲之章句累遷中書舍人十九年爲集賢院學士進工部侍郎知院事帝有所譏述希烈必助成之遷門下侍郎天寶元年有神降丹鳳門以爲老子告錫靈符希烈因是上言臣侍演南華真經至七篇陛下顧曰此言養生朕既悟其術而德充符詎無非常應哉臣稽首對陛下德充於內符應於外必有絕瑞表之今靈符降錫與帝意合宜示史官著顯祥摛照無窮其媿佞類如此俄兼崇玄館大學士封臨穎侯林甫顯朝苟用可專制者引與共政以希烈柔易且帝眷之厚乃薦之五載進同中書門下平章事遷左丞相兼兵部尚書許國公又兼祕書省圖書使寵與林甫侔林甫居位久其陰詭雖足自固亦希烈左右焉楊國忠執政素忌之希烈引避國忠卽薦韋見素代相罷爲太子太師希烈失職內忽忽無所賴及祿山盜京師遂與達奚珣等皆相賊後論罪斬肅宗以上皇素所

遇賜死于家

唐書卷二百二十三上

唐書卷二百二十三上考證

許敬宗傳更諡曰蔡臣酉按舊書云袁思敬議諡按證法過而能改曰恭諡曰恭蔡與恭字形相似

新書誤

唐書卷二百二十三上考證

唐書卷二百二十三下

宋 端 明 殿 學 士 宋 祁 撰

列傳第一百四十八下

姦臣

盧杞字子良父奔見忠義傳杞有口才體陋甚鬼貌藍色不恥惡衣菲食人未悟其不情咸謂有祖風節
藉蔭為清道率府兵曹參軍僕固懷恩辟朔方府掌書記病免補鴻臚丞出為忠州刺史上謁節度府衛
伯玉伯玉不喜乃謝歸稍遷吏部郎中為魏州刺史奏言魏有官豕三千為民患德宗曰徙之沙苑杞曰
同州亦陛下百姓臣謂食之便帝曰守魏而憂它州宰相材也詔以豕賜貧民遂有意柄任矣俄召為御
史中丞論奏無不合踰年遷大夫不閱旬擢門下侍郎同中書門下平章事既得志險賊竄露賢者媚能
者忌小忤已不傳死地不止將大樹威脅眾市權為自固者楊炎與杞俱輔政炎鄙杞才下不悅未半歲
譖罷炎時大理卿嚴郢與炎有隙即擢郢御史大夫以自助炎卒逐死張鎰材裕忠懿帝所倚愛未有以
間會隴右用兵杞乃見帝僞請行帝不可即薦鎰守鳳翔既又惡郢時幽州朱滔與泚有違言誣其軍司
馬蔡廷玉間請殺之俄而滔反帝欲兵之以悅滔下御史鄭詹按狀貶柳州司戶參軍敕吏護送廷玉

疑送滄所因自沈于河杞奏恐泚疑爲詔所殺願下詹三司雜治并劾大夫郢初詹善張鎰每伺杞間獨詣鎰杞知之宅日伺詹來卽徑至鎰便坐詹趨避杞遽及機事鎰不得已曰鄭侍御在杞陽驚曰向所言非外所得聞至是并按有詔詹杖死流郢費州杜佑判度支帝尤寵禮杞短毀百緒詔貶蘇州刺史李希烈反杞素惡顏真卿挺正敢言卽令宣慰其軍卒爲賊害故宰相李揆有雅望畏復用道爲吐蕃會盟使卒于行李滄以徐州降有所經略使人誤先白鎰杞怒沮解之不使有功其狙害隱毒天下無不痛憤以杞得君故不敢言是時兵屯河南北望不解財用日急於是度支條軍所仰給月費繕百餘萬而藏錢纔支三月杞乃以戶部侍郎趙贊判度支其黨韋都賓等建言商賈儲錢千萬聽自業過千萬者責其贏以濟軍軍罷約取償于官帝許之京兆暴責其期校吏頸大搜廩里疑占列不盡則笞掠之人不勝冤自殞溝瀆者相望京師囂然不闕日然悉田宅奴婢之直繕止八十萬又餽匱質舍居買粟者四資其一僅至二百萬而長安爲閉肆民皆邀宰相祈訴杞無以諭驅而去帝知民愁忿而所得不足給師罷之贊術窮於是間架除陌之暴縱矣其法屋二架爲間差稅之上者二千中千下五百吏執籌入第室計之隱不盡率二架抵罪告者以錢五萬畀之凡公私貿易舊法率千錢算二十請加五十主僧注所售入其算有司其自相市爲私籍自言隱不盡率千錢沒二萬告者以萬錢畀之由是主僧得操其私以爲姦公上所入

常不得半而恨誹之聲滿天下及涇師亂呼於市曰不奪而商人儼質矣不稅而間架除陌矣其倡和造作以召怨挺亂皆杞爲之帝出奉天杞與關播從後數日崔靈自賊中來以播遷事指杞杞卽誣靈反帝殺之靈武杜希全率鹽夏二州士六千來赴帝議所從道杞請道漢谷渾城曰不然彼多險且爲賊乘不如道乾陵北踰雞子堆而屯與爲犄角賊可破矣帝從杞議賊果拒隘兵不得入奔還邠州李懷光自河北還數破賊泚解去或謂王翊趙贊曰聞懷光嘗斥宰相不能謀度支賦斂重而京兆刻損軍賜宜誅之以謝天下方懷光有功上必聽用其言公等殆矣二人以白杞杞懼卽譖帝曰懷光勳在宗社賊憚之破膽今因其威可一舉而定若許來朝則犒賜留連賊得衰整殘餘爲完守計圖之寶難不如席勝使平京師破竹之勢也帝然之詔懷光無朝進屯便橋懷光自以千里勤難有大功爲姦臣沮間不一見天子內快快無所發遂謀反因暴言杞等罪惡士議譁沸皆指目杞帝始寤貶爲新州司馬始帝卽位以崔祐甫爲相專以道德導主意故建中初綱紀張設赫然有貞觀風及杞相乃諷帝以刑名繩天下亂敗踵及其陰害矯譎雖國屯主辱猶整然肆爲之後雖斥然帝念之不衰及興元赦令俄徙吉州長史杞乃曰上必復用我貞元元年詔拜饒州刺史給事中袁高當行詔書不肯草白宰相曰杞反易天常使萬乘播遷幸赦不誅又委大州失天下望宰相不悅乃召宅舍人作制高固執不得下於是諫臣趙需裴佶宇文炫盧

景亮張薦等衆對極言杞罪四海共棄今復用之忠臣寒膺良士痛骨必且階禍其言懇到帝語宰相曰授杞小州可乎李勉曰陛下與大州亦無難如四方之謗何乃詔爲澧州別駕後散騎常侍李泌見帝曰高等論杞事朕可之矣泌頓首賀曰比日外謂陛下漢之桓靈今乃知堯舜主也帝喜杞遂死澧州初尙父郭子儀病甚百官造省不屏姬侍及杞至則屏之隱几而待家人怪問其故子儀曰彼外廨內險左右見必笑使後得權吾族無類矣

崔胤字垂休宰相慎由子也擢進士第累遷中書舍人御史中丞喜陰計附離權彊其外自處若簡重而中險譎可畏崔昭緯屢薦之由戶部侍郎同中書門下平章事方王珙兄弟爭河中以胤爲節度使不得赴半歲復以中書侍郎留輔政及昭緯以罪誅罷爲武安節度使陸辰當國時王室不競南北司各樹黨結藩鎮內相陵脅胤素厚朱全忠委心結之全忠爲言胤有功不宜處外故還相而逐辰光化初昭宗至自華務安反側而胤陰爲全忠地俾擅兵四討帝醜其行罷爲吏部尙書復倚宸以相會清海無帥因拜清海節度使始昭緯死皆王搏等白發其姦胤坐是賜罷內銜憾既與搏同宰相胤議悉去中官搏不助請徐圖之及是不欲外除卽漏其語於全忠令露劾搏交敕使共危國罪當誅胤次湖南召還守司空門下侍郎平章事兼領度支鹽鐵戶部使而賜搏死并誅中尉宋道弼景務脩繇是權震天下雖宦官亦

累息至是四拜宰相世謂崔四入劉季述幽帝東內奉德王監國長全忠彊雖深怨胤不敢殺止罷政事胤趣全忠以師西問所以幽帝狀全忠乃使張存敬攻河中掠晉絳神策軍大將孫德昭常忿關尹廢辱天子胤令判官石戩與游乘間伺察德昭飲酣必泣胤揣得其情乃使戩說曰自季述廢天子天下之人未嘗忘武夫義臣搏手憤惋今謀反者特季述仲先耳它人劫於威無與也君能乘此誅二豎復天子取功名乎卽不早計將有先之者德昭感寤乃告以胤謀德昭許諾胤斬帶爲誓俄而季述仲先誅以功進司徒不就復輔政并還使領帝德之延見或不名以字呼之寵遇無比天復元年全忠已取河中進逼同華中尉韓全誨以胤與全忠善恐導之翦除君側乃白罷政事未及免倉卒挾帝幸鳳翔胤怨帝見廢不肯從召全忠以兵迎天子令太子太師盧渥率羣臣迎全忠始全忠至華遣幕府裴鑄奏事帝不得已聽來朝至是胤爲之謀乃以兵迫行在帝下詔趣還鎮因詔遣渥等俱西全忠上表具言向書詔皆出宰相乃今知非陛下意爲所誣誤師業入關請得與李茂貞約釋憾以迎乘輿茂貞劾奏胤畜死士用度支使權利令親信陳班與京兆府募兵保所居坊天子出次遣使者五輩往召安臥不動一表表陳謝時帝見全忠表亦大恚因下詔顯責之以工部尙書罷知政事胤出居華州初天復後宦官尤屈事胤事無不咨每議政禁中至繼以燭請盡誅中官以宮人掌內司事韓全誨等密知之共於帝前求哀乃詔胤後當密

封無口陳中官益恐滋欲得其謀乃求知書美人宗柔等內左右以刺陰事胤計稍露宦者或相誼無憐不自安劫幸之謀固矣居華時爲全忠數畫醜計全忠引兵還屯河中胤迎謁渭橋奉觴爲全忠壽自歌以醢酒會茂貞殺全誨等與全忠約和帝急召之墨詔者四朱札三皆辭疾及帝出鳳翔幸全忠軍乃迎謁於道復拜平章事進位司徒兼判六軍諸衛事詔徙家舍右軍賜帷帳器用十車胤遂奏高祖太宗無內侍典軍天寶後宦人寔盛德宗分羽林衛爲左右神策軍令宦者主之以二千人爲率其後參掌機密至內務百司悉歸中人共相彌縫爲不法朝廷微弱禍始于此請罷左右神策內諸司使諸道監軍於是中外宦官悉誅天子傳導詔命祇用宮人寵顏等帝之在鳳翔以盧光啟蘇檢爲相胤皆逐殺之分斥從幸近臣陸展等三十餘人惟裴贄孤立可制留與偕秉政帝動靜一決於胤無敢言者胤議以皇子爲帥全忠副之示褒崇其功全忠內利輝王冲幼故胤藉以請帝曰濮王長若何還禁中召翰林學士韓偓以謀僞陰佐胤卒不能卻全忠還東到長樂羣臣班辭胤獨至霸橋置酒乙夜乃還帝卽召問全忠安否與飲命宮人爲舞劍曲戊夜乃出賜二宮人固讓乃許是時天子孤危威令盡去胤之劫持類如此進侍中魏國公自鳳翔還揣全忠將篡顧己宰相恐一日及禍欲握兵自固謬謂全忠曰京師迫茂貞不可無備鎮募軍以守今左右龍武羽林神策番幸之餘無見兵請軍置四步將將二百五十人一騎將將百

人使番休遞侍以京兆尹鄭元規爲六軍諸衛副使陳班爲威遠軍使募卒於市全忠知其意陽相然許胤乃毀浮圖取銅鐵爲兵仗全忠陰令汴人數百應募以其子友倫入宿衛會爲毬戲墜馬死全忠疑胤陰計大怒時傳胤將挾帝幸荆襄而全忠方謀脅乘輿都洛懼其異議密表胤專權亂國請誅之卽罷爲太子少傅全忠令其子友諒以兵圍開化坊第殺胤汴士皆突出市人爭投瓦礫擊其尸年五十一元規陳班等皆死實天復四年正月胤罷凡三日死死十日全忠脅帝遷洛發長安居人悉東徹屋木自渭循河下老幼係路啼號不絕皆大罵曰國賊崔胤導全忠賣社稷使我及此先是全忠雖據河南顧疆諸侯相持未敢決移國及胤間內隙與相結得梯其禍取朝權以成疆大終亡天下胤身屠宗滅世言慎由晚無子遇異浮屠以術求乃生胤字緇郎及爲相其季父安潛喏曰吾父兄刻苦以持門戶終爲緇郎壞之崔昭緯字蘊曜其先清河人及進士第至昭宗時任寢顯以戶部侍郎同中書門下平章事居位凡八年累進尙書右僕射性險刻密結中人外連疆諸侯內制天子以固其權令族人鋌事王行瑜邠靈幕府每它宰相建議或詔令有不便於己必使鋌密告行瑜使上書訾訐己則陰阿助之方是時帝室微人主若養序然始帝委杜讓能調兵食以討鳳翔昭緯方倚李茂貞行瑜爲重陰得其計則走告之激使稱兵向闕遂殺讓能後又導三鎮兵殺韋昭度等帝性剛明不堪忍會誅行瑜乃罷昭緯爲右僕射復請朱全忠

薦已又厚賂諸王爲所奏貶梧州司馬下詔條其五罪賜死行次江陵使者至斬之鋌亦誅

柳璨字炤之公綽族孫也爲人鄙野其家不以諸柳齒少孤貧好學晝採薪給費夜然葉照書彊記多所通涉譏訶劉子玄史通著析微時或稱之顏薨判史館引爲直學士由是益知名遷左拾遺昭宗好文待李礪最厚礪死內常求似礪者或薦璨才高試文帝稱善擢翰林學士崔胤死昭宗密許礪宰相外無知者日暮自禁中出騶士傳呼宰相人皆大驚明日帝謂學士承旨張文蔚曰礪材可用今擢爲相應授何官對曰用賢不計資帝曰諫議大夫可乎曰唯唯遂以諫議大夫同中書門下平章事起布衣至是不四歲其暴貴近世所未有裴樞獨孤損崔遠皆宿望舊臣與同位頗輕之礪內以爲怨朱全忠圖篡殺宿衛士皆汴人礪一厚結之與蔣玄暉張延範尤相得既挾全忠故朝權皆歸之進中書侍郎判戶部封河東縣男天祐二年長星出太微文昌間占者曰君臣皆不利宜多殺以塞天變玄暉延範乃與礪謀殺大臣宿有望者礪手疏所仇媚若獨孤損等二十餘人皆誅死天下以爲冤全忠聞之不善也其後急於九錫宣徽北院使王殷者搆礪等言其有貳故禮不至玄暉懼自往辨解全忠怒罵曰爾與柳璨輩沮我不由九錫作天子不得邪礪懼卽脅哀帝曰人望歸元師矣陛下宜揖讓以授終礪請自行進拜司空爲冊禮使即日進道及玄暉死而全忠志礪背已貶登州刺史俄除名爲民流崖州尋斬之臨刑悔叱曰負國賊

柳璨死宜矣弟瑀瑒皆榜死

玄暉者少賤不得其系著事朱全忠爲腹心昭宗東遷玄暉爲樞密使帝駐陝州術家言星緯不常且有變宜須冬幸洛帝度全忠必篡命衛官高瓌持帛詔賜王建告以脅遷且言全忠以兵二萬治洛陽將盡去我左右君宜與茂貞克用行密同盟傳檄襄魏幽鎮使各以軍迎我還京師又詔全忠后方媛須十月乃東全忠知帝有謀遣寇彥卿趣迫天子不得已遂行抵穀水全忠盡殺左右黃門內園小兒五百人悉以汴兵爲衛初全忠至鳳翔侵邠州節度使楊崇本降質其家崇本妻美全忠與亂故崇本怒至是遣使者會克用茂貞南告趙匡疑及建同舉兵問劫遷狀全忠大懼帝自出關畏不測常默坐流涕玄暉與張延範內訌必以告全忠全忠恨帝無傳禪意乃謀殺以絕人望因令其屬李振諭玄暉與龍武統軍朱友恭氏叔琮夜選勇士百人叩行在言有急奏請見帝宮門開門留十士以守至椒蘭院中夫人裴貞一敗關殺之乃趨殿下玄暉曰上安在昭儀季漸榮曰院使母傷宅家盜殺我士持劍入帝聞遽單衣走環柱遂弑之漸榮以身蔽帝亦死復執后后求哀玄暉以全忠所殺者帝也乃釋后明日宰相請對日晏不出玄暉矯遺詔言帝夜與昭儀博爲貞一漸榮所弑出二人首全忠自河中來朝振曰晉文帝弑高貴鄉公歸罪成濟今宜誅友恭等解天下謗全忠趨西內臨對嗣天子自言弑逆非本謀皆友恭等罪因

泣下請討罪人是時洛城旱米斗直錢六百軍有掠糶者都人怨故因以悅衆執友恭叔琮斬之全忠邀九錫玄暉自持詔趨汴言之還洛不淹日全忠矯詔收付有司車裂之貶爲兇逆百姓焚尸都門外廷範者以優人爲全忠所愛扈東遷爲御營使進金吾衛將軍河南尹全忠欲以爲太常卿宰相裴樞持不可繇是樞罷去柳璨希旨下詔責中外不得妄言流品清濁卒用廷範太常卿會天子將郊以爲脩樂縣使又與蘇楷等駁昭宗諡全忠恚九錫緩也王殷譖其與璨等祀天祚延唐祚及玄暉死璨誅卽貶廷範萊州司戶參軍轅于河南市叔琮亦汴州人中和未隸感化軍以騎士奮性沈壯有膽力從全忠擊黃巢陳許間名右諸將得爲親校與時浦朱宣戰以多累表檢校尙書右僕射爲宿州刺史攻趙匡凝於襄陽不克又與李克用戰洹水遷曹州刺史天復初拔澤路擊太原授晉慈觀察使全忠屯鳳翔克用襲絳州攻臨汾叔琮以二壯士類沙陀者牧馬于原與克用軍偕行伺隙各禽一虜還克用大驚疑有伏遂退屯蒲會朱友靈以兵三萬來援叔琮曰賊遁矣無以立功乃潛師夜獵游騎殺數百進破其壘俘斬萬級收馬三千遂長驅取汾州轉戰薄太原而還遷檢校司空再進爲保大軍節度使全忠欲遷帝於洛表爲右龍武統軍與弒帝故全忠請貶白州司戶參軍斬之叔琮將死呼曰朱温賣我以取容天下神理謂何友恭者本李彥威也壽州人客汴州殖財任俠全忠愛而子畜之領長劍都積功表爲檢校尙書左僕射戴靈

中授汝州刺史檢校司空楊行密侵鄂州友恭將兵萬餘援杜洪至江州還攻黃州入之獲行密將俘斬萬計又襲安州殺守將遷潁州刺史感化軍節度留後帝東遷爲左龍武統軍貶崖州司戶參軍臨刑曰温殺我當亦滅族又語張廷範曰公行及此云贊曰木將壞蟲實生之國將亡妖實產之故三宰嘯凶叱奪辰林甫將蕃黃屋奔鬼質敗謀興元感崔柳例持李宗覆嗚呼有國家者可不戒哉

唐書卷二百二十三下

唐書卷二百二十三下考證

盧杞傳流鄆費州○舊書作驩州

崔胤傳進司徒○舊書作司空

盧渥○舊書作盧知猷

唐書卷二百二十三考證

唐書卷二百二十四上

宋 端 明 殿 學 士 宋 祁 撰

列傳第一百四十九上

叛臣

僕固懷恩鐵勒部人貞觀二十年鐵勒九姓大首領率眾降分置瀚海燕然金微幽陵等九都督府別爲
 蕃州以僕骨歌濫拔延爲右武衛大將軍金微都督訛爲僕固民生乙李啜乙李啜生懷恩世襲都督懷
 恩善戰鬪膽識戎情部分謹嚴安祿山反從朔方節度使郭子儀討賊雲中破之敗薛忠義于背度山殺
 七千騎禽忠義子下馬邑進會李光弼戰常山趙郡沙河嘉山走史思明肅宗卽位與子儀赴靈武時同
 羅部落叛祿山北掠朔方子儀率懷恩迎擊懷恩子玢戰敗降虜已而自拔歸懷恩怒叱斬之將士股栗
 皆殊死戰遂破其眾收馬橐它器械甚眾帝又詔與燉煌王承采使回紇請師回紇聽命至德二載從子
 儀下馮翊河東走賊將崔乾祐襲潼關破之賊將安守忠李歸仁苦戰二日王師敗績懷恩至渭水無舟
 抱馬鬣以逸收散卒還河東子儀赴鳳翔歸仁以勁兵邀戰三原子儀使懷恩與王升陳回光渾釋之李
 國貞五將軍伏白渠下賊至遇伏敗而走又戰清渠不利引還時回紇使葉護帝得以四千騎濟師南蠻

大食等兵亦踵至帝乃詔廣平王爲元師使懷恩統回紇兵從王戰香積寺北賊以一軍伏營左懷恩馳掩之賊斬無遺者賊氣沮既合戰以回紇夾攻賊戰酣脫甲援矛直擣陣殺十餘人衆驚靡亦會李嗣業麴嗣元力賊大崩敗會日暮懷恩見王曰賊必棄城走願假壯騎二百縛安守忠李歸仁等致麾下王曰將軍戰疲且休矣追明與將軍圖之對曰守忠等皆天下驍賊驟勝而敗此天與我也奈何縱之使復得衆必爲我患雖悔無逮王不從固請通夕四五反遲明謀者至守忠等果遁去又從王破賊於新店以復兩京有殊功詔加開府儀同三司鴻臚卿封豐國公賜封二百戶從郭子儀破安太清下懷衛二州攻相州戰愁思岡常爲先鋒勇冠軍中乾元二年拜朔方行營節度使進封太監郡王懷恩爲人雄重寡言應對舒緩剛決犯上始居偏裨意有不合雖主將必折詬其麾下皆蕃漢勁卒恃功多不法子儀政寬能優容之及李光弼代子儀懷恩仍爲副光弼守河陽攻懷州降安太清又子儀亦善鬪以儀同三司將兵每深入多殺賊憚其勇號猛將太清妻有色瑒劫致于幕光弼命歸之不聽以卒環守復馳騎趨之射殺七人奪妻還太清懷恩怒曰公乃爲賊殺官卒邪光弼持法嚴少假貸初會軍汜水朔方將張用濟後至斬下懷恩心憚光弼自用濟誅常邑邑不樂及光弼與史思明戰邙山不用令以覆王師帝思其功召入爲工部尚書寵以殊禮代宗立拜隴右節度使未行改朔方行營節度以副子儀初肅宗以靈國公主

下嫁毗伽闕可汗又爲少子請婚故以懷恩女妻之少子立號登里可汗而懷恩女爲可敦寶應元年帝召兵於回紇而登里可汗已爲史朝義所誘引衆十萬盜塞關中大震帝遣殿中監藥子昂勞之可汗因請見懷恩及其母有詔報可懷恩避嫌不往帝賜鐵券手詔因遣乃行與可汗會太原可汗大悅遂請和助討朝義卽引兵屯陝州待師期於是雍王以元帥爲中軍拜懷恩同中書門下平章事爲之副乃與左殺爲先鋒時諸節度皆以兵會次黃水賊壁自固懷恩陣西原多張旗旛使突騎與回紇稍南出緣賊左舉旗爲應破賊壁死者數萬朝義擁精騎十萬來援埋根決戰短兵接殺獲相當魚朝恩令射生五百攢矢注射賊多死而陣堅不可犯馬磷怒單騎援旗直進奪兩盾賊辟易大軍乘以入衆譟不止朝義敗斬首萬六千級禽四千餘人降者三萬轉戰石榴園老子祠賊再敗自相奔蹂死填尚書谷幾滿朝義輕騎走懷恩進收東都河陽封府庫無所私釋賊所署許叔冀王侁等衆皆按堵留回紇屯河陽使瑒及北廷兵馬將高輔成以萬騎逐北懷恩常壓賊而次至鄭州再戰再捷賊帥張獻誠以汴州降下滑州朝義至衛州與其黨田承嗣李進超李達盧合有衆四萬據河以戰場濟師登岸薄之賊黨奔潰進次昌樂朝義逸僞帥達盧降薛嵩李寶臣舉相衛深定等九州獻款朝義至貝州得其黨薛忠義引衆三萬拒瑒於臨清賊氣盛瑒勒兵挫其鋒令高彥崇渾日進李光逸設三伏以待賊半度伏發擊之朝義走會回紇以

輕騎至瑒卷甲馳之大戰下博賊背水陣師奔擊賊大崩積尸蔽流而下朝義退守莫州於是都知兵馬使薛兼訓郝廷玉竟鄆節度使辛雲京會師城下朝義與田承嗣數挑戰不勝臨陣斬僞黨敬榮朝義懼率殘衆奔幽州王師追躡朝義走平州自經死河北平懷恩與諸將皆罷兵以功遷尙書左僕射兼中書令河北副元帥朔方節度使加封戶四百初帝有詔但取朝義其它一切赦之故薛嵩張忠志李懷仙田承嗣見懷恩皆叩頭願效力行伍懷恩自見功高且賊平則勢輕不能固寵乃悉請裂河北分大鎮以授之潛結其心以爲助嵩等卒據以爲患云未幾加太子少師增戶五百第一區與一子五品官詔護回紇歸國道太原辛雲京內忌懷恩又以其與回紇親疑可汗見襲閉關不敢犒軍懷恩既父子新立功舉河朔若拾遺名出諸將遠甚而爲雲京所拒大怒表上其狀頓軍汾州使裨將李光逸以兵守祁李懷光據晉州張如岳據沁州高暉等十餘人自從會監軍駱奉先自雲京所歸雲京已厚結其權因言懷恩與可汗約反狀明白奉先過懷恩升堂拜母母讓曰若與我兒約兄弟今何自親雲京然前事勿論自今宜如初酒酣懷恩舞奉先厚納以幣懷恩未及酬奉先亟辭去懷恩卽遣左右置其馬奉先疑圖己乘夜遁歸懷恩驚追與其馬奉先還具奏懷恩反狀懷恩亦請誅雲京奉先詔兩解之懷恩之過駱李抱玉贈以幣馬懷恩答之俄抱玉表懷恩私有所結廣德初進拜太保與一子三品一子四品官增封戶五百瑒與一

子五品官封戶百仍賜鐵券以名藏太廟畫象凌烟閣又以瑒檢校兵部尙書朔方行營節度使然懷恩快快又性彊固不肯爲讒毀屈無以自解乃上書陳情曰臣世本夷人少蒙上皇驅策祿山之亂臣以偏裨決死靜難仗天威神克滅彊胡思明繼逆先帝委臣以兵誓雪國讐攻城野戰身先士卒兄弟死於陣子姓沒於軍九族之內十不一在而存者創痍滿身陛下龍潛時親總師旅臣事麾下悉臣之愚是時數以微功已爲李輔國讒間幾至毀家陛下卽位知臣負謗遂開獨見之明杜衆多之口拔臣於汧隴任臣以朔方游魂反幹朽骨再肉前日回紇入塞士人未曉京輔震驚陛下詔臣至太原勞問許臣一切處置因得與可汗計議分道用兵收復東都掃蕩燕薊時可汗在洛爲魚朝恩猜阻已失歡心及臣護送回紇雲京閉城不出潛使瓌竊蕃夷怨怒彌縫百端乃得返國臣還汾州休息士馬雲京亦不使一介相聞畏臣劾奏故構爲飛謗以起異端陛下不垂明察欲使忠直之臣陷讒邪之黨臣所爲拊心泣血者也然臣之罪有六無所逃死往者同羅背逆以騷河曲兵連不解臣不顧老母從先帝於行在募兵討賊同羅奔殄是臣不忠於國罪一也斬子玢以令士衆捨天性之愛是臣不忠於國罪二也二女遠嫁爲國和親合從殄滅是臣不忠於國罪三也又與子瑒躬履行陣志窺邦家是臣不忠於國罪四也河北新附諸鎮皆握疆兵臣之撫綏反側時定是臣不忠於國罪五也協和回紇戡定中原二陵復土使陛下勤孝兩全是

臣不忠於國罪六也又言來瑱之誅不暴其罪天下爲疑四方奏請陛下皆云與驃騎議之可否不出宰相詞言慢狼帝一不爲憐且欲其悔過故推心待之詔宰相裴遵慶臨諭詔旨因察其去就遵慶至懷恩抱其足泣且訴遵慶道帝所以不疑卽勸入朝懷恩許訥副將范志誠諫以爲嫌隙成矣奈何入不測之朝獨不見來瑒李光弼乎二臣功高不賞瑒已及誅懷恩乃止欲使一子入宿衛志誠固止御史大夫王翊使回紇還懷恩慮洩其交通狀因留不遣卽使瑒攻雲京雲京敗進攻榆次初帝幸陝顏真卿請奉詔召懷恩至是帝使往辭曰臣往請行時也今無及矣帝問故對曰頃陛下避狄于陝臣見懷恩責以春秋義不奔問官守故懷恩來朝以助討賊則其辭順今陛下卽宮京邑懷恩進不勤王退不釋衆其辭曲必不來矣然則奈何曰今言懷恩反者獨辛雲京李抱玉駱奉先魚朝恩四人耳自餘盛言其枉然懷恩將士皆郭子儀舊部曲陛下若以子儀代之喻以逆順必相率而歸從之子儀至河中瑒攻榆次未拔追兵于祁責其緩鞭之衆怒是夕偏將焦暉白玉等斬其首獻闕下懷恩聞以告母母曰我戒汝勿反國家訓汝不淺今衆變禍且及我奈何懷恩再拜出母提刀逐之曰吾爲國殺此賊取其心以謝軍中懷恩走乃與部曲三百北渡河走靈武稍稍引兵命軍復振帝念舊勳不加罪詔輦其母歸京師厚卹之以壽終又下詔拜懷恩太保兼中書令大監郡王罷餘官懷恩固惡不能改遂誘吐蕃十萬入塞豐州守將戰死進

掠涇州祭來瑒墓渡涇水邠靈節度使白孝德禦之覆其陣懷恩泣曰曩皆爲我子反爲人致死於我入使奉天子儀拒退之永泰元年帝集天下兵防秋懷恩誘合諸蕃號二十萬入寇吐蕃自北道逼醴泉擄奉天任數鄭廷郝德自東道寇奉先以窺同州羌渾奴刺自西道略盤屋趣鳳翔京師震駭詔子儀屯涇陽渾日進白元光屯奉天李光進屯雲陽馬璘郝廷玉屯便橋董秦屯東渭橋駱奉先李日越屯盤屋李抱玉屯鳳翔周智光屯同州杜冕屯坊州帝御六軍屯苑中下詔親征懷恩至鳴沙病甚還死靈武部曲焚其尸以葬部將張韶徐瓚玉不能定其軍皆前死范志誠統衆寇涇陽時諸屯堅壁大雨溪城潰潰賊不得進吐蕃旣持久又與回紇爭長更相疑莫適先進因焚廬舍驅男女數萬去周智光邀戰澄城破之收馬牛軍資萬計回紇乃詣子儀降請擊吐蕃自效子儀分兵隨之破其衆於涇州任敷走羌渾詣李抱玉降始懷恩立功門內死王事者四十六人及拒命士不弛甲凡三年帝隱忍數下詔未嘗聲其反及死爲之惻然曰懷恩不反爲左右所誤耳俄而從子名臣以干騎降大厯四年冊懷恩幼女爲崇徽公主嫁回紇云

周智光少賤失其先系以騎射從軍起行間爲裨將魚朝恩鎮陝州與相昵款數稱薦之累遷同華二州節度使永泰元年吐蕃回紇党項羌渾奴刺衆十餘萬寇奉天智光邀戰澄城破之獲駝馬軍資萬計逐

北至鄜州素與杜冕仇嫌時冕屯坊州家在鄜智光入殺刺史張麟害冕宗屬八十人火民三千舍而去朝廷召懼不赴更詔冕使梁州避讐冀其來偃然不聽命聚不逞數萬恣剽掠以甘其欲結固之殺陝州監軍張志斌及前虢州刺史龐充初志斌自陝入奏智光慢不爲禮志斌責之怒曰僕固懷恩豈反者邪皆鼠輩弄威福趣之禍也我不反今爲爾反遂叱斬志斌饗帳下時崔圓自淮南納方物百萬盜韻其半天下貢奉輸漕劫留之士沿調當西者懼何詰問道走同者遣部將邀捕斬之代宗未暴其罪命中使余元仙持詔拜尙書左僕射既受詔志語曰吾有大功上不與平章事且同華地狹不足申脚若加陝虢商鄜坊五州差可因言諸子皆彎弓二百斤有萬人敵挾天子令諸侯非智光尙誰可卽歷詆大臣元仙震汗徐遣百繚遺之自立生祠俾其下禮賽大厯二年帝詔郭子儀密圖之同華路閉詔書不能通乃召子儀壻趙縱受口詔書帛內蜜丸遺家童走間道傳詔子儀得詔聲言討之未行其衆大攜部將李漢惠自同州降子儀乃貶智光澧州刺史聽百人隨身貸將吏一切不問尋爲帳下斬其首并斬子元耀元幹來獻詔梟首皇城南街判官邵賁別將蔣羅漢並伏誅敕有司具儀告太清宮太廟七陵先是淮西李忠臣入朝次潼關聞智光反率兵討之會敗忠臣因入華大掠自赤水至潼關畜產財物皆盡官吏至衣紙自蔽累日不食者

梁崇義京兆長安人以槩量業於市力能舒鉤後爲羽林射生事來瑱沈默寡言瑱自襄陽朝京師分諸將戍福昌南陽瑱誅戍者潰崇義自南陽勒衆還襄州與李昭薛南陽相讓爲長衆曰非梁卿莫可遂總其軍殺昭及南陽脅制衆心代宗因卽拜節度使舉七州兵二萬與田承嗣李正己薛嵩李寶臣相輔車根牙槩結然獨以地褊兵少法令最治折節遇士以自振襄漢間人識教義親厚數諷入朝答曰來公有大功畏關豎議逡巡辭召至代宗立不待駕而朝卽見族吾輩盈矣若何欲見上乎建中元年李希烈請討之崇義懼整飭軍旅男子郭昔上變事德宗欲示以信流昔遠方詔金部員外郎李舟諭旨初劉文喜之難舟奉詔入涇州俄而帳下斬文喜以聞四方傳舟能覆軍殺將反側者皆惡之舟至以入朝勸崇義崇義不悅明年遣使尉撫諸道舟復如崇義所遂不肯內請易它使更命給事中盧翰往崇義益不安跋扈甚諫者多死朝廷以不疑示天下乃加同中書門下平章事妻及子悉封賞賜鐵券擢其將藺臬爲鄧州刺史遣御史張著以手詔召崇義崇義使卒持滿乃受命臬奉詔不敢發詣崇義自言崇義對著號哭遂拒詔帝命李希烈率諸道兵進討崇義先攻江陵欲通黔嶺敗於四望而還殺希烈臨漢屯兵千餘希烈怒引兵循漢而上崇義使翟崇暉杜少誠戰蠻水折北至涑口大敗二將降希烈寵之使部降兵徇襄陽約百姓按堵崇義閉壁守者斬闕出不可止乃與妻赴井死傳首京師希烈誅其親族及軍從臨漢役

者二千人崇義孫叔明養於李納後從劉悟爲昭義將從諫死遣進旌節有詔誅之

李懷光渤海靺鞨人本姓茹父常徙幽州爲朔方部將以戰多賜姓名嘉慶懷光在軍積勞至開府儀同三司爲都虞候勇鷙敢誅殺雖親屬犯法無所回貸節度使郭子儀仁厚不親事以紀綱委懷光軍中畏之會母喪起兼邠寧慶都將德宗罷子儀副元帥以所部兵分諸將故懷光檢校刑部尚書爲靈慶晉絳慈隰等州節度使引衆城長武據原首臨涇水以扼吐蕃空道自是不敢南侵建中初楊炎欲城原州使懷光兼帥涇原遂其功原州宿將史抗溫儒雅等故子儀麾下嘗在懷光右及處其下意鬱鬱懷光因罪誅之由是涇軍迎畏劉文喜者因衆懼遂叛詔與朱泚討平之加檢校太子少師明年徙朔方節度使實封戶四百仍領邠寧時馬燧李抱真討田悅未克詔懷光以朔方兵萬五千并力懷光至魏未及營與朱滔等戰連篋山爲賊所敗悅因決水灌軍燧等退屯魏縣尋進同中書門下平章事益戶二百與滔等相持久不戰帝狩奉天懷光率所部奔命方雨淖奮厲軍士倍道進自蒲津絕河敗泚軍於醴泉將抵奉天前遣裨將張韶以蠟韜表隨賊攻城叩壘呼曰我朔方使也繼而上比登身被數十矢時帝被圍急聞之喜卽持詔大號城上人心乃安又敗賊於魯店泚解圍去進加副元帥中書令懷光爲人疏而復誦言宰相謀議乖刺度支賦斂重京兆尹刻薄軍食天下之亂皆由此吾見上且請誅之或以告王翊等計

懷光有大功上且訪以得失使其言入豈不殆哉遂告盧杞卽說帝曰懷光兵威已振逆賊破膽若席勝可一舉滅賊今入朝則必宴勞留連賊得從容完備卒難圖也帝不得其情因然之乃敕懷光屯便橋營諸將進討懷光自以徑千里赴難爲姦臣根隔不得朝頗志悵去屯咸陽明日李晟會陳濤斜壁壘未具賊大至晟說懷光曰賊保宮苑攻之良難今敢離窟穴與公薄戰此天以賊賜公也懷光曰吾馬未秣士未飯可遽戰哉姑養吾勇以待之晟不得已閉壁不出懷光數暴杞等罪帝爲貶杞與趙贊白志貞又劾奏中人翟文秀亦殺之以尉懷光然益自疑堅壁八旬不出戰屢詔使進軍以伺釁爲解陰連朱泚初崔漢衡使吐蕃求助兵尙結贊曰吾法進軍以本兵大臣爲信今制書不署懷光未敢前帝乃命翰林學士陸贄詣懷光議事懷光陳三不可且言吐蕃舍人馬重英陷長安贊普責其不焚熱今其來必肆宿志一不可彼云引兵五萬旣用其人則同漢士儻邀我厚賞何以致之二不可虜人雖來義不先用勒兵自固以觀成敗王師勝則分功敗則圖變狡詐多端不可信三不可卒不肯署又嫚罵贄曰爾何能興元元年詔加太尉賜鐵券懷光赫然怒曰凡疑人臣反則賜券今授懷光是使反也抵于地時部將韓游瓌將兵衛奉天懷光約令爲變游瓌以聞數日又密書趣之門者捕送又遣將趙升鸞謀於奉天升鸞告渾瑊曰懷光遣達奚承俊火乾陵使我爲內應以脅乘輿瑊白發其姦請帝決幸梁州帝令瑊戒嚴未畢帝自

西門出詔戴休顏守奉天懷光遣將孟廷寶惠靜壽孫福率輕騎趨南山糧料使張增遇之三人計曰吾屬以叛聞不如緩軍彼怒不過不吾將耳使增給衆曰由此東吾有見糧可食也廷寶等引而東縱卒大掠而百官遂入駱谷追帝不及還白懷光懷光怒悉罷其兵懷光乃奪李建徽陽惠元等軍屯好畤然其下稍稍攜貳此始憚之至是欲遂臣懷光懷光怒告絕益不安乃引兵掠涇陽三原富平遂如河中留張昕守咸陽而孟涉段威勇擁兵降李晟韓游瓌殺昕以邠州歸戴休顏自奉天令於軍曰懷光反乃城守有詔以懷光爲太子太保許其麾下擇功高者一人統其兵不奉詔懷光至河中取同絳二州按兵觀望京無平命給事中孔巢父中人啖守盈召之皆爲懷元帳下所害於是繕兵嚴守帝乃遣渾瑊討之度支欲罷其軍歲中稟賜帝曰朔方軍累有功豈以懷光死命而衆不被恩邪詔所司別貯緡錢須事定乃給瑊破同州屯軍不得進數爲懷光所劾帝以河東節度使馬燧威名白著乃拜副元帥與瑊及鎮國駱元光邠寧韓游瓌鄜坊唐朝臣會兵進討燧拔絳州諸軍遂圍河中貞元元年八月朔方部將牛勣俊懷光傳首以獻年五十七帝念其功詔許一子嗣賜莊第各一區聽以禮葬妻王徙澧州初懷光死其子瑋盡殺其弟乃死故懷光無後五年詔曰懷舊念功仁之大也興滅繼絕義之至也昔蔡叔圮族周封其子韓信于紀漢爵其孥侯君集不率太宗存其祀考先王之道烈祖之訓皆以刑佐德俾人嚮方曩者盜臣

竊發朕狩近郊懷光夙駕千里奔命行在假雷霆之威破虎狼之衆守節靡終濟構禍胎大戮所加自貽伊戚孤魂無歸懷之怛然宜以外孫燕賜姓李名曰承緒以左衛率府胄曹參軍繼懷光後仍賜錢百萬置田墓側以備祭享還妻王使就養云

陳少游博州博平人幼習老子莊周書爲崇玄生諸儒推爲都講有媚者欲對廣衆切問以屈少游及升坐音吐清辯據引淹該問窮而對有餘大學士陳希烈高其能旣擢第補南平令治有聲累遷侍御史回紇糧料使加檢校職方員外郎充使檢校郎官自少游始僕固懷恩表署河北副元帥判官遷晉鄭二州刺史少游長權變所至一切幹濟賄謝權幸以是數遷李抱玉表澤潞副使爲陳鄭留後承泰中復奏爲隴右行軍司馬擢桂管觀察使少游不樂遠去規徙近鎮時宦官董秀有寵掌樞近少游乃宿其里候歸沐入謁因鄙語諂謂秀曰七郎親屬幾何月費幾何秀謝曰族甚大歲用常過百萬少游曰審如是奉入不足爲數日費當數外營乃辦耳吾雖不才請獨取濟歲輸錢五十萬今具其半請先入之秀大喜與厚相結少游因泣曰領南瘴癘恐不得生還見顏色秀遽曰公美才不當遠出請少待時少游已納賂元載子仲武於是內外更薦之改宣歙池觀察使大厯五年徙浙東封潁川縣子遷淮南節度使喜譎數行小惠羣吏任職三總藩皆天下富饒處以是斂求貿易無虛日積財寶巨億萬初結元載賂金帛歲無慮十

萬縉又事宦官賂奉先劉清潭吳承倩及秀故能久其任後載以過見疑少游亦疏之載子伯和謫揚州少游陽善之陰奏其罪代宗以爲忠建中初朝廷經費不充始請本道稅錢千增二百鹽斗加百錢度支因請諸道並增焉李納拒命少游出師收徐海等州俄棄之退屯盱眙累進檢校尚書左僕射賜封戶三百加同中書門下平章事時宰相關播盧杞與少游有雅故故驟兼台司德宗幸奉天度支汴東兩稅使包佶寓揚州所儲財賦八百萬縉將輸京師少游意朱泚勢盛不遠平欲脅取其財使判官崔頴就佶索文簿貸二百萬縉佶以非敕命拒之頴怒曰君善得爲劉長卿不爾爲崔衆矣長卿常任租庸使爲吳仲孺所囚崔衆以倨李光弼被殺故頴以爲言佶謁少游欲諫止不得語卽遣去於是財用悉爲少游所掠佶奔白沙少游遣幕中房孺復召之佶驚走渡江伏妻子案牘中以免佶有禦邊兵三千令高越元甫將焉少游奪之能隨佶者至上元復爲韓滉所留佶但諸史如江鄂州以表內蠟丸以聞會少游使至帝詰其事辭以不知時禍難煽結帝未能制乃曰少游國守臣取佶之財防它盜耳庸何傷遠近聞之咸稱帝得其機云少游聞之果自安不疑李希烈陷汴聲言襲江淮少游懼遣參謀溫述送款曰豪壽舒廬旣鞞刃卷鎧惟君命又使巡官趙詵如鄆州厚結李納希烈僭號遣將楊豐齎僞赦令送少游壽州刺史張建封遷得之斬豐以僞赦送行在會佶入朝具言少游脅財賦狀少游慙上表言所取以贖軍興請償之而

州府殘破不能償乃與腹心吏設法重稅民皆苦之劉洽取汴州得希烈僞起居注書某月日陳少游上表歸順少游聞羞悸發病死年六十一贈太尉

贊曰懷恩與賊百戰閔宗死事至四十六人遂汎掃燕趙無餘埃功高威重不能防患凶德根于心弗得其所輒發果於犯上惜哉其母拔刀逐賊烈婦人也懷光提萬衆振天子於難一爲讒人所沮忿戾不自還身首殊分然讒人亦可疾矣所謂交亂四國者也

李錡淄川王孝同五世孫以父國貞蔭調鳳翔府參軍貞元初遷至宗正少卿嘗與卿李幹爭議錡以直不坐德宗兩置之自雅王傳出爲杭州二州刺史方李齊運用事錡以賂結其歡居三歲遷潤州刺史浙西觀察諸道鹽鐵轉運使多積奇寶歲時奉獻德宗昵之錡因恃恩驕橫天下推酒漕運錡得專之故朝廷用事臣錡以利交餘皆乾沒于私國計日耗浙西布衣崔善貞上書闕下暴其罪帝械以賜錡錡豫浚大坎至則并械壅坎中聞者切齒錡得志無所憚圖久安計乃益募兵選善射者爲一屯號挽硬隨身以胡奚雜類虬須者爲一將號蕃落健兒皆錡腹心粟給十倍使號錡爲假父故樂爲其用帝於是復鎮海軍以錡爲節度使罷領鹽鐵轉運錡喜得節而忘其權去暴踞日甚屬吏死不以過甚衆又逼汚良家寮佐力諫不能得遽遁去憲宗卽位不假借方鎮故倔彊者稍稍入朝錡不自安亦三請覲有詔拜尚書左

僕射以御史大夫李元素代之中使馳驛勞問兼撫慰其軍錡署判官王澹爲留後錡無入朝意稱疾遷延不卽行澹及中使數趣之錡不悅乘澹視事有所變更者諷親兵圍澹因給冬服錡坐幄中以挽硬蕃落自衛澹與中使入謁旣出衆持刃嫂罵殺澹食之監軍使遣牙將趙琦慰諭又食之以兵注中使頸錡陽驚扈解乃囚別館蕃落兵薛頡主之挽硬兵李鈞主之又以公孫玠韓運分總餘軍室五劍授管內鎮將令殺五州刺史屬別將庾伯良兵三千築石頭城謀據江左常州刺史顏防用其客李雲謀矯詔稱招討副使殺鎮將李深傳檄蘇杭湖睦四州同討錡湖州辛秘亦殺鎮將趙惟忠而蘇州李素爲鎮將姚志安所執釘舷上獻於錡錡敗而免憲宗以淮南節度使王鐔爲諸道行營兵馬招討處置使中官薛尚衍爲都監招討宣慰使發宣武武寧武昌淮南宣歙江西浙東兵自宣杭信三州進討初錡以宣州富饒遣四院隨身兵馬使張子良李奉仙田少卿領兵三千分下宣歙池錡甥裴行立雖預謀而欲效順故相與約遣兵執錡行立應於內子良等旣行其夕諭軍中曰僕射反矣精兵四面皆至常湖鎮將干首通衢勢感且敗吾輩徒死不如轉禍希福部衆大悅遂廻趣城行立舉火內外合謀行立攻牙門錡大驚左右曰城外兵馬至錡曰何人邪曰張中丞也錡怒甚曰門外兵何人也曰裴侍御也錡拊膺曰行立亦叛吾邪跣足逃于女樓下李鈞引兵三百趨出庭院格鬪行立兵貫出其中斬鈞傳首城下錡聞之舉族慟哭子

良以監軍命曉諭城中逆順且呼錡束身還朝左右以幕縋而出之錡以僕射召數日而反狀至下詔削官爵明日而敗送京師神策兵自長樂驛護至闕下帝御興安門問罪對曰張子良教臣反非臣意也帝曰爾以宗臣爲節度使不能斬子良然後入朝邪錡不能對以其日與子師回腰斬于城西南年六十七尸數日帝出黃衣二襲葬以庶人禮擢子良檢校工部尚書左金吾將軍封南陽郡王賜名奉國田少卿檢校左散騎常侍左羽林將軍代國公李奉仙檢校右常侍右羽林將軍邠國公裴行立泌州刺史贈王澹給事中趙琦和州刺史崔善貞睦州司馬削錡屬籍從弟宋州刺史銛通事舍人銛從子師偃流嶺南贊曰語曰出入之吝謂之有司賤之也德宗平朱泚京師府藏耗竭諸道始有進奉助經費而詔書亦往往宣索於天下以人主規財利下行有司之事天下無事賦取猶不息劍南江西有日月之進杜亞劉贊王緯及錡歲時進奉以固其寵號稱賦外羨餘又亦託中旨以盜庫物然獻纔十二三餘皆私之江淮以南物力大屈人人憔悴忘生貞元以後中官市物都下謂之宮市不持符牒口含詔命取濫織惡布紅紫之倍其估裂以償直市之良賈精貨皆逃去不出列廛閤者惟粗雜苦窳而已又有羶驅入禁中罄所車輦賣者不平因共毆管之蒼頭女奴名馬工車惴惴常畏捕取而德宗蔽於左右前後莫知也故善貞因錡并論其事卒不知錡願鹽鐵之利以養兵圖叛會不及庸有司之吝達甚

唐書卷二百二十四上

唐書卷二百二十四上考證

李懷光傳為寧慶晉絳慈隰等州節度使○舊書寧慶上有邠字臣酉按上文既云兼邠寧慶都將此處當以舊書為正

陳少游傳估但諸史如江鄂州○臣酉按舊書云估但領胥吏往江鄂等州語意較明

唐書卷二百二十四上考證

唐書卷二百二十四下

宋 端 明 殿 學 士 宋 祁 撰

列傳第一百三十九下

叛臣

李忠臣本董秦也幽州薊人少籍軍以材力奮事節度使薛楚玉張守珪安祿山等甄勞至折衝郎將平
盧軍先鋒使劉正臣殺偽節度呂知晦擢秦兵馬使攻長楊戰獨山襲榆關北平殺賊將甲子貢榮先歛
執周釗送京師從正臣赴難復敗李歸仁李咸白秀芝等潼關失守秦整軍北還奚王阿篤孤初引眾與
正臣合已而給約皆攻范陽至后城夜乘間襲秦秦接戰敗之追奔至溫泉山禽首領阿布離斬以聳鼓
至德二載節度使王玄志使秦率兵三千自雍奴桴葦絕海擊賊將石帝廷烏承洽轉戰累日拔魯城河
間景城收糧貲以實軍又與田神功下平原樂安禽偽刺史以獻於是防河招討使李銑承制假秦德州
刺史史思明自歸河南節度使張鎬督秦軍合諸將平河南州縣宗裨將陽惠元破安慶緒將王福德於
舒舍肅宗下詔褒諭令屯濮州又徙韋城從郭子儀圍相州軍潰秦至滎陽破賊將敬釭取糧艘二百佗
以餉汴軍未幾授濮州刺史屯杏園渡許叔冀以汴下史思明秦力屈亦降思明撫背曰始吾有左手得

公今完矣與俱寇河陽秦夜挈五百人冒圍歸李光弼詔加殿中監封戶二百召至京師賜今氏名給良馬甲第時陝西神策兩節度使郭英父衛伯玉屯陝故以忠臣爲兩軍兵馬使戰永寧莎柁與賊將李咸義等數十遇皆破之淮西節度使王仲昇爲賊執以忠臣爲汝仙蔡六州節度使兼安州合諸軍平東都進御史大夫回紇可汗既歸留其下安恪石帝廷居河陽守貲廩因是招亡命爲盜道路畏懼詔忠臣討定之吐蕃犯京師天子追兵秦方宴鞠場使者至卽整師引道諸將白須良日忠臣怒曰君父在難方擇日救患乎時召兵無先忠臣至者代宗嘉之加本道觀察使賚與倍等周智光爲帳下所殺忠臣提兵入華州所過大掠自赤水距潼關二百里無居人大厯五年加蔡州刺史陝虢李國清爲下所逐掠府庫國清徧拜諸將乃免會忠臣入朝次陝詔訊于衆衆懼忠臣不敢搖卽圍棘約士投所掠物園中一日盡獲討李靈耀也戰西梁固敗之復與高燧軍合敗賊于汴州田悅以援兵三萬屯汴鄆忠臣勒裨將李重倩夜率百騎襲之貫其營而還殺數千人悅聞道走靈耀開城去軍遂潰以忠臣爲汴州刺史加檢校司空同中書門下平章事封西平郡王忠臣資焚香嗜色將士婦女逼與亂所至人苦之以女弟妻張惠光用爲牙將恃勢殘克或白忠臣不之信又以惠光子居牙下愈橫肆十四年大將李希烈因衆怒與少將丁爲賈子華等共斬惠光父子以兵脅逐忠臣跳奔京師帝素寵之不責也復授檢校司空同中書門

下平章事奉朝請德宗立散騎常侍張涉以職得罪帝怒不赦涉故侍讀東宮者忠臣曰陛下貴爲天子先生以乏財觸法非過也帝意解免涉歸田里湖南觀察使辛京杲私怒部曲殺之有司劾當死忠臣曰京杲應死久矣帝問故對曰京杲諸父戰某所死兄弟戰某所死渠從行獨得存以故知之帝悽然悟釋之下除王傳忠臣慙直不通書帝嘗謂卿耳大真貴兆對曰臣聞驢耳大龍耳小帝喜其野而誠然旣失兵怫鬱不顧藉朱泚反僞署司空兼侍中泚攻奉天以忠臣居守泚敗繫有司與其子俱斬

喬琳并州太原人少孤苦志學擢進士第性誕蕩無禮檢郭子儀表爲朔方府掌書記與聯合畢曜相掉許貶巴州司戶參軍歷果綿遂懷四州刺史治寬簡不親事嘗謂錄事參軍任紹業曰子綱紀一州能劾刺史乎紹業出條所失示之驚曰能知吾失御史材也琳素善補人張涉涉以國子博士侍太子讀太子卽位召訪政事不淹日詔入翰林遷散騎常侍薦琳任宰相乃拜御史大夫同中書門下平章事天下矍然駭之琳年高且曠每進對失次所言不厭帝旨在位閱八旬以工部尙書罷帝由是亦疎涉琳從幸奉天再遷太子少師進幸梁州次盩厔詭言馬殆不進帝素以舊老禮之給乘輿馬辭病力帝賜所執策曰勉爲良圖與卿別矣不數日祝髻髮舍仙游佛廬泚聞遣數十騎取之署吏部尙書合姻家源休衣以朝服食以肉琳亦不辭士有訴官非使者琳曰子謂此選便乎及收京師李晟憫其老表賈死帝曰琳故宰

相失節背義不可赦臨刑歎曰我以七月七日生以此日死非命耶時又有蔣鎮者涿子也與兄鍊俱以文辭顯擢賢良方正科累轉諫議大夫大厯中淫雨壞河中鹽池味苦惡韓滉判度支慮減常賦妄言池生瑞鹽王德之美祥代宗疑不然命鎮馳驛按視鎮內欲結滉故實其事表置祠房號池曰寶應靈慶云再進工部侍郎妹婿源溥者休弟也故鎮與休交泚叛竄于鄆傷足不能進泚先得鍊而鎮左右逃歸語所在源休聞白泚以二百騎求得之知不免懷刃將自刺鍊止之復謀出奔懦不決中朝臣遁伏者休多所誅殺賴鎮救原十五初泚與弟渙在安史時皆汙僞官鍊兄弟復屈節于賊云

高駢字千里南平郡王崇文孫也家世禁衛幼頗脩節為文學與諸儒交硜硜譚治道兩軍中人更稱譽之事朱叔明為司馬有二鵬並飛駢曰我且貴當中之一發貫二鵬為眾大驚號落鵬侍御後歷右神策軍都虞候党項叛率禁兵萬人戍長武是時諸將無功唯駢數用奇殺獲甚多懿宗嘉之徙屯泰州卽拜刺史兼防禦使取河渭二州略定鳳林關降虜萬餘人咸通中帝將復安南拜駢為都護召還京師見靈臺殿於是容管經略使張茵不討賊更以茵兵授駢過江約監軍李維周繼進維周擁眾壁海門駢次峯州大破南詔蠻收所獲贍軍維周忌之匿捷書不奏朝廷不知駢閱百餘日詔問狀維周効駢玩敵不進更命右武衛將軍王晏權往代駢俄而駢拔安南斬蠻帥段會遷降附諸洞二萬計晏權方挾維

周發海門檄駢北歸而駢遣王惠贊傳會遷首京師見臙臙甚盛乃晏權等惠贊懼奪其書匿島中間關至京師天子覽書御宣政殿羣臣皆賀大赦天下進駢檢校刑部尚書仍鎮安南以都護府為靜海軍授駢節度兼諸道行營招討使始築安南城由安南至廣州江漕梗險多巨石駢募工剏治由是舟濟安行儲餉畢給又使者歲至乃鑿道五所置兵護送其徑青石者或傳馬援所不能治既攻之有震碎其石乃得通因名道曰天威云加檢校尚書右僕射駢之戰其從孫潯常先鋒冒矢石以勸士駢徙節天平薦潯自代詔拜交州節度使僖宗立即其軍加同中書門下平章事南詔寇嵩州掠成都徙駢劍南西川節度乘傳詣軍及劍門下令開城縱民出入左右諫寇在近脫火掠不可悔駢曰屬吾在安南破賊三十萬驛信聞我至尙敢邪當是時蠻攻雅州壁廬山間駢至亟解去駢卽移檄驛信勒兵從之驛信大懼送質子入朝約不敢寇蜀有突將分左右二廂廂有虞候諸火督盜賊有兵馬虞候主調發駢罷其一各置一虞候又以蜀兵辱詔蠻新定人未安業罷突將月粟并餐錢約曰府庫完當如舊又團練兵戰者厚其衣粟不團練者但掌文書倉庫衣粟減焉駢曰皆王卒命均之戰士失望于時天平昭義成軍合蜀兵凡六萬駢之自將出屯也突將亂乘門以入駢匿於園求不得天平軍聞變其校張筴以士五百格戰不勝監軍慰撫之皆曰州雖更蠻亂戶口尙完府庫方實公削軍粟以自養不堪其虐故亂監軍懼講解之取

役夫數百名叛卒藉斬其首乃定駢徐出以金帛厚賞士開府庫悉還其衣粟然密籍所給姓名夜遣牙將擊殺之夷其族雖孕者不賁投尸于江有一婦方踞而乳子將就刑媪傷之疑其畏死謂曰以子丐我一詣曹司也婦颺起曰我知之且飽吾子不可使以饑就戮也見刑者拜曰渠有節度使奪戰士食一日忿怒淫刑以逞國家法令何有也我死當訴于天使此賊閹門如今日寃也逮死神色晏然蜀人聞者爲垂泣駢復錄突將戍還者丸名貯器中意不懌則探之或十或五授將李敬全斬決親吏王殷說駢曰突將在行者初不知謀公當赦之駢悅投丸池中人乃安蜀之士惡成都城歲壞駢易以磚甃堞堞完新負城巨陵悉墾平之以便農桑訖功筮之得大畜駢曰畜者養也濟以剛健篤實輝光日新吉孰大焉文宜去下存上因名大玄城進檢校司徒封燕國公徙荆南節度梁繼者本以昭義兵西戍駢表隸麾下王仙芝之敗殘黨過江帝以駢治鄆威化大行且仙芝黨皆鄆人故授駢鎮海節度使駢遣將張濬與繼分兵窮討降其驍帥畢師鐸數十人賊走嶺表帝美其功加諸道行營都統鹽鐵轉運等使又詔駢料官軍義營鄉團歸其老弱傷夷裁制軍食刺史以下小罪輒罰大罪以聞賊更推黃巢南陷廣州駢建遣濬以兵五千屯郴扼賊西路留後王重任以兵八千並海進援循潮自將萬人繇大庾擊賊廣州且請起荆南王鐸兵三萬壁桂永以豈管兵五千壁端州則賊無遺類帝納其策而駢卒不行俄徙淮南節度副大使駢

繕完城壘募軍及土客得銳士七萬乃傳檄召天下兵共討賊威震一時天子倚以爲重廣明初濬破賊大雲倉詐降巢巢不意其襲遂大奔引殘黨壁上饒然衆亡幾會疫癘起人死亡濬進擊之巢大懼以金啗濬騰書於駢丐歸命駢信之許爲求節度當此時昭義武靈武兵數萬赴淮南駢欲專己功卽奏賊已破不須大兵有詔班師巢知兵罷卽絕駢請戰擊殺濬乘勝度江攻天長始巢在廣州求天平節度宰相盧攜善駢以有討賊功不肯赦巢與鄭畋爭于朝故巢怨不得節度而駢聞議不一亦不平至是欲縱賊以聳朝廷然後立功畢師鐸諫曰朝廷所恃誰易於公制賊要害莫先淮南今不據要津以滅賊使得北度必亂中原駢矍然下令將出師駢將呂用之畏師鐸有功諫曰公勲業極矣賊未殄朝廷且有口語況賊平挾震主之威安所稅駕不如觀釐求福爲不朽資也駢入其計託疾未可以出屯嚴兵保境巢據滁和去廣陵纔數百里乃求援陳許巢逼揚州衆十五萬駢將曹全晟以兵五千戰不利壁泗州以待援駢兵終不出賊北趨河洛天子遣使者促駢討賊冠蓋相望也俄而兩京陷天子猶冀駢立功眷寄未衰詔刺史若諸將有功自監察御史至常侍許墨制除授尋進檢校太尉東面都統京西京北神策軍諸道兵馬等使會二雉雠署寢占者曰軍府將空駢惡之悉兵出營東塘舟二千艘戈鎧完銳日討金鼓以侈士志與浙西節度使周寶檄欲連和而西寶大喜有謂寶欲并江東爲孫策三分計寶未之信俄而駢

請寶至軍議事寶怒辭疾不出覺隙遂搆駢屯東塘百日託以寶及浙東劉漢宏將爲不利乃還以應其變帝知駢無出兵意天下益殆乃以王鐸代爲都統以崔安潛副之詔韋昭度領諸道鹽鐵轉運使加駢侍中增實戶一百封渤海郡王駢失兵柄利權壞袂大詬卽上書謾言不恭詆鐸乃敗軍將而安潛狼貪有如橈敗詒千古之悔又引更始刮席子嬰軹道事以激帝帝怒下詔切責當此時王室微不絕如帶駢都統三年無尺寸功幸國顛沛大料兵陰圖割據一旦失勢威望頓盡故肆爲醜悖脅邀天子莫復故權而吳人顧雲以文辭緣澤其姦偃然無所忌畏又請帝南幸江淮會平賊駢聞縮氣悵悵部下多叛去鬱鬱無聊乃篤意求神仙以軍事屬用之用之者鄱陽人世爲商僉往來廣陵得諸賈之驪旣孤依舅家盜私其室亡命九華山事方士牛弘微得役鬼術賣藥廣陵市始詣駢親將俞公楚驗其術因得見駢署幕府稍補右職用之旣少賤具知閭里利病吏得失頗班言政事以將左道駢愈器之乃廣樹朋黨刺知駢動息持金帛還結左右日爲誕妄以動駢又薦狂人諸葛殷張守一爲長年方並署牙將初殷將見用之給曰上帝以公爲人臣慮機事慮廢使神人來備羽翼且當以職廢之明日殷以褐衣見辯詐無窮駢大驚號葛將軍其陰狡過用之遠甚有大賈居第華壯殷求之不得謂駢曰城中且有妖當築壇禳卻之因指賈居駢敕吏卽日驅徙殷入居之駢造迎仙等樓皆度高八十尺飾以金珠璆玉侍女衣羽衣新聲

度曲以儼鈞天薰齋其上祈與仙接用之自謂與仙真通對駢叱咤風雨或望空顧揖再拜語言俚近左右或竊議輒殺之後無敢出口者蕭勝納賄用之求鹽城監駢不肯用之曰仙人言鹽城有寶劍須真人取之唯勝可往駢許諾數月勝獻銅匕首用之曰此北帝所佩也得之者兵不敢犯駢寶祕之常持以坐起用之憚其術窮且見詣乃刻青石手板爲龍蛇隱起文曰帝賜駢使人潛植机上駢得之大喜爲萬鶴廷中設機關觸人則飛動駢衣服乘之作仙去狀用之懼有適其姦者乃曰仙人當下但患學者真氣虧沮耳駢始棄人間事絕妾媵雖將吏不得見客至先遣薰濯詣方士祓除謂之解穢少選卽引去自是內外無敢言者惟梁纘屢爲駢言駢不聽纘懼解所領兵駢還其軍於昭義纘不復事矣用之旣自任淫刑重賦人人思亂乃擢廢吏百餘號察子厚稟食令居衢閭凡民私鬪隱語莫不知道路箝口誅所惡者數百族又募卒二萬爲左右鎮邪軍與守一分總置官屬如駢府用之每出入騶御至千人建大第軍營營署皆備建百尺樓託云占星竄伺城中之有變者左右姬侍百餘皆娟秀光麗善歌舞巾幘束帶以侍月二十宴其費仰於民不足至苛留度支運物誘人上變則許入貲產贖罪俞公楚數規戒其失不聽姚歸禮謀殺之弗克用之因譖二人於駢使以驍雄兵三千督盜於外密使兵襲之舉師殲焉駢從子瀛密疏用之罪諫駢曰不除之高氏且無種駢怒命左右扶出以狀授用之用之誣瀛貸貲不能滿故妄

言因出渡筆驗之駢救吏禁滅出入俄署舒州刺史未幾爲下所逐用之構之也駢使人殺滅嗣襄王熅之亂駢上書勸進僞假駢中書令諸道兵馬都統江淮鹽鐵轉運使以用之爲嶺南節度使駢久缺望至是大喜貢賦不絕用之始開府置官屬禮與駢均矣以鄭杞董僅吳邁爲腹心駢之親信皆僞使附己政事未嘗關決駢內悔欲收其權不能也用之問計於杞僅謀請駢齋於其第密緘之給爲昇天事不克光啟三年蔡賊孫儒兵略定遠聲言涉淮壽州刺史張翱奔告駢命畢師鐸率騎三百戍高郵師鐸者故仙芝黨以善騎射稱駢敗巢于浙西用其力故寵待絕等用之厚啖以利欲其諧附然不肯情師鐸有妾美用之請見不可徂其出觀焉怒而棄之內忿懼爲子結婚於高郵將張神劍陰以爲援朱全忠方攻秦宗權駢慮其奔突使師鐸率兵踰都梁山不見賊還師鐸見駢府宿將多以讒死憂甚用之益加禮師鐸愈恐謀於神劍神劍不然其言而猜嫌日結用之亦慮其變內欲除之亟請罷屯其母密隨師鐸使去曰毋顧家室師鐸憂未知所出而駢子怒用之專恣覬師鐸與諸將發其姦遣使謂鐸曰用之欲因此行圖君既授書神劍矣君其備之師鐸驚軍中稍稍傳言諸將介而見請殺神劍并其軍驅市人以濟亂師鐸曰不可我若重擾百姓復一用之也鄭漢璋素與我善兵精士驥以用之用事常不平今若告之謀彼必喜則事濟矣衆然之神劍未知方椎牛釀酒且將犒師師鐸潛師夜出土皆絳繒抹首且行且拔漢璋

聞以麾下出迎師鐸諭以計大喜留其妻守淮口帥兵及亡命數千至高郵見神劍請其變神劍辭不知師鐸語稍侵神劍瞋目曰大夫何晚計彼一妖人前假嶺南節不肯行志圖淮海令君既奪魄彼一日得志吾能握刀頭北面事之邪吾前未量君意故不出口尙何疑漢璋喜取酒割臂血而盟推師鐸爲大丞相作誓告神乃移檄州縣以誅呂用之張守一諸葛殷爲名神劍以高郵兵諸校倪詳遂並以天長子弟會唐宏爲先鋒略玄真主騎趙簡主徒王朗爲殿得勝兵三千將發神劍中悔繆曰公兵雖精然城堅旬日不下則糧乏衆心搖矣神劍請按軍高郵爲公聲援而督糧道師鐸曰民粟尙多何患資儲城中搆離無鬪志何事聲援君意不行孰敢違漢璋內忌神劍恐不爲己下勸許其計約城破玉帛子女共之其四月兵傅城營其下城中駭亂用之分兵守且自督戰令曰斬一級賞金一餅士多山東人堅悍頗用命師鐸懼退舍自固用之稍堙塞諸門駢登延和閣聞鬪甚左右告之故大驚召用之問狀徐曰師鐸衆思歸爲門衛所軌隨已處置不爾煩玄女一符耳駢曰吾覺爾之誕多矣善自爲之勿使吾爲周寶也時寶已爲下所逐出奔云用之慙不復有言師鐸見城未下頗懼求救於宣州秦彥約事平迎以代駢駢數責用之曰始吾以心腹任君君御下無方卒誤我今百姓饑饉不可虛用當遣大將齎吾書諭之使罷兵用之疑諸將不爲用以其黨許馘奉書往始師鐸意駢令宿將勞軍因得口陳用之罪及馘至大怒曰梁繼韓

問安在若何庸來卽斬之乃繫書射城內用之不發卽火之它日以甲士百人入謁駢驚匿內寢少選乃出叱曰得非反邪命左右驅出用之至南門舉策曰吾不復入是矣始與駢貳師鐸壁揚子發民廬舍治攻具用之大索居人馬及丁壯驍將以長刀擁脅乘城晝夜不得息又疑爲間數易區處家有鮪餉皆相失至饑死者相枕藉駢召大將古鐸齋師鐸母書及其子出諭師鐸遣子還曰不敢負恩朝斬凶人夕還屯願以妻子爲質駢恐用之屠其家乃收置署中會秦彥遣秦稠率兵與師鐸合攻益急守陴者夜焚南柵以應于外師鐸入守將張全迺戰死用之距三橋殺傷相當駢從子傑率牙兵將執用之以昇師鐸左鏃邪兵復斷其後用之懼乃出奔駢召梁纘謝曰初不用子計以及此庸何追授以兵使保子城遲明師鐸縱火大掠駢乃命徹備改服須其入師鐸見延和閣駢待之如賓卽署師鐸節度副使漢璋神劍以次授署秦稠封府庫以待師鐸去丞相號于時守衛未謹駢愛將申及說駢曰逆人兵少弛願奉公夜出發諸鎮兵還刷大恥賊不足平也若不決則及將不得待公因泣下駢懼怯不能用其策及乃匿去師鐸誅用之支黨數十使孫約迎秦彥者徐州人本名立隸伍籍乾符中以盜繫獄且死夢諱曰秦彥而從我去痛而視械破因得亡命卽名彥聚徒百人殺下邳令取其貲入黃巢黨中旣敗與許勅降駢累表和州刺史中和初宣歙觀察使竇滂病彥襲而代之師鐸之召彥也或計曰足下向誅妖人羣下樂從今軍府

已安宜還政高公足下身典兵權在掌握四隣聞之不失大義諸將未敢謀也若令彥爲帥兵非足下有也且秦稠封府庫勢已相疑足下如厚德彥宜以金玉子女報之勿聽度江假足下能下彥楊行密夕聞而朝必至師鐸不決以告漢璋漢璋曰善師鐸出駢囚南第稠麾下求無厭燒貢奉樓數十楹取珍寶始駢自乾符以來貢獻不入天子貲貨山積私置郊祀元會供帳什器殫極功巧至是爲亂兵所剽略盡師鐸徙駢東第禽諸葛殷腰下得金數斤百姓交唾拔須髮無遺再縊乃絕仇家睢其目去市人投瓦礫擊尸俄而成冢駢出金遺守者師鐸知之加兵苛督復入囚署中子弟十餘人同幽之顧雲入見駢猶自若曰吾復居此天時人事必有在意師鐸復推立之用之旣出以兵攻淮口未下鄭漢璋擊之遂奔天長初用之詐爲駢書召兵於廬壽城陷而楊行密兵萬人次天長用之自歸張神劍求賂於師鐸辭以彥未至神劍怒與別將高霸將攻師鐸彥之來召池州刺史趙鏗守宣自將入揚州稱節度使以師鐸爲行軍司馬居用之第不得在牙中師鐸怏怏失志行密與神劍等連和自江北至槐家橋柵壘相聯彥登城望之色沮乃授鄭漢璋唐宏等兵屯門樵蘇道絕食且乏糲及師鐸以勁卒八千出戰大敗糲死之士奔溺死者十八彥大出金求救於張英雄引兵至東塘得金不戰去彥使師鐸率兵三萬陣城下漢璋爲前鋒宏次之駢玄真樊約又次之師鐸王朗以騎爲左右翼旣成列久之行密乃出委輜重于壁以羸兵守之伏

精卒數千其旁行密先犯玄真短兵接僞北師鐸諸軍奔其壁爭取金玉貲糧伏諫而出行密引輕兵躡其尾俘殺旁午橫尸十里師鐸等奔還玄真戰死師鐸雅倚玄真驍敢能拒敵既失之惋沮彌日不復議出戰矣駢久囚拘供億窘狹羣奴徹延和閣闌楯爲薪煮革帶以食駢召幕府盧說曰子粗立功比求清淨非與此世爭利害今而及此神道何望邪涕下不能已師鐸既敗慮駢內應有女巫王奉仙謂師鐸曰揚州災有大人死可以厭彥曰非高公邪命左右陳賞等往殺之侍者白有賊駢曰此必蔡彥來正色須之衆入駢罵曰軍事有監軍及諸將在何遠爾衆辟易有奮而擊駢者曳廷下數之曰公負天子恩陷人塗炭罪多矣尙何云駢未暇答仰首如有所伺卽斬之左右奴客遁歸行密行密舉軍縞素大臨而祭獨用之縗服哭三日彥屢敗軍氣摧喪與師鐸抱膝相視無它略更問奉仙賞罰輕重皆自出彥遣漢璋擊神劍破之神劍奔高郵漢璋欲窮追會大雨還行密以城尙堅師且老議解去用之裨將晨伏兵西壕伺守者休代引而登殺數十人于門以招外兵守軍亦厭苦皆委兵潰師鐸與其家及彥奔東塘人爭出相騰藉死壕塹幾滿王朗踣而殞行密既入殺梁纘于牙門以不死高氏難韓問聞之赴井死居人懼憚奄奄兵不忍加暴反斥餘糧救之彥師鐸與唐宏倪詳焚白砂將度江會秦宗權使孫儒引兵三萬襲揚州次天長彥等與之合還攻行密取行密輜重牛羊數千計儒以食乏乃屠高郵據之張神劍奔還行密授

之館而高郵戍兵七百潰而來行密疑有謀悉擊殺之因殺神劍用之始詐行密曰廡下有瘞金五千斤事平願備一日乏行密掘地無埋金但得銅人三尺身桎梏釘刺其口刻駢名於背蓋用蠱厭駢也行密責其罪并張守一斬于三橋妻子皆死著其罪于路儒攻城未得志慮彥師鐸有異謀稍并其兵唐宏度不免卽告儒曰師鐸密遣人至汴儒大恐明日召彥師鐸漢璋會軍中彥師鐸先至壯士摔之至儒所儒質彥反駢罪斬之至師鐸呼曰丈夫成則王敗則虜君何多責爲吾嘗將數萬兵不死常人手得公之劍瞑目矣儒罵曰庸賊欲污我手邪趣斬之漢璋至奮臂擊殺數人乃死身首糜散儒使宏主騎兵厚賜之文德元年儒諜知行密糧乏自高郵襲之行密拔其衆還廬州儒遂據揚州駢之死裹以故氍與子弟七人一坎而瘞行密擢駢孫愈爲副使令主喪事未克葬愈暴死至是故吏鄺師虔收葬之揚州雄富冠天下自師鐸行密儒迭攻迭守焚市落剽民人兵饑相仍其地遂空

朱致邠州人少以材武爲州戍將黃巢盜長安有王致者爲僞節度使方調兵攻陽事之乘間斬王致以留後讓李重古約合兵討巢廣明二年致襲賊戰開遠門槍洞咽不死以多擢晉州刺史進邠節度使合涇原岐隴兵八萬屯興平號定國若戰勝上敗走邠詔益靈鹽軍拜河南都統引兵屯中橋列五壁進西北面都統賊平授同中書門下平章事封吳興侯田令孜議討王重榮以兵屬致合鄺延靈夏軍三萬

保沙苑重榮上疏乞誅致令致既戰攻輒北因縱軍還掠僖宗蒼黃幸鳳翔避其鋒致反與重榮李克用連和請誅令致宰相蕭道密召致迎帝致趨鳳翔令致劫乘輿走陳倉遂至興元致追不及劫嗣襄王煨奉爲帝致自號大丞相專決萬機始與李昌符共謀挾煨至是反爲龔昌符乃自歸天子人心寢離及王行瑜敗於大唐峯懼歸且見殺又聞購能得致者以邪靈節度畀之行瑜謂其下曰今敗歸必以無功死若斬致與北軍迎天子取富貴可乎衆曰諾卽勒兵倍道趨長安致居孔緯第方據几署事聞兵入趣召行瑜叱曰公擅歸反邪行瑜厲聲曰我非反者將得君首爲邪靈節度耳致遽起左右斬之殺其徒數百諸軍遂大亂燒京師時盛寒吏民被剽斃僵死尸相藉卽傳首興元帝爲受俘馘宦者僞樞密使王能著等皆坐誅

王行瑜邠州人少隸軍從朱致爲列校討黃巢數有功煨卽位授行瑜天平節度使令率兵守大散關爲李鋌所破卽奉款行在還取致首以獻擢邪靈節度使景福元年與李茂貞韓建及弟同州節度使行實請討楊守亮於山南且言不敢仰度支費止請假茂貞招討一節宦官難之昭宗亦顧茂貞等得山南則益橫不許行瑜等因擅興軍擊取之後茂貞拒置王殺宰相行瑜參有力得賜鐵券稍憑兵跋扈求爲尙書令宰相韋昭度執不可但加號尙父行瑜望甚會河中王重榮喪李克用請以其子珂嗣節度而行瑜

建茂貞請授王拱因各以兵陳闕下欲廢天子不克卽殺昭度李礪留弟行約宿衛克用悉兵度河問行瑜等罪行實棄同州趨長安與行約謀劫乘輿又不克皆奔邠州行瑜屯梨園克用與戰破行實等軍執其母及行瑜子俘大校帝下詔削行瑜官爵行瑜以銳卒五千營龍泉茂貞壁其西克用夜發精騎擾饗道岐軍走行瑜歸邠州嬰城守厚賂克用求自歸克用軍環其城行瑜窮登城哭語克用曰我無罪昨殺大臣脅天子岐人也行實止宿衛而有司妄以劫遷罪歸之今公討亂者當問茂貞願得束身歸聽命天子克用曰尙父何自卑吾被命討二賊公其一也如歸國者當從中決老夫敢專之邪行瑜度不免悉族奔慶州爲麾下斬于路傳首京師帝御延喜門納之於是乾寧二年也其屬二百人克用獻于朝始行瑜亂宗正卿李涪盛陳其忠必悔過至是帝怒放死嶺南

陳敬瑄田令孜兄也少賤爲餅師得隸左神策軍令孜爲護軍中尉敬瑄緣藉擢左金吾衛將軍檢校尙書右僕射西川節度使性畏慎善撫士黃巢亂僖宗幸奉天敬瑄夜召監軍梁處厚號勸奉表迎帝繕治行宮令孜亦倡西幸敬瑄以兵三千護乘輿冗從內苑小兒先至敬瑄知素暴橫遣邏士伺之諸兒連臂謹昨行宮中士捕繫之諄曰我事天子者敬瑄殺五十人戶諸衛由是道路不譁帝次綿州敬瑄謁于道進酒帝三舉觴進檢校左僕射同中書門下平章事時雲南叛請遣使與和親乃聽命敬瑄奉行在百官

諸吏無敢乏帝欲命判度支固讓再加檢校司徒兼侍中封梁國公以弟敬瑄爲閬州刺史討定邛州首
望旣能涪州叛校韓秀昇再進兼中書令封潁川郡王實封四百戶賜一歲上輸錢及上都田宅邸禮各
十區鐵券恕十死巢平進潁川王增寶戶二百車駕東敬瑄供億豐餘又進檢校太師俄而令孜得罪敬
瑄被流端州會昭宗立敬瑄拒詔帝召爲左龍武統軍以宰相韋昭度代領節度使者至敬瑄使百姓遮
道齎耳訴己功且言鐵券恕死使者馳還令孜勸敬瑄募黃頭軍爲自守計時王建盜據閬利故令孜召
建建至綿州發兵拒之激建攻諸州以限朝廷或言建鷓鴣視狼顧惟利是賴公何用之不聽建詒顧彥朗
書曰十軍阿父召我欲依太師丐一大州卽寄梓州身引兵入鹿頭關敬瑄不納漢州刺史張頊逆戰
敗建入漢州成都嚴守建走城下遙謝令孜曰父召我及門而拒我尙誰容與諸將斷髮再拜辭曰今作
賊矣因請兵於彥朗攻成都殘掠州縣彥朗亦畏建表請大臣代敬瑄建自請討敬瑄贖罪詔立永平軍
授建節度使以昭度爲行營招討使山南西道節度使楊守亮副之彥朗爲行軍司馬有詔暴敬瑄殺孟
昭圖罪削官爵昭度使建屯學射山敬瑄迎戰不克又戰靈厓大敗龍紀元年昭度至軍中持節諭人約
開門守陴者詬曰鐵券在安得違先帝意令孜籍城中戶一人乘城夜循行晝濬濠伐薪敬瑄屯彌牟德
陽樹二壁拒建使富人自占貲多少布巨挺撈不實者不三日輸錢如市建昭度傳城而壘簡州刺史張

造攻笮橋大敗死之大順元年建稍擊降諸州邛州刺史毛湘本令孜孔目官謂其下曰吾不忍負軍容
以頭見建可也乃沐浴以須吏斬其首降敬瑄戰浣花不勝明日復戰將士皆爲建俘城中謀降者令孜
支解之以怖衆會大疫死人相藉明年三月詔還敬瑄官爵召昭度還諭建罷兵建不奉詔帝更以建爲
西川行營招討制置使建知敬瑄可禽欲遂有蜀地卽脅說昭度曰公以數萬衆討賊糧數不屬關東諸
節度相吞噬朝廷危若贅旆與其勞師遠方不如先中國公宜還爲天子謀之昭度未決會吏盜滅諸軍
粟食建怒其衆曰招討吏之謀也縱士執之醢食於軍昭度大駭是日授建符節跳馳出劍門建絕棧梯
東道不通因急擊敬瑄分親騎爲十團所當輒披靡烽壘相望幾百里縱謀入城以搖衆心建好謂軍中
凶成都號花錦城玉帛子女諸兒可自取謂票將韓武等城破吾與公遞爲節度使一日下聞之戰愈力
圍凡三歲城中糧盡以筒容米率寸鬻錢二百敬瑄出家貲給民募士出剽麥收其半民亦夜至建壘市
鹽不可禁吏請殺之敬瑄曰民饑無以卹使求生可也人至相暴以相啖敬瑄不能止乃行斬劈二法亦
不爲敬瑄自將出犀浦列二營邀建軍僞遁遇伏敬瑄敗建破斜橋管街二屯明日戰又破一壁降
其將建屯七里亭敬瑄攻之建將張武馳入城戰子城下守陴皆譟不能克張勅破浣花營敬瑄諸將或
死或降且盡凡五十戰敬瑄皆北乃上表以病丐還京師令孜素服至建軍建入自西門以張勅爲斬斫

使建徇于軍曰與而等累年鬪死今日如志若橫恣有犯者吾能全之卽爲勅所斬吾不得救也軍中肅然囚敬瑄令攷建自稱留後表于朝詔以建爲西川節度副大使知節度事建以敬瑄居新津食其租賦累表請誅不報景福二年陰令左右告敬瑄令攷養死士約楊晟等反於是斬敬瑄於家初敬瑄知不免嘗竄藥于帶至就刑視帶藥已亡矣自是建盡有兩川黔中地

李巨川字下已逢吉從曾孫乾符中舉進士方天下崩騷乃去京師河中王重榮辟爲掌書記重榮討黃巢書檄奏請日紛沓須報趣發皆屬巨川神安思敏言輒中理隣藩皆驚會賊走出關收京師人言巨川有助力重榮死于亂貶爲興元參軍節度使楊守亮喜曰天以生遺我邪復管記室守亮爲韓建所禽巨川械以從題木葉遺建祈哀建動容因釋縛置幕府昭宗幸華建患一州供億不能濟使巨川傳檄天下督轉餉初帝在石門數遣嗣延王通王將親軍大選安聖奉宸保靈安化四軍又置殿後軍合士二萬建惡衛兵彊不利己與巨川謀卽上飛變告八王欲脅帝幸河中因請四十六宅選嚴師傳督教盡散麾下兵書再上帝不得已詔可又廢殿後軍且言無示天下不廣詔留三十人爲控鶴排馬官隸飛龍坊自是天子爪牙盡矣建初懼帝不聽以兵環宮請誅定州行營將李筠帝懼斬筠兵乃解又言七國災漢八王亂晉承王帥江左謀不軌吐蕃朱玖亂首立宗支播人望今王室多故渠可使諸王將命四方感征鎮於

是詔諸王奉使者悉赴行在巨川日夜導建不臣乃請立德王爲皇太子文掩其惡帝還京拜諫議大夫光化初朱全忠陷河中將攻潼關建懼使巨川往詣軍納款因言當世利害全忠屬官敬翔以文翰事左右疑巨川用則全忠待己或衰乃詭說曰巨川誠奇才顧不利主人若何是日全忠殺之

唐書卷二百二十四下

唐書卷二百二十四下考證

李忠臣傳李感義○舊書作李咸義

以忠臣爲汝蔡六州節度使○舊書爲淮西十一州節度使臣人龍按方鎮表淮南西道節度于上元二年增領陳鄭等九州徙治安州號淮西十六州節度使無所爲六州與十一州節度也疑新書六字上脫十字舊書十一州一字當是六字之訛耳但仙州于大厯元年始增入淮西節度至五年復省此時淮西管內不應有仙州新書疑誤

唐書卷二百二十五上

宋 端 明 殿 學 士 宋 祁 撰

列傳第一百五十一上

逆臣

安祿山營州柳城胡也本姓康母阿史德為覓居突厥中禱子於軋犖山虜所謂鬪戰神者既而妊及生有光照穹廬野獸盡鳴望氣者言其祥范陽節度使張仁愿遣撥廬帳欲盡殺之匿而免母以神所命遂字軋犖山少孤隨母嫁虜將安延偃開元初偃攜以歸國與將軍安道買亡子偕來得依其家故道買子安節厚德偃約兩家子為兄弟乃冒姓安更名祿山及長伎忍多智善億測人情通六蕃語為互市郎張守珪節度幽州祿山盜羊而獲守珪將殺之呼曰公不欲滅兩蕃邪何殺我守珪壯其語又見偉而暫釋之與史思明俱為捉生知山川水泉處嘗以五騎禽契丹數十人守珪異之稍益其兵有討軋剋拔為偏將守珪醜其肥由是不敢飽因養為子後以平盧兵馬使擢特進幽州節度副使於是御史中丞張利貞採訪河北祿山百計諛媚多出金諧結左右為私恩利貞入朝盛言祿山能乃授營州都督平盧軍使順化州刺史使者往來陰以賂中其嗜一口更譽玄宗始才之天寶元年以平盧為節度祿山為之使兼柳

城太守押兩蕃渤海黑水四府經略使明年入朝奏對稱旨進驃騎大將軍又明年代裴寬爲范陽節度河北採訪使仍領平盧軍祿山北還詔中書門下尚書三省正員長官御史中丞饒鴻臚亭四載奚契丹殺公主以叛祿山幸邀功肆其侵於是兩蕃貳祿山起軍擊契丹還奏夢李靖李勣求食於臣乃祠北郡芝生于梁其詭誕敢言不疑如此席豫爲河北黜陟使言祿山賢時宰相李林甫嫌儒臣以戰功進尊寵間已乃請顯用蕃將故帝寵祿山益牢羣議不能軋卒亂天下林甫啟之也祿山陽爲愚不敏蓋其姦承間奏曰臣生蕃戎寵榮過甚無異材可用願以身爲陛下死天子以爲誠憐之令見皇太子不拜左右撻語之祿山曰臣不識朝廷儀皇太子何官也帝曰吾百歲後付以位謝曰臣愚知陛下不知太子罪萬死乃再拜時楊貴妃有寵祿山請爲妃養兒帝許之其拜必先妃後帝帝怪之答曰蕃人先母後父帝大悅命與楊鈺及三夫人約爲兄弟繇是祿山有亂天下意令磨下劉駱谷居京師伺朝廷隙六載進御史大夫封妻段爲夫人有國林甫以宰相貴甚羣臣無敢鈞禮惟祿山倚恩入謁偶林甫欲諷寤之使與王鉷偕鉷亦位大夫林甫見鉷趨拜卑約祿山惕然不覺自罄折林甫與語揣其意迎剖其端祿山大駭以爲神每見雖盛寒必流汗林甫稍厚之引至中書覆以己袍祿山德林甫呼十郎駱谷每奏事還先問十郎何如有好言輒喜若謂大夫好檢校則反手據牀曰我且死優人李龜年爲帝學之帝以爲樂晚益肥

腹緩及膝奮兩肩若挽牽者乃能行作胡旋舞帝前乃疾如風帝視其腹曰胡腹中何有而大答曰唯赤心耳每乘驛入朝半道必易馬號大夫換馬臺不爾馬輒仆故馬必能負五石馳者乃勝載帝爲祿山起第京師以中人督役戒曰善爲部署祿山眼孔大毋令笑我爲瑣戶交疏臺觀沼池華僭帘幕率緹繡金銀爲笏篋爪籬大抵服御雖乘輿不能過帝登勤政樓幄坐之左張金雞大障前置特榻詔祿山坐審其幄以示尊寵太子諫曰自古幄坐非人臣當得陛下寵祿山過甚必驕帝曰胡有異相我欲厭之時太平久人忘戰帝春秋高嬖豔鉗固李林甫楊國忠更持權綱紀大亂祿山計天下可取逆謀日熾每過朝堂龍尾道南北睥睨久乃去更築壘范陽北號雄武城峙兵積穀養同羅降奚契丹曳落河八千人爲假子教家奴善弓矢者數百畜單于護真大馬三萬牛羊五萬引張通儒李廷堅平冽李史魚獨孤問俗署幕府以高尚典書記嚴莊掌簿最阿史那承慶安太清安守忠李歸仁孫孝哲蔡希德牛廷玠向潤客高邈李欽湊李立節霍乾祐尹子奇何千年武令珣能元皓田承嗣田乾真皆拔行伍署大將潛遣賈胡行諸道歲輸財百萬至大會祿山踞重牀煥香陳怪珍胡人數百侍左右引見諸買陳犧牲女巫鼓舞于前以自神陰令羣賈市錦綵朱紫服數萬爲叛資月進牛橐駝鷹狗奇禽異物以蠱帝心而人不聊自以無功而貴見天子盛開邊乃給契丹諸酋大置酒毒焉既酣悉斬其首先後殺數千人獻馘闕下帝不知賜鐵

券封柳城郡公又贈延偃范陽大都督進祿山東平郡王九載兼河北道採訪處置使賜永寧園爲邸入朝楊國忠兄弟弟廷之新豐給玉食至湯將校皆賜浴帝幸望春宮以待獻俘八千詔賜永穆公主池觀爲游燕地徙新第請墨敕召宰相宴是日帝將擊毬乃置會命宰相皆赴帝獵苑中獲鮮禽必馳賜詔上谷郡置五鎗許鑄錢又求兼河東遂拜雲中太守河東節度使既兼制三道意益侈男子凡十一帝以慶宗爲太僕卿慶緒鴻臚卿慶長祕書監十一載率河東兵討契丹告奚曰彼背盟我將討之爾助我乎奚爲出徒兵二千鄉導至土護真河祿山計曰道雖遠我疾趨賊乘其不備破之固矣乃敕人持一繩欲盡縛契丹晝夜行三百里次天門嶺會雨甚弓弛矢脫不可用祿山督戰急大將何思德曰土方疲宜少息使使者盛陳利以脅賊賊必降祿山怒欲斬以令軍乃請戰思德貌類祿山及戰虜叢矛注矢邀取之傳言祿山獲矣奚聞亦叛夾攻祿山營士略盡祿山中流矢引奚兒數十棄衆走山而墜慶緒孫孝哲拔出之夜走平盧部將史定方以兵蹙戰虜解圍去祿山不得志乃悉兵號二十萬討契丹以報帝聞詔朔方節度使阿布思以師會布思者九姓首領也偉貌多權略開元初爲默啜所困內屬帝寵之祿山雅忌其才不相下欲襲取之故表請自助布思懼而叛轉入漠北祿山不進輒班師會布思爲回紇所掠奔莫邏祿祿山厚募其部落降之萬邏祿懼執布思送北廷獻之京師祿山已得布思衆則兵雄天下愈偃肆

皇太子及宰相屢言祿山反帝不信是時國忠疑隙已深建言追還朝以驗厥狀祿山揣得其謀乃馳入謁帝意遂安凡國忠所陳無入者十三載來謁華清宮對帝泣曰臣蕃人不識文字陛下擢以不次國忠必欲殺臣以甘心帝慰解之拜尙書左僕射賜實封千戶奴婢第產稱是詔還鎮又請爲閑廐隴右羣牧等使表吉溫自副其軍中有功位將軍者五百人中郎將二千人祿山之還帝御望春亭以餞斥御服賜之祿山大驚不自安疾驅去至淇門輕驢循流下萬夫挽絙而助日三百里既總閑牧因擇良馬內范陽又奪張文儼馬牧反狀明白人告言者帝必縛與之明年國忠謀授祿山同中書門下平章事召還朝制未下帝使中官輔璆琳賜大柑因察非常祿山厚賂之還言無它帝遂不召未幾事洩帝託它罪殺之自是始疑然祿山亦懼朝廷圖己每使者至稱疾不出嚴衛然後見黜陟使裴士淹行部至范陽再旬不見既而使武士挾引無復臣禮士淹宣詔還不敢言帝賜慶宗娶宗室女手詔祿山觀禮辭疾甚獻馬三千匹駙鞠自倍車三百乘乘三士因欲襲京師河南尹達奚珣極言毋內駙兵詔可帝賜書曰爲卿別治一湯可會十月朕待卿華清宮使至祿山踞牀曰天子安穩否乃送使者別館使還言曰臣幾死冬十一月反范陽詭言奉密詔討楊國忠騰榜郡縣以高尚嚴莊爲謀主孫孝哲高邈張通儒通晤爲腹心兵凡十五萬號二十萬師行日六十里先三日合大將置酒觀繪圖起燕至洛山川險易攻守悉具人人賜金帛

并授圖約曰違者斬至是如所素祿山從牙門部曲百餘騎次城北祭先冢而行使賈循主留務呂知誨守平盧高秀巖守大同燕老人叩馬諫祿山使嚴莊好謂曰吾憂國之危非私也禮遣之因下令有沮軍者夷三族凡七日反書聞帝方在華清宮中外失色車駕還京師斬慶宗賜其妻康死榮義郡主亦死下詔切責祿山許自歸祿山答書慢甚匡可忍賊遣高邈臧均以射生騎二十馳入太原劫取尹楊光翹殺之以張獻誠守定州祿山謀逆十餘年凡降蕃夷皆接以恩有不服者假兵脅制之所得士釋縛給湯沐衣服或重譯以達故蕃夷情偽悉得之祿山通夷語躬自尉撫皆釋俘囚爲戰士故其下樂輸死所戰無前邈最有謀勸祿山取李光弼爲左司馬不納旣而悔之憂見顏色久而曰史思明可當之賊之未反邈爲謀聲進生口直取洛陽無殺光翹天下當未有知者賊不從何千年亦勸賊令高秀巖以兵三萬出振武下朔方誘諸蕃取鹽夏鄜坊使李歸仁張通儒以兵二萬道雲中取太原圍弩七萬五千入蒲關以動關中勸祿山自將兵五萬梁河陽取洛陽使蔡希德賈循以兵二萬絕海收淄青以搖江淮則天下無復事矣祿山弗用時兵暴起州縣發官鎧仗皆穿朽鈍折不可用持挺鬪弗能亢吏皆棄城匿或自殺不則就禽日不絕禁衛皆市井徒旣授甲不能脫弓櫜劍繫乃發左藏庫繒帛大募兵以封常清爲范陽平盧節度使郭子儀爲朔方節度關內支度副大使右羽林大將軍王承業爲太原尹衛尉卿張介然爲汴州

刺史金吾將軍程千里爲潞州長史以榮王爲元帥高仙芝副之馳驛討賊祿山至鉅鹿欲止驚曰鹿吾名去之沙河或言如漢高祖不宿栢人以佞賊賊投草頹樹於河以長繩維舟集槎以結冰一昔合遂濟河陷靈昌郡又三日下陳留滎陽次鬻子谷將軍荔非守瑜邀之殺數百人流矢及祿山輿乃不敢前更出谷南守瑜矢盡死於河敗封常清取東都常清奔陝殺留守李愷御史中丞盧奕河南尹達奚珣臣于賊時高仙芝屯陝聞常清敗棄甲保潼關太守竇廷芝奔河東常山太守顏杲卿殺賊將李欽湊禽高邈何千年於是趙郡鉅鹿廣平清河河間景城六郡皆爲國守祿山所有纒盧龍密雲漁陽汲鄴陳留滎陽陝郡臨汝而已賊之據東京見宮闕尊雄銳情僭號故兵久不西而諸道兵得稍集尹子奇屯陳留欲東略會濟南太守李隨單父尉賈責濮陽人尙衡東平太守嗣吳王祇真源令張巡相繼起兵旬日衆數萬子奇至襄邑而還明年正月僭稱雄武皇帝國號燕建元聖武子慶緒王晉慶和王鄭達奚珣爲左相張通儒爲右相嚴莊爲御史大夫署拜百官復取常山殺顏杲卿安思義屯真定會李光弼出土門救常山思義降博陵亦拔唯橐城九門二縣爲賊守史思明李立節蔡希德圍饒陽不克引軍攻石邑張奉璋固守朔方節度使郭子儀自雲中引兵與光弼合敗思明於九門李立節死希德奔鉅鹿思明奔趙郡自鼓城襲博陵復據之光弼拔趙郡還圍博陵軍恆陽希德請濟師於賊賊以二萬騎涉滹沱入博陵牛廷珣

發鳩糧等兵萬人來助。思明益彊，與光弼戰於嘉山，光弼收郡十三，河南諸郡皆嚴兵守，潼關不開。祿山懼，欲還范陽，召嚴莊高尙責曰：「我起而曹謂萬全，今四方兵日盛，自關以西不跬步進，爾謀何在？」尙見我爲遣尙等出，凡數日，田乾真自潼關來勸祿山曰：「自古興王戰皆有勝負，乃成大業，無一舉而得者。今四方兵雖多，非我敵也。有如事不成，吾擁數萬衆，尙可橫行天下，爲十年計。且高尙嚴莊佐命元勳也，陛下何遽絕之，使自爲患邪？」祿山喜，道其小字曰阿浩，非汝孰悟我然？則奈何？」乾真曰：「召而慰安之，乃內尙等與飲宴。祿山自歌，君臣如初。卽遣孫孝哲安神威，西攻長安，會高仙芝等死，哥舒翰守潼關，爲乾祐所敗，囚之，賊不謂天子能遽去。駐兵潼關十日，乃西時行在，已至扶風，於是汧隴以東皆沒於賊。祿山以張通儒守東京，乾真爲京兆尹，使安守忠屯苑中，祿山未至，長安士人皆逃入山谷。東西絡繹二百里，宮嬪散匿，行哭將相第家，委寶貨不貲，羣不逞爭取之，累日不能盡。又剽左藏大盈庫，百司帑藏竭，乃火其餘。祿山至，怒乃大索三日，民間財貨盡掠之。府縣因株根牽連，旬剝苛急，百姓愈騷。祿山怨慶宗死，乃取帝進屬自霍國長公主諸王妃妾子孫姻壻等百餘人，害之以祭慶宗。羣臣從天子者，誅滅其宗，虜性得所欲，則肆爲殘虐，人益不附。諸大將欲有咨決，皆因嚴莊以見。御下少恩，雖腹心雅故，皆爲仇敵。郡縣相與殺守將，迎王師前後反覆十數。城邑墟矣。肅宗治兵靈武，天下日跂首待長安，相傳太子西來矣。人聞輒

東走關，里至空都，畿豪桀殺賊吏自歸者無虛日。賊斬刈懲之不能止，又賊將類慄勇無遠謀，日縱酒嗜聲色，財利車駕危得入，蜀終無進躡之患。帳下李豬兒者，本降豎幼事祿山，謹甚，使爲關人，愈親信。祿山腹大垂膝，每易衣左右共舉之。豬兒爲結帶，雖華清賜浴亦許自隨。及老愈肥，曲隱常瘡，旣叛不能無志，懼至是目復盲，俄又得疽疾，尤卞躁，左右給侍無罪輒死，或箠掠何辱。豬兒尤數，雖嚴莊親倚時時遭笞，斬故二人，深怨祿山。初慶緒善騎射，未冠爲鴻臚卿，賊僭號，嬖段夫人愛其子，慶恩欲立之，慶緒懼不立。莊亦疑難作不利，己私語慶緒曰：「君聞大義滅親乎？自古固有不得已而爲者。慶緒陰曉曰：『唯唯。』又語豬兒曰：『汝事上罪可數乎？不行大事，死無日。遂與定謀。』至德二載正月朔，祿山朝羣臣，創甚，罷是夜莊慶緒持兵扈門，豬兒入帳下，以大刀斫其腹。祿山盲捫佩刀，不得振，幄柱呼曰：『是家賊，俄而腸潰于牀，卽死。年五十餘。』包以氈，屬埋牀下，因傳疾甚，僞詔立慶緒爲皇太子，又矯稱祿山傳位慶緒，乃僞尊太上皇。旣襲僞位，改載初元年，卽縱樂飲酒，委政於莊，而兄事之。以張通儒安守忠等屯長安，史思明領范陽鎮恆陽，軍牛廷玠屯安陽，張志忠屯井陘，各募兵。於是廣平王率師東討，李嗣業將前軍，郭子儀將中軍，王思禮將後軍，回紇葉護以兵從通儒等，哀兵十萬。陳長安中賊皆奚素畏回紇，旣合驚且懼，王分精兵與嗣業合擊之，守忠等大敗，引而東。通儒棄妻子奔陝郡，王師入長安，思禮清宮僕固懷恩以回紇南蠻大食兵

前驅王悉師追賊莊自將兵十萬與通儒合鉦鼓震百餘里尹子奇已殺張巡悉衆十萬來并力營陝西次曲沃先是回紇傍南山設伏按軍北崦以待莊大戰新店以騎挑戰六遇輒北王師逐之入賊壘賊張兩翼攻之追兵沒王師亂幾不能軍嗣業馳死闕回紇自南山緣擊其背賊驚遂亂王師復振合攻之殺掠不勝算賊大敗追奔五十餘里尸骸藉藉滿阡壑鎧仗狼扈自陝屬于洛莊跳還與慶緒守忠通儒等劫殘軍走鄴郡王入洛陽大陳兵天津橋僞侍中陳希烈等三百人素服叩頭待罪王勞曰公等脅汙非反也天子有詔赦罪皆復而官衆大喜於是陳留殺賊將尹子奇以降莊妻薛含獲嘉給言永王女詣營及見王辭曰莊欲降願得一信王與子儀謀莊若至者餘黨可諭而下乃約莊賜鐵券莊乃降乘驛至京師肅宗引見釋其死授司農卿阿史那承慶以其衆三萬奔恆趙或趨范陽其從慶緒者戕卒纒千餘會蔡希德自上黨田承嗣自潁川武令珣自南陽各以衆來邢衛洛魏募兵稍稍集衆六萬賊復振以相州爲成安府太守爲尹改元天和以高尚平冽爲宰相崔乾祐孫孝哲牛廷玠爲將以阿史那承慶爲獻城郡王安守忠左威衛大將軍阿史那從禮左羽林大將軍然部黨益攜解由是能元皓以僞淄青節度使高秀巖以河東節度使並納順德州刺史王陳貝州刺史宇文寬皆背賊自歸河北諸軍各嬰城守賊使蔡希德安雄俊安太清等以兵攻陷之戮于市膾其肉慶緒懼人之貳已設壇加載書梓血與羣臣盟

然承慶等十餘人送密款有詔以承慶爲太保定襄郡王守忠左羽林軍大將軍歸德郡王從禮太傅順義郡王蔡希德德州刺史李廷訓邢州刺史符敬超洛州刺史楊宗太子左諭德任瓊明州刺史獨孤允陳州刺史楊日休洋州刺史薛榮光岐陽令自裨校等數數爲國間賊而慶緒治宮室觀榭塘沼汎樓船爲水嬉長夜飲通儒等爭權不能一凡有建白衆共訾沮之希德最有謀剛狷謀殺慶緒爲內應通儒以它事斬之麾下數千皆亡去希德素得士舉軍恨歎慶緒以乾祐爲天下兵馬使權震中外懷悍少恩士不附乾元元年秋九月帝詔郭子儀率九節度兵凡二十萬討慶緒攻衛州遂度河師背水壁而待慶緒遣安太清拒戰聞衛州已圍則鼓而南作三軍乾祐將上軍雄俊王福德佐之田承嗣將下軍榮敬佐之慶緒自將中軍孫孝哲薛嵩佐之既戰王師僞却慶緒逐之遇伏而潰慶緒走獲其弟慶和斬于京師子儀引軍躡賊戰愁思崗賊復敗自是銳兵盡矣因嬰鄴自固使薛嵩以厚幣求救於史思明思明遣李歸仁將兵萬三千壁滏陽未進而王師圍已固築城浚隍三周決安陽水灌城城中棧而處糧盡易口以食米斗錢七萬餘一鼠錢數千屑松飼馬墮牆取麥秸濯糞取芻城中欲降不得賊更以太清代乾祐將於

是思明有衆十三萬三分其軍趨鄴明年三月營安陽慶緒急乃遣太清奉皇帝璽綬讓思明明以書示軍中咸呼萬歲乃約慶緒爲兄弟還其書慶緒大悅王師不利九節度奔還子儀斷河陽橋戢穀水思

明進屯鄴南慶緒收官軍餘餽尙十餘萬石召孝哲等謀拒思明諸將皆曰今日安得復背史王乎通儒尙列皆請自往謝思明慶緒許諾思明見爲流涕厚禮遣還三日慶緒未出思明請慶緒歃血盟不得已以五百騎詣思明軍先此思明令軍中環甲待慶緒至再拜伏地謝曰臣不克負荷棄兩都陷重圍不意大王以太上皇故暴師遠來臣之罪唯王圖之思明恚曰兵利不利亦何事而爲人子殺父求位非大逆邪吾乃爲太上皇討賊顧左右牽出斬之慶緒數目周萬志萬志進曰慶緒爲君矣宜賜死乃并四弟縊又誅尙孝哲乾祐殊而膊之思明改葬祿山以王禮僞諡燕刺王祿山父子僭位凡三年而滅初祿山陷東京以張萬頃爲河南尹士人宗室賴以免者衆肅宗嘉其仁拜濮陽太守帝以賊國讐惡聞其姓京師坊里有安字者悉易之

高尚者雍奴人母老丐食自給尙客河朔不肯歸與令狐潮相善淫其婢生一女遂留居然篤學善文辭嘗喟然謂汝南周銑曰吾當作賊死不能斃草根求活也李齊物爲新平太守薦諸朝贖錢三萬介之見高力士力士以爲才置門下家事一咨之諷近臣表其能擢左領軍倉曹參軍力士語祿山表爲平盧掌書記因出入臥內祿山喜睡尙嘗執筆侍通宵不寢繇是親愛遂與嚴莊語圖讎導祿山反陷東都僞拜中書侍郎大抵賊所下赦令皆尙爲之嚴莊降後尙獨典政事至僞侍中

孫孝哲者契丹部人母冶色祿山通之故孝哲得狎近長七尺伉健有謀祿山對側門俟召衣帶絕不知所爲孝哲箴縷素具徐爲紉祿山大悅尤能先事取情祿山魁大非孝哲縫衣不能勝天寶末官大將軍賊僭位僞拜殿中監閑廡使爵爲王與嚴莊爭寵不平裴馬光侈食輒珍滋賊令監張通儒等守長安人皆目之殺妃王宗室子百餘人窮誅楊國忠高力士黨與及與賊忤者不勝計剔首析肢流離道衢祿山死莊奪其使以與鄧季陽慶緒之奔莊懼爲所圖因降有商胡慶謙者天寶中爲安南都護附楊國忠官將軍上元中出家賞佐山南驛稟肅宗喜其濟許之累試鴻臚卿墻在賊中有告其叛坐誅事連莊繫獄貶難江尉京兆尹劉晏發吏防其家莊恨之俄詔釋罪莊入見代宗誣晏常矜功怨上漏禁中事晏遂貶云

史思明窺夷州突厥種初名宰于玄宗賜其名姿癯露鵞眉偃背厥目側鼻鼻須髮躁健譎狡與安祿山共鄉里生先祿山一日故長相善少事特進烏知義以輕騎覘賊多所禽馘通六蕃譯亦爲互市郎頃之負官錢無以償將走奚未至爲邏騎所困欲殺之給曰我使人也若聞殺天子使者其國不祥不如以我見王王活我功自汝得邏以爲然送至王所不拜曰天子使見小國君不拜禮也王怒然疑真使者卒授館待以禮將還令百人從入朝奚有部將瑣高者名聞國中思明欲禽以贖罪詠王曰從我者雖多無足

與見天子者惟高材可與至中國王悅命高將帳下三百俱既至平盧遣謂戍主曰奚兵數百外稱入朝內實盜請備之主潛師迎犒殺其衆囚高以獻幽州節度使張守珪奇其功表折衝與祿山俱爲捉生天寶初累功至將軍知平盧軍事入奏帝賜坐與語奇之問年曰四十矣撫其背曰爾貴在晚勉之遷大將軍北平太守從祿山討契丹祿山敗單騎走師州殺其下左賢哥解魚承仙自解思明逃山中再閱旬稟散卒得七百追見祿山平盧祿山喜握手曰計而死矣今故在吾何憂思明語親密曰吾聞進退在時向番出隨哥解地下矣契丹取師州守捉使劉客奴亡去祿山使思明擊走之表平盧兵馬使思明少賤鄉里易之大豪辛氏有女方求壻窺思明告其親曰必嫁我思明宗屬不可女固以歸思明亦負曰自我得婦官不休生男子多殆且貴乎祿山反使思明略定河北會賈循死留思明守范陽而常山顏杲卿等傳檄拒賊祿山使向潤客等代遣思明攻常山九日執杲卿進薄饒陽盧全誠拒守河間景城平原樂安清河博平六郡稍募兵自固河間李奂以兵七千救饒陽景城李暉持兵八千助河間平原顏真卿以兵六千助清河悉爲思明所敗暉子杞死之饒陽愈堅會李光弼收常山思明遽解圍迎戰晝夜行二百里相持久不決郭子儀取趙郡合兵攻賊凡再戰皆大敗走入博陵光弼追傅城幾拔屬潼關潰肅宗召朔方河東兵光弼引還使王甫守常山賊尾追光弼於井陘敗歸攻平盧劉正臣輕之不設備敗保北平兵貲

二千乘皆沒思明得其銳卒張甚謀攻常山甫欲降請將殺之遣使至信都迎刺史烏承恩鎮守不聽思明攻土門城中伏甲詭降賊登城伏起賊殲思明中戟扶以免復攻陷之焚廬舍種誅其人取藁城守將白嘉祐走趙郡思明圍之五日入之嘉祐奔太原思明再陷常山賊別帥尹子奇圍河間顏真卿遣和琳將兵萬餘往救之於是北風號勁鼓之士不進賊縱擊大敗執琳引衆攻城禽李奂又拔景城李暉赴河死招樂安降之遂攻平原未至真卿棄郡去進破清河執太守王懷忠入博平遂圍信都初賊先獲承恩母妻及子故承恩降而兵尙五萬騎三千擊饒陽李系自燔死思明兵所嚮縱其下椎剽淫奪人妻女以是士最奮是時舉河北悉入賊生人貲產掃地壯齋負老嬰則殺之殺人以爲戲祿山僞署范陽節度使始麾下騎纔二千同羅步曳落河止三千既數勝兵最彊信然有噬江漢心以精卒五萬畀尹子奇度河劫北海以震淮徐會回紇襲范陽范陽閉不出子奇乃還救遂不克至德二載與蔡希德高秀巖合兵十萬攻太原是時李光弼使部將張奉璋以兵守故關思明攻陷之奉璋走樂平思明攻具山東奉璋匿士廣陽改服給爲賊使者責其後期斬數人引衆得還太原時光弼固守且十月不能拔而安慶緒襲位賜姓安名榮國爵嬭川郡土賊之陷兩京常以橐它載禁府珍寶貯范陽如巨阜然思明見富彊憫然驕欲自取之已而慶緒敗走相州殘士三萬北歸無所屬思明擊殺數千人降之慶緒知其貳使阿史那承

慶安守忠李立節詣思明議事且共圖之判官耿仁智欲以大誼動賊請問曰公貴且賢無待下爲之謀然請一言而死思明曰爲我言之對曰方祿山疆誰敢不服大夫事之固無罪今天子聰明勇智有少康宣王風公誠發使輸誠無不納此轉禍入福之秋也思明曰善承慶等未知以五千騎來思明介而勞前謂曰公等至士不勝喜然邊兵素憚使者威不自安請弛弓以入從之思明從承慶等飲卽拘之收其兵給貲以遣斬守忠立節以徇李光弼聞其絕慶緒使人招之前此烏承恩已歸國帝遣鏞諭之思明使牙門金如意奉十三郡兵八萬籍歸于朝於是高秀巖以河東自歸有詔思明爲歸義郡王范陽長史河北節度使諸子並列卿以秀巖爲雲中太守亦官其諸子遣承恩與中人李思敬尉撫趣討殘賊思明乃遣張忠志守幽州假薛嶸以恆州刺史趙州刺史陸濟使降授朝義兵五千守冀州假令狐彰博州刺史成滑州然思明外順命內實通賊益募兵帝知之以其常事承恩父知義冀其無嫌卽擢承恩爲河北節度副大使使圖思明承恩至范陽羸服夜過諸將陰諭以謀諸將返以告思明疑未有以驗會承恩與思敬奉事還思明留館之幃所寢牀伏二人焉承恩子入見因留臥夜半語其子曰吾受命除此逆胡二人白思明乃執承恩探衣囊得賜阿史那承慶鐵券及光弼牒又得薄紙書數番皆當誅將士姓名賊大詬曰我何負於爾至是耶故答曰此太尉光弼謀上不知也思明召官吏於廷西嚮哭曰臣赤心不負國何

至殺臣因榜殺承恩父子及支黨二百餘人囚思敬以聞帝遣使諭曰事出承恩非朕與光弼意又聞三司議陳希烈等死思明懼曰希烈等皆大臣上皇棄而西既復位此等宜見勞返殺之況我本從祿山反乎諸將皆勸賊表天子誅光弼思明使耿仁智張不矜上疏請斬光弼不然且攻太原疏入于函仁智輒易去左右密白思明執二人曰若負我耶命斬之旣又欲貸死復召責曰仁智事我三十年今日我忘爾耶仁智怒曰人固有死大夫納邪說再圖反我雖生不如死思明怒捶殺之九節度圍相州急慶緒問道求救思明懼王師未敢進俄而蕭華舉魏州歸天子崔光遠代守思明乃引兵擊魏拔之殺數萬人乾元二年正月朔築壇僭稱大聖周王建元應天以周贄爲司馬救相州却王師殺慶緒并其衆欲遂西略虞根本未固卽留朝義守相州自引還夏四月更國號大燕建元順天自稱應天皇帝妻辛爲皇后以朝義爲懷王周贄爲相李歸仁爲將號范陽爲燕京洛陽周京長安秦京更以州爲郡鑄順天得一錢欲郊及藉田聘儒生講制度或上書言北有兩蕃西有二都勝負未可知而爲太平事難矣思明不悅遂祠祀上帝是日大風不能郊留子朝清守幽州使阿史那玉向貢張通儒高如震高久仁王東武等輔之兵四出寇河南身出濮陽使令狐彰絕黎陽朝義出白高周萬志自胡亥度河圍汴州於是節度使許叔冀濮州刺史董秦梁浦田神功皆附賊卽命叔冀與李祥守汴州徙秦等家屬平盧使浦神功下江淮約曰得地

人取黃二艦思明乘勝鼓行西陷洛陽破汝鄭滑三州圍李光弼河陽不能拔使安太清取懷州以守光
弼攻之太清降思明又遣田承嗣擊申光等州王同芝擊陳許敬釭擊兗鄆薛嶠擊曹上元二年二月思
明以計敗光弼兵於北邙王師棄河陽懷州京師震恐益兵屯陝州思明遂西使朝義爲先鋒身自宜陽
繼進朝義攻陝敗于姜子坂退壁永寧思明大怒召朝義并略悅蔡文景許季常將誅而釋之詔曰朝義
怯不能成我事欲追朝清自副又敕朝義築三角城居糧終日畢未垣而思明至怒不如約辭曰士疲少
息耳思明曰汝惜士而違我令邪據鞍畢垣乃去顧曰朝下陝夕斬是賊朝義懼思明居傳舍令所愛曹
將軍擊刁斗呵衛略悅等被讓卽共說朝義曰向兵敗悅與王死無日不如召曹將軍同計大事朝義面
不應悅曰王誠不忍吾等且歸唐不得事王矣朝義許之令季常以言動曹將軍曹將軍畏長將不敢拒
思明愛優譚寢食常在側優者以其忍恨之是夜思明驚據牀叱咤優問故答曰我夢羣鹿度水鹿死而
水乾云何俄如區優相謂曰胡命盡乎少選悅以兵入問思明所在未對輒殺數人共指區思明智有亂
踰垣出至廡下將乘馬走悅麾下周子俊射其臂墜問難所起曰懷王也思明曰旦日失言宜有此然殺
我太早使我不得至長安大呼懷王三日囚我可也無取殺父名復罵曹將軍曰胡誤我左右反接縛之
送柳泉傳舍悅還報朝義曰驚聖人否損聖人否悅曰無有時周贊許叔冀以後軍屯福昌季常叔冀子

也朝義令告之贊聞驚仆地賊領兵還贊等出迎悅惡其貳乃殺贊次柳泉悅畏衆不厭殺思明以斃
裏尸索它負還東京朝義乃卽位建元顯聖初思明諸子無嫡庶分以少者爲尊朝義孽長子寬厚下多
附者及難起陰令向貢阿史那玉圖朝清喜田獵戕虐似思明淫酗過之養帳下三千人皆黥賊輕
死貢給計曰聞上欲以王爲太子且車駕在遠王宜入侍朝清謂然趣帳下出治裝貢使高久仁高如震
率壯士入牙城朝清問其故或曰軍叛矣乃擐甲登樓責貢等士陣樓下朝清自射殺數人阿史那玉軍
僞北朝清下被執與母辛俱死張通儒不知引兵戰城中數日不克亦死貢攝軍事未幾玉襲殺之自爲
長史治殺朝清罪乃梟久仁徇于軍如震懼擁兵拒守五日玉敗走武清朝義使人招之至東都凡胡面
者無長少悉誅以李懷仙爲幽州節度使斬如震幽州乃定朝義虛懷禮下事皆決大臣然無經略才當
此時洛陽諸郡人相食城邑榛墟又諸將皆祿山舊臣與思明故輩行恥爲朝義屈召兵輒不至欲還幽
州會雍王以河東朔方回紇兵十餘萬討賊僕固懷恩與回紇左殺爲先鋒魚朝恩郭英乂殿入自醴池
李抱玉薄河陽李光弼徑陳留合兵始代宗召南北軍諸將問所以討賊計開府儀同三司管崇嗣曰我
得回紇無不勝帝曰未也右金吾大將軍薛景仙曰我若不勝請以勇士二萬椎鋒死賊帝曰壯矣右金
吾大將軍長孫金緒曰賊若背城戰破之必矣若閉城留死未可取也且回紇短於攻城持久勢且沮我

若休士張勢以綴賊使光弼取陳留抱玉掃河北先斷其手足然後縱間賊中彼脅從者相疑則滅可待
帝曰善命潼關陝戒嚴師次洛陽驪兵下懷州王師部伍靜嚴賊有懼色朝義以師十萬距橫水戰大敗
俘馘凡六萬委牛馬器甲不可計朝義燒明堂東奔汴州僞節度使張獻誠不納自濮北趣幽州東都再
更亂英父朝恩等不能戢軍與回紇縱掠延及鄭汝閩并至無煙方朔寒人皆連紙襪書為裳榆賊走至
下博僕固瑒追及之朝義復敗河東戍將李竭誠成德李令崇皆背賊犄角戰至漳水無舟諸將勸降朝
義不悅田承嗣請環車為營內女子車中以輜重次之伏兵以待既戰而卻王師逐之爭賞寶賊引奇兵
繞出又伏發王師卻數十里止朝義遂走莫州瑒追圍之閏四旬賊入戰八奔明年正月閏精兵欲決死
承嗣謂朝義不如身將驍銳還幽州因懷仙悉兵五萬還戰聲勢外張勝可萬全臣請堅守雖瑒之疆不
遽下朝義然納以騎五千夜出北行握承嗣手以存亡為託承嗣頓首流涕將行復曰閩門百口母老子
稚今付公矣承嗣聽命少選集諸將曰吾與公等事燕下河北百五十餘城發人家墓焚人室廬掠人玉
帛壯者死鋒刃弱者填溝壑公門華胄為我厮隸齊姜宋子為我掃除今天降鑿吾等安所歸命自古禍
福亦不常能改往修今是轉危即安矣旦日且出降公等謂何眾咸曰善遂明使人號城上曰朝義夜半
走矣胡不追賊瑒未信承嗣將朝義母及妻孥詣瑒壘於是諸軍率輕兵追之朝義至范陽懷仙部將李

抱忠閉壁不受曰頃既受命天子一年之中且降且叛二三孰甚焉朝義告饑抱忠饋于野朝義飯軍亦
飯飯已軍子弟稍稍辭去朝義流涕罵承嗣曰老奴誤我去至梁鄉拜思明墓東走廣陽不受謀奔兩蕃
懷仙招之自漁陽回止幽州縊死醫巫閭祠下懷仙斬其首傳長安召故將收其屍懷仙改服出次哭之
士皆號慟及葬莫知其所僞恆州刺史張忠志趙州刺史盧倣定州刺史程元勝徐州刺史劉如佺相州
節度使薛嵩及懷仙承嗣等皆舉其地以歸思明父子僭號凡四年滅朝義死部送將士妻口百餘于官
有司請隸司農帝曰是皆良家子脅掠至此命稟食遺其親無所歸者官為資遣

贊曰祿山思明興夷奴餓俘假天子恩幸遂亂天下彼能以臣反君而其子亦能賊殺其父事之好還天
道固然然生民厄會必假手于人者故二賊暴興而亟滅張謂譏劉裕近希曹馬遠稟桓文禍徒及於兩
朝禍未盈於三載八葉傳其世嗣六君不以壽終天之報施其明驗乎杜牧謂相工稱隋文帝當為帝者
後篡竊果得之周末楊氏為八柱國公侯相襲久矣一旦以男子偷竊位號不三二十年壯老嬰兒皆不
得其死彼知相法者當曰此必為楊氏之禍乃可為善相人張杜確論至今多稱誦之如祿山思明希劉
裕楊堅而不至者是以著其論

唐書卷二百二十五上

唐書卷二百二十五上考證

安祿山傳道買子安節○舊書作貞節

以張通儒守東京○舊書作西京留守沈炳震曰新書誤臣宗楷按慶緒篡後即以張通儒安守忠等屯
長安則其守西京明矣當從舊書

唐書卷二百二十五上考證

唐書卷二百二十五中

宋 端 明 殿 學 士 宋 祁 撰

列傳第一百五十中

逆臣

李希烈燕州遼西人少籍平盧軍從李忠臣浮海戰河北有勞及忠臣在淮西因署偏裨試光祿卿軍中藉藉高其才會忠臣荒縱不事得間衆怒逐忠臣聽命代宗詔忻王爲節度副大使使希烈專留後事又詔滑亳節度使李勉兼領汴州德宗立加御史大夫卽拜節度使名其軍曰淮寧以寵之梁崇義之反敕諸道進討詔進希烈南平郡王漢南北招討處置使又拜諸軍都統平崇義功多擁兵欲有其地會山南節度使李承至不克猶大掠而去以功檢校尙書右僕射同中書門下平章事李納叛以檢校司空兼淄青節度使討之希烈擁衆三萬次許州不進遣李荳約納爲唇齒陰計取汴州卽檄李勉假道勉度所宜出儲陳留治梁除道以須希烈計得因嫚罵勉嚴備以守納遣游兵導希烈絕汴餉路勉治蔡渠列東南饋希烈遣使者約河北朱滔田悅等連和凶焰熾然俄而滔等自相王遣使者來奉牋希烈亦自號建興王天下都元帥五賊株連半天下建中四年正月詔諸節度以兵犄角攻討唐漢臣高秉哲以兵萬人

屯汝州未至賊將乘霧進王師還賊取汝州執李元平兵西首東都大震士皆走河陽崕留守鄭叔則壁西苑賊按兵不進帝聽盧杞計詔太子太師顏真卿諭賊已行又遣左龍武大將軍哥舒曜討之希烈見真卿傲桀不臣敕左右訾侮朝政即北侵汴州南略鄂州有詔江西節度使嗣曹王臯擊之拔蕪黃兩州擊賊將李良韓霜露於白巖二將走初希烈自襄陽還留姚憺戍鄧州賊又得汝則武關梗絕帝使陝虢觀察使姚明敷治上津道置館通南方貢貨希烈遣董待名韓霜露劉敬宗陳質翟崇暉分掠州縣官軍數奔曜復取汝州希烈遣周會呂從賁康琳拒曜次襄城與王玢姚憺章清合謀襲希烈不克皆死清奔劉洽希烈懼還蔡州上疏歸罪會等帝不赦詔斬希烈者四品以上得其官五品以下戶四百民賜復三年遣神策將劉德信將節度觀察團練子弟兵屯陽翟并力以李勉爲淮西招討使曜副之荆南節度使張伯儀爲淮西應援招討使山南節度使賈耽與臯副之德信去陽翟入汝壁賊取陽翟覆伯儀軍曜戰不利屯襄城希烈怙其壯舉衆三萬圍曜時帝西狩師氣熾不能抗城遂陷曜奔東都希烈資慘害臨戰陣殺人血流於前而飲食自若也以故人畏服爲盡死乘襄城之捷進攻汴州入之運土木治道怒不如程驅人填塹號涇稍勉奔宋州希烈已據汴僭卽皇帝位國號楚建元武成以張鷟子李綬李元平爲宰相鄭賁爲侍中孫廣爲中書令披其地建四節度以汴州爲大梁府治安州爲南關梁石作壘又於上

蔡襄城獲折車釘奉以爲瑞或其下因窺江淮盛兵攻襄邑守將高翼死之於是汴滑副都統劉洽率曲環李克信軍十餘萬戰白塔不利洽引還卒柏少清攬轡曰公小不利遽北奈何洽不聽夜入宋州賊驟勝徑薄靈陵舟乘衝踵進亘七十里時洽將高彥昭劉昌共嬰壘以守賊使妖人所風火戰棚盡坎堞欲登彥昭按劍乘陣士感奮風亦反昌計於衆曰軍法倍不戰賊畏吾寡不如退以驕賊自宋出精銳擣不意功可成彥昭謝曰君少待請盡力乃登城誓衆曰中丞欲示弱覆而取之誠善然我爲守得失在主人今士創重者須供養有如棄城去則傷者死內逃者死外吾衆盡矣士皆泣且拜曰公在是誰敢去昌大慙彥昭擊家牛犒軍士死戰斬首三千級請援於洽其屬作書言城且危彥昭視曰君輕我耶取紙自爲書洽得書喜曰健將在西吾何憂選兵八百夜艾而入賊不知詰旦傳城士奮出希烈大敗取其旆斬首萬計追北至襄邑收賊貲糧而還洽表其功拜彥昭御史大夫實封百五十戶希烈既沮卻而壽州刺史張建封亦屯固始彥其旁希烈懼還汴州遣崇暉以精兵襲陳復爲洽敗俘衆三萬執崇暉進拔汴州鄭賁劉敬宗張伯元呂子巖李達千希烈遁歸蔡賊戍將孫液挈鄭州降帝卽拜液爲刺史貞元二年遣杜文朝寇襄州爲樊澤所破獲文朝會臯建封環及李澄四略其地勢日感希烈縮氣不敢搖曠牛肉而病親將陳仙奇陰令醫毒之以死始希烈入汴聞戶曹參軍賈良女美疆取之女顧曰慎無戚我能滅賊

後有寵與賊祕謀能轉移之嘗稱仙奇忠勇可用而妻亦賣姓願如娼媚者以固其夫希烈許諾乘間往謂仙奇妻曰賊雖疆終必敗云何賣久而寤及希烈死子不發喪欲悉誅諸將乃自立未決有獻舍桃者賣請分遺仙奇妻聽之因蠟帛丸雜果中出所謀仙奇大驚與薛育率兵諫而入子出徧拜曰請去帝號如淄青故事語已斬之函希烈并妻子匕首獻天子尸希烈於市帝以仙奇忠卽拜淮西節度使百姓給復二年俄爲吳少誠所殺有詔贈太子太保賣亦死

朱泚幽州昌平人父懷珪事安史二賊僞署柳城使泚資壯偉腰腹十圍外寬和中實復刻少推父蔭籍軍中與弟滔並爲李懷仙部將輕財好施凡戰所得必分麾下士以動其心陰儲凶德朱希彩爲節度使頗委信之大曆七年希彩爲下所殺衆未有屬泚方外屯而滔主牙兵尤狡譎乃潛諭數十人大呼軍門曰帥非朱公莫可衆愕眙因共詣泚推知留後遣使至京師聽命有詔檢校左散騎常侍卽拜盧龍節度留後俄遷節度使封懷寧郡王實封戶二百泚上書謝遣滔將兵西防秋代宗悅手詔褒美居三年求入朝自幽州首爲逆懷仙以來雖外臣順然不朝謁而泚倡諸鎮以騎三千身入衛有詔起第以待旣行屬疾或勸還泚曰與吾尸猶至京師將吏乃不敢言時四方無事天子簡日視朝泚以偶日至見內殿賜乘輿馬二戰馬十金綵甚厚士校皆有賜宴賚隆渥泚之來滔攝後務稍稍翦落泚牙角泚自知失權爲滔

所賣不得志乃請留京師帝因授滔節度留後乃分防秋兵使各有統河陽永平兵郭子儀主之決勝楊猷兵李抱玉主之淮西鳳翔兵馬璘主之汴宋淄青兵泚主之進同中書門下平章事出屯奉天賜禁中兵以爲寵遷檢校司空代李抱玉爲隴右節度副大使仍知河西澤潞行營兵馬事明年徙王遂寧德宗立改鎮鳳翔進封戶三百建中初以李懷光代段秀實兼節度涇原徙屯原州懷光前督作泚與崔寧領兵繼進涇士素聞懷光暴相恟懼劉文喜因劫衆以亂請留秀實又求屬泚詔泚代懷光文喜合兵二萬乘城使裨將劉海賓入陳事海賓請假文喜節臣當斬其首帝曰爾誠忠然我節不可得遣還詔泚懷光攻之帝爲減大官脯醢給軍文喜猶閉壁求救於吐蕃吐蕃師興泚懷光欲避之別將韓游瓌曰戎若來涇人必變誰肯爲反賊沒身于虜者少須之俄吐蕃游騎升高招涇人衆曰始吾屬爲文喜求節度天子致討則歸罪安能以緒嶮面爲異俗乎海賓果與其徒殺文喜入泚軍泚一無所戮由是涇人德之詔加中書令還屯進拜太尉滔合田悅叛陰遣人與泚相聞河東馬燧獲其書帝召泚示之泚惶懼請死帝勉曰千里不同謀卿何謝更以張鑑節度鳳翔還泚京師加實封千戶不朝請中人監第李希烈圍哥舒曜於襄城詔涇原節度使姚令言督鎮兵五千東救曜過闕下師次滄水京兆尹王翊使吏供軍糲飯茶肴衆怒不肯食羣譟曰吾等棄父母妻子前死敵而乃食此庸能持身蹈白刃耶今瓌林大盈庫寶貲如山

尙何往乃盡甲反旗而鼓帝聞命中人持賜往人二繖士愈悖射中人中人返走時令言尙論兵禁中既上變乃馳至長樂坂遇兵還引滿向令言令言大呼曰引而東富貴可取何失計爲滅族事衆劫令言以西行帝復遣使者開諭賊已陣通化門殺使者帝遣普王與學士姜公輔載金綵慰撫賊薄丹鳳門詔集六軍無至者先是關東河北戰不利禁兵悉東衛士內空而神策軍使白志貞籍市人隸兵聽其居肆私取庸自入故遽迫皆不至帝出苑北門羽衛纔數十普王前導皇太子王韋二妃唐安公主及中人百餘騎以從右龍武軍使令狐建以數百人殿夜至咸陽飯數匕而去賊已嚴何諸門士人羸衣冒出盧杞關播李竦皆踰垣走與劉從一趙贊王翊陸贄吳通微等追及帝咸陽郭曙與童奴數十獵苑中聞蹕謁道左帝勞之懇乞從許之遲曉至奉天吏惶懼謁于門渾瑊以數十騎自夾城入北內哀兵欲擊賊聞乘輿出遂奔奉天於是人未知帝所在踰三日諸王羣臣稍稍自問道至初令言陣五門衛兵不出遂突入含元殿周呼曰天子出矣今日共可取富貴謀而進掠宜春苑入諸宮姦人因亂竊入內府盜貨寶終夜不絕道路更剽掠居人嚴兵自保賊無屬畏不能久以泚昔在涇有恩且失權久庸思亂乃相謀曰大尉方囚錮若迎之事可濟令言率百餘騎見泚泚僞讓不荅留使者飲以觀衆心夜數百騎復往泚知不僞乃擁徒向闕下炬火竟街觀者以萬計舍前殿總六軍明日下午令言曰國家有事東方涇人赴難不習朝章驚

乘輿百官三日並赴行在留者守本司違令誅逆徒居白華殿或說泚迎天子泚顧望喟然光祿卿源休至請問教以不臣詭稱符命泚悅張光晟李忠臣皆新失職怨望亦勸成之鳳翔大將張廷芝涇將段誠諫引潰兵三千自襄城來泚自謂得人助逆志堅決因署休京兆尹判度支忠臣皇城使又以段秀實失軍疑有怨起之委以謀秀實與劉海賓憤發挺擊賊忠臣護泚纔破面得不死明日大陳旗章金石于廷傳言立宗室王監國士庶競往觀泚僞卽皇帝位於宣政殿號大秦建元應天侍衛皆卒伍諸臣在位者纔十餘逼太常卿樊系爲冊冊成仰藥死泚下詔稱幽囚之中神器自至以示受命卽拜令言侍中關內副元帥忠臣司空兼侍中休中書侍郎蔣鎮門下侍郎並同中書門下平章事以蔣鍊爲御史中丞敬鉅御史大夫許季常京兆尹洪經綸太常少卿彭偃中書舍人裴揆崔幼真給事中廷芝光晟誠諫崔宣張寶何望之杜如江等並僞署節度使以兄子遂爲太子以滔爲冀王太尉尙書令號皇太弟帝使高重傑屯梁山禦賊賊將李日月殺之帝拊尸哭盡哀結蒲爲首以葬泚得首亦集羣賊哭曰忠臣也亦用三品葬焉泚既勝則令都人曰奉天殘黨不終日當平日月銳甚自謂無前乃燒陵廟鹵御物帝患之渾瑊伏兵漢谷引數千騎跳攻長安泚大驚踣榻前城引卻日月尾追遇伏鬪射日月殺之泚悵恨其母不哭罵曰奚奴天子負而何事死且晚泚自將偪奉天竊乘輿物自侈以令言爲上將光晟副之忠臣留守以蔣

鍊李子平爲宰相於是城率韓游瓌禦泚泚大敗死者萬計退三里而舍修攻具毀廬室爲樓車百尺下
規城中會杜希全以兵敗漢谷賊益張又劉德信高秉哲自汝州取沙苑馬五百壁昭應戰思子陵西三
敗賊次東渭橋出遊奔軍以逼都城忠臣兵數勦請救泚乃急攻城驅民填塹造雲梁令壯士居上將傳
堞守者震駭渾瑊乃使侯仲莊韓澄穴地道梁陷縱火焚之城上揮膏流數百步衆亂而囂城中兵出皇
太子督戰賊大敗然賊負其衆遂長圍以百弩弩射城中不及幄坐者三步城益急帝召羣臣曰朕負宗
廟宜固守公等家在賊可先降以完親族衆泣下曰臣等死無貳帝亦太息噓歎城圍凡三旬有六日而
李懷光以兵五萬至敗賊于魯店遂戰城下自辰至昏賊潰帝下觀戰傳詔曰賊衆亦朕赤子勿多殺聞
者感激是夜泚引去初帝至奉天或言賊已立泚必來攻請治守具宰相盧杞曰泚大臣奈何疑其反及
泚圍城帝卒不詰其言泚之歸令言方治攻具忠臣坊坊團結人皆厭苦泚悉止之曰攻守我自辦賊嘗
令士馳入曰奉天陷矣百姓相顧泣市無留人臺省吏落落郎官一二而已李懷光壁九子澤李晟自白
馬津來營東渭橋尚可孤以襄鄧兵五千次藍田駱元光守昭應馬燧使子彙以兵三千屯中渭橋時奉
天圍久食且盡以蘆菽帝馬太官糲米止二斛圍解父老爭上壺飡餅餌劍南節度使張延賞獻帛數十
獻諸方貢物踵來因大賜軍中詔殿中侍御史万俟著治金商道權通轉輸羣臣家在城者賊猶給俸中

人朱重曜爲賊謀曰執其家以招士大夫不來者夷之孫知古謬曰陛下以柔服人若夷其妻子是絕嚮
化意且義士殺身何顧於家乃止興元元年泚以本封遂寧漢地也更號漢改元天皇或曰王師欲潛壞
京師四隅垣以入泚懼詔金吾布士於衢吏儲五炬以防夜城隅率百步建一樓候望非常凡祠廟廬
皆帷甲戒曰軍來則四面擊太倉糧竭賊督吏索觀寺餘米萬斛鞭朴流離士寢饑而神策六軍從行在
及哥舒曜李晟兵皆家粟不絕或請停給泚曰士在外而弱稚絕食則死豈吾心哉卽厚斂屠人許季常
曰一旦有急請籍中人公侯三千族之貲足矣或謂泚陛下旣受命而存唐九廟諸陵不宜泚曰朕嘗北
面事唐胡忍此又曰官多缺請擇才授之脅以兵使不得辭泚曰疆授則人懼但欲仕者與之安能叩戶
拜官邪奉天所下赦令凡受賊僞官者破賊日悉貸不問官軍密榜諸道泚方宿未央涇原士相與謀殺
泚泚知之輒徙它處衆謀亦止光晟與懷光對壁李希倩請以精騎五百犯之光晟不許曰西軍方疆不
可輕以取敗日暮雨軍退希倩謁泚曰光晟有他志視西軍不戰臣請擊之不許請斬光晟又不許曰彼
善將所以不戰蓋知未可乎希倩怒曰臣盡心以事君不見信願乞要領歸淮西泚許諾以馬十四匹錦
一百曰以此東歸希倩慙復入曰臣愚褊罪當死願死軍前泚又許之光晟見泚曰臣不敢反因再拜泚
慰勉之官軍壞龍首香積二場以決其流城中水絕泚役數百人治之東出灞水與王師戰大奔還闕都

門士皆甲以待久乃罷李子平請修改具襲懷光取苑中六街大木爲衝車程役苦甚人不堪又禁居人夜行三人以上不得聚飲食上下惴恐賊所用唯盧龍神策團練兵而涇原軍驕不可制但完守所獲不出戰故泚數北憂甚欲出走術家爭曰陛下當不出宮雖西軍入且自有變泚據以自安會李懷光貳于帝不欲泚平按軍觀望帝欲幸咸陽趣諸將捕賊懷光出醜言乃詔戴休顏守奉天尙可孤守灞上略元光守渭橋進狩梁州次渭陽太息曰朕是行將有永嘉事乎渾瑊曰臨大難無畏者聖人勇也陛下何言之過懷光遂與泚連和京師知帝益西二叛膠固謂亂且成出受賊官者十八始泚多出金兄事懷光約平關中割地爲隣國故懷光決反因并陽惠元李建徽軍泚知懷光反明白卽賜詔待以臣禮督其兵入衛懷光慙見欺引其軍東保河中泚數遣人誘涇原馮河清河清不從又結其將田希鑿遂害河清以應賊泚卽以代河清使結吐蕃李晟等兵寢疆士益附而渾瑊又擊破賊將韓旻宋歸朝於武亭川斬計萬級歸朝奔懷光晟率渾瑊略元光尙可孤悉師攻賊晟薄光泰門敗賊將張廷芝李希倩賊棄門哭保白華晟引軍還居三日復戰大敗之乃分道入泚將段誠伏莽中爲王伉所禽姚合言張廷芝與晟遇十闕皆北遂至白華始張光晟以精兵壁九曲距東渭橋十里密約降於晟晟之入光晟勸泚等出奔故泚挾令言廷芝休子平朱遂引殘軍西走光晟衛出之因詣晟降泚失道問野人荅曰朱太尉邪休曰漢皇帝

曰天網恢恢走將安所泚怒欲殺之乃亡去泚至涇州長武城田希鑿拒之泚曰子之節吾所授奈何拒我火其門希鑿擲節陷中曰歸汝節泚舉軍哭城中人望見其子弟亦哭宋膺曰某妻哭斬矣衆止哭泚更舍逆旅遣梁廷芬入見希鑿曰公殺一節度唐天子必不容何不納朱公成大事希鑿陰可廷芬出報泚悅廷芬請宰相不得乃不復入泚猶餘范陽卒三千北走驛馬關靈州刺史夏侯英開門陣而待泚不敢入因保彭原西城廷芬與泚腹心朱惟孝夜射泚墜窖中韓旻薛綸高幽岳武震朱進卿董希芝共斬泚使宋膺傳首以獻泚死年四十三令言走涇州休子平走鳳翔皆斬首泚壻金吾將軍馬悅走党項得入幽州朱重曜者事泚最親近泚呼爲兄會窮冬大雨泚欲虜變鳩殺重曜以王禮葬賊平出其尸膊之李希倩等諸將皆以次夷滅初源休爲京兆尹使回紇將還盧杞畏其辯能結主恩次太原奏爲光祿卿休怨望故導泚僭號爲調兵食署拜百官事一咨之時訂其逆甚於泚脅辱大臣多殺宗室子孫幾于盡每王師不利喜見眉寓與姚合言勸泚圍奉天晝夜爲賊謀二人爭自比蕭何休顧合言曰成秦之業無輩我者我視蕭何子當曹參可矣卽收圖籍貯府庫效何者人皆笑謂爲火迫鄼侯本相州人合言者河中人始應募隸涇原節度使馬璘府孟暉之爲留後表其謹肅任將帥遂爲節度使旣挾泚亂頗盡力彭偃銳于進自謂爲宰相所抑鬱鬱不懌泚亂匿田家旣得用辭令一出其手故辭尤諄慢李晟愛張光晟

才表丐原死置軍中略元光怒曰吾不能與反虜同坐拂衣去晟乃殺之李懷光以宋歸朝獻諸朝斬之
唯李日月母得貸泚未敗號其第爲潛龍宮徙珍寶實之人謂潛龍勿用亡兆也晟惡田希鑿之逆欲因
事誅之會吐蕃寇涇州晟方帥涇原故希鑿請救晟遣史萬歲以騎兵三千往請晟行邊希鑿來謁其妻
李父事晟屢入宴將還師好謂希鑿曰吾久留此諸將皆故人吾欲置酒以別可過營飲也希鑿等詣
營酒未行晟曰諸君相過宜自通姓名爵里諸將以次言無罪者坐自如如有罪者晟質責一卒引出斬而
瘞之希鑿坐晟下未知當死晟顧曰田郎不得無罪左右執以下晟曰天子蒙塵乃殺節度使受賊節今
日何面目見我乎希鑿不能對晟曰田郎老矣坐於牀置對乃縊幕中以李觀代爲節度使

唐書卷二百二十五中

唐書卷二百二十五中考證

朱泚傳樊系爲冊冊成仰藥死○舊書僞署樊系爲禮部侍郎未知孰是

唐書卷二百二十五下

宋 端 明 殿 學 士 宋 祁 撰

列傳第一百五十下

逆臣

黃巢曹州冤句人世鬻鹽富于貲善擊劍騎射稍通書記辯給喜養亡命咸通末仍歲饑盜興河南乾符二年濮名賊王仙芝亂長垣有衆三千殘曹濮二州俘萬人勢遂張仙芝妄號大將軍檄諸道言吏貪沓賦重賞罰不平宰相恥之僖宗不知也其票帥尙君長柴存畢師鐸曹師雄柳彥璋劉漢宏李重霸等十餘輩所在肆掠而巢喜亂卽與羣從八人募衆得數千人以應仙芝轉寇河南十五州衆遂數萬帝使平盧節度使宋威與其副曹全晟數擊賊敗之拜諸道行營招討使給衛兵三千騎五百詔河南諸鎮皆受節度以左散騎常侍曾元裕副焉仙芝略沂州威敗賊城下仙芝亡去威因奏大渠死擅縱麾下兵還青州羣臣皆入賀居三日州縣奏賊故在時兵始休有詔復遣士皆忿思亂賊間之趣邾城不十日破八縣帝憂迫近東都督諸道兵檢過於是鳳翔邠靈涇原兵守陝潼關元裕守東都義成昭義以兵衛宮仙芝去攻汝州殺其將刺史走東都大震百官脫身出奔賊破陽武圍鄭州不克螳聚鄧汝間關以東州縣大

抵皆畏賊嬰城守故賊放兵四略殘郢復二州所過焚剽生人幾盡官軍急追則遺賫布路士爭取之率
還橈不前賊轉入申光殘隋州執刺史據安州自如分奇兵圍舒擊廬壽光等州時威老且闔不任軍陰
與元裕謀曰昔龐勛滅康承訓即得罪吾屬雖成功其免禍乎不如留賊不幸為天子我不失作功臣故
驕賊一舍完軍顧望帝亦知之更以陳許節度使崔安潛為行營都統以前鴻臚卿李瑒代威右威衛上
將軍張自勉代元裕賊出入蘄黃蘄州刺史裴渥為賊求官約罷兵仙芝與巢等詣渥飲未幾詔拜仙芝
左神策軍押衙遣中人慰撫仙芝喜巢恨賞不及己詢曰君降獨得官五千眾且奈何丐我兵無留因擊
仙芝傷首仙芝憚眾怒即不受命劫州兵渥中人亡去賊分其眾尚君長入陳蔡巢北掠齊魯眾萬人入
鄆州殺節度使薛崇進陷沂州遂至數萬繇潁蔡保檀岍山是時柳彥璋又取江州執刺史陶祥巢引兵
復與仙芝合圍宋州會自勉救兵至斬賊二千級仙芝解而南度漢攻荆南於是節度使楊知溫嬰城守
賊縱火焚樓堞知溫不出有詔以高駢代之駢以蜀兵萬五千齎糒糧期三十日至而城已陷知溫走賊
不能守於是詔左武衛將軍劉秉仁為江州刺史勒兵乘單舟入賊柵賊大駭相率迎降遂斬彥璋巢攻
和州未克仙芝自圍洪州取之使徐唐莒守進破朗岳遂圍潭州觀察使崔瑾拒却之乃向浙西擾宣潤
不能得所欲身留江西越別部還入河南帝詔崔安潛歸忠武復起宋威曾元裕以招討使還之而楊復

光監軍復光遣其屬吳彥宏以詔諭賊仙芝乃遣蔡溫球楚彥威尚君長來降欲詣闕請罪又遣威書求
節度威陽許之上言與君長戰禽之復光固言其降命侍御史與中人馳驛即訊不能明卒斬君長等于
狗脊嶺仙芝怒還攻洪州入其郛威自將往救敗仙芝於黃梅斬賊五萬級獲仙芝傳首京師當時巢
方圍亳州未下君長弟讓率仙芝潰黨歸巢推巢為王號衝天大將軍署拜官屬驅河南山南之民十餘
萬掠淮南建元王霸曾元裕敗賊於申州死者萬人帝以威殺尚君長非是且討賊無功詔還青州以元
裕為招討使張自勉為副巢破考城取濮州元裕軍荆襄援兵阻更拜自勉東北面行營招討使督諸軍
急捕巢方掠襄邑雍丘詔滑州節度使李嶧壁原武巢寇葉陽翟欲窺東都會左神武大將軍劉景仁以
兵五千援東都河南節度使鄭延休兵三千壁河陰巢兵在江西者為鎮海節度使高駢所破寇新鄭鄭
襄城陽翟者為崔安潛逐走在浙西者為節度使裴瓌斬二長死者甚眾巢大沮畏乃詣天平軍乞降詔
授巢右衛將軍巢度藩鎮不一未足制己即叛去轉寇浙東執觀察使崔璆於是高駢遣將張滌梁繼攻
賊破之賊收眾踰江西破虔吉饒信等州因刊山開道七百里直趨建州初軍中謠曰逢儒則肉師必覆
巢入閩俘民給稱儒者皆釋時六年三月也僂路圍福州觀察使韋岫戰不勝棄城遁賊入之焚室廬殺
人如薙過崇文館校書郎黃璞家令曰此儒者滅炬弗焚又求處士周朴得之謂曰能從我乎答曰我尚

不仕天子安能從賊巢斬朴是時閩地諸州皆沒有詔高駉爲諸道行營都統以拒賊巢陷桂管進寇廣州詔節度使李迢書求表爲天平節度又魯崔璆言于朝宰相鄭畋欲許之盧攜田令孜執不可巢又丐安南都護廣州節度使書聞右僕射于琮議南海市舶利不貲賊得益富而國用屈乃拜巢率府率巢見詔大詬急攻廣州執李迢自號義軍都統露表告將入關因詆宦豎柄朝垢蠹紀綱指諸臣與中人賂遺交構狀銓貢失才禁刺史殖財產縣令犯賊者族皆當時極傲天子旣懲宋威失計罷之而宰相王鐸請自行乃拜鐸荆南節度使南面行營招討都統率諸道兵進討鐸屯江陵表泰寧節度使李係爲招討副使湖南觀察使以先鋒屯潭州兩屯烽驛相望會賊中大疫衆死什四遂引北還自桂編大桴沿湘下衡永破潭州李係走朗州兵十餘萬殲焉投紫蔽江進逼江陵號五十萬鐸兵寡卽乘城先此劉漢宏已略地焚廬詹人皆竄山谷俄而係敗問至鐸棄城走襄陽官軍乘亂縱掠會雨雪人多死溝壑其十月巢據荆南魯李迢草表報天子迢曰吾腕可斷表不可爲巢怒殺之欲進躡鐸會江西招討使曹全勗與山南東道節度使劉巨容壁荆門使沙陀以五百騎釘轡藻韜望賊陣縱而遁賊以爲怯明日諸將乘以戰而馬識沙陀語呼之輒奔還莫能禁官兵伏于林闕而北賊急追伏發大敗之執賊渠十二輩巢懼度江東走師促之俘什八鐸招漢宏降之或勸巨容窮追答曰國家多負人危難不吝賞事平則得罪不如留

賊冀後福止不追故巢得復整攻鄂州入之全勗將度江會有詔以段彥譽代其使乃止巢畏襲轉掠江西再入饒信杭州衆至二十萬攻臨安戍將董昌兵寡不敢戰伏數十騎莽中賊至伏弩射殺賊將下皆走昌進屯八百里見舍嫗曰有追至告以臨安兵屯八百里矣賊駭曰向數騎能困我况軍八百里乎乃還殘宣歙等十五州廣明元年淮南高駉遣將張濬度江敗王重霸降之巢數卻乃保饒州衆多疫別部常宏以衆數萬降所在戮死諸軍屢奏破賊皆不實朝廷信之稍自安巢得計破殺張濬陷睦婺二州又取宣州而漢宏殘衆復奮寇宋州掠申光來與巢合濟采石侵揚州高駉按兵不出詔竟海節度使齊克讓屯汝州拜全勗天平節度使兼東面副都統賊方守滁和全勗以天平兵敗于淮上宰相豆盧瑑計救師未至請假巢天平節度使使無得西以精兵戍宣武塞汝鄭路賊首可致矣盧攜執不可請召諸道兵壁泗上以宣武節度統之則巢且還寇東南徘徊山浙救死而已詔可前此已詔天下兵屯澗水禁賊北走於是徐兵三千道許其帥薛能館徐衆城中許人驚謂見襲部將周岌自澗水還殺能自稱留後徐軍聞亂列將時溥亦引歸囚其帥支詳竟海齊克讓懼下叛引軍還兗州澗水屯皆散巢聞悉衆度淮妄稱率士大將軍整衆不剽掠所過惟取丁壯益兵李罕之犯申光潁宋徐兗等州吏皆亡巢自將攻汝州欲薄東都當是時天子沖弱怖而流淚宰相更共建言悉神策并關內諸節度兵十五萬守潼關田令孜請

自將而東然內震擾前說帝以幸蜀事帝自幸神策軍擢左軍騎將張承範爲先鋒右軍步將王師會督糧道以飛龍使楊復恭副令孜於是募兵京師得數千人當是時巢已陷東都留守劉允章以百官迎賊巢入勞問而已里閭晏然帝餞令孜章信門賚遺豐優然衛兵皆長安高貴世籍兩軍得稟賜侈服怒馬以訖權豪初不知戰聞科選皆哭于家陰出貲雇販區病坊以備行陣不能持兵觀者寒毛以慄承範以疆弩三千防關辭曰祿山率兵五萬陷東都今賊衆六十萬過祿山遠甚恐不足守帝不許賊進取陝虢檄關戍曰吾道淮南逐高駢如鼠走穴爾無拒我神策兵過華裏三日糧不能飽無鬪志十二月巢攻關齊克讓以其軍戰關外賊少卻俄而巢至師大譁川谷皆震時士饑甚潛燒克讓營克讓走入關承範出金諭軍中曰諸君勉報國救且至士感泣拒戰賊見師不繼急攻關王師矢盡飛石以射巢驅民內塹火關樓皆盡始關左有大谷禁行人號禁谷賊至今攻屯關而忘谷之可入尙讓引衆趨谷承範惶遽使師會以勁弩八百邀之比至而賊已入明日爽攻關王師潰師會欲自殺承範曰吾二人死孰當辯者不如見天子以實聞死未晚乃羸服逃始博野鳳翔軍過渭橋見募軍服鮮煥怒曰是等何功遽然至是更爲賊鄉導前賊歸焚西市帝類郊祈哀會承範至具言不守狀帝黜宰相盧攜方朝而傳言賊至百官奔令孜以神策兵五百奉帝趨咸陽惟福穆潭壽四王與妃御一二從中人西門匡範統右軍以殿巢以尙讓

爲平唐大將軍蓋洪費全古副之賊衆皆被髮錦衣大抵輜重自東都抵京師千里相屬金吾大將軍張直方與羣臣迎賊灞上巢乘黃金輿衛者皆繡袍華幘其黨乘銅輿以從騎士凡數十萬先後之陷京師入自春明門升太極殿宮女數千迎拜稱黃王巢喜曰殆天意歟巢舍田令孜第賊見窮民抵金帛與之尙讓卽妄曉人曰黃王非如唐家不惜而輩各安毋恐甫數日因大掠縛籠居人索財號淘物富家皆跣而驅賊會閱甲第以處爭取人妻女亂之捕得官吏悉斬之火廬舍不可貲宗室侯王屠之無類矣巢齋太清宮卜曰舍舍元殿僭卽位號大齊求褒冕不得繪弋緋爲之無金石樂擊大鼓數百列長劍大刀爲衛大赦建元爲金統王官三品以上停四品以下還之因自陳符命取廣明字判其文曰唐去丑口而著黃明黃當代唐又黃爲土金所生蓋天啟云其徒上巢號承天廣運啟聖睿文宣武皇帝以妻曹爲皇后以尙讓趙璋崔瑒楊希古爲宰相鄭漢璋御史中丞李儁黃諤尙儒爲尙書方特諫議大夫皮日休沈雲翔裴渥翰林學士孟楷蓋洪尙書左右僕射兼軍容使費傳古樞密使張直方檢校左僕射馬祥右散騎常侍王璠京兆尹許建米實劉瑋朱溫張全彭攢季逵等爲諸將軍游弈使其餘以次封拜取趙偉五百人號功臣以林言爲之使比控鶴府下令軍中禁妄殺人悉輸兵于官然其下本盜賊皆不從召王官無有至者乃大索里閭豆盧瑑崔沆等匿永寧里張直方家直方者素豪傑故士多依之或告賊納亡命者

巢攻之夷其家瓌沉及大臣劉鄩裴諡趙濛李溥李湯死者百餘人將作監鄭基郎官鄭係舉族縊是時乘輿次興元詔促諸道兵收京師遂至成都巢使朱温攻鄧州陷之以擾荆襄遣林言尚讓寇鳳翔為鄧畋將宋文通所破不得前略乃傳檄召天下兵於是詔涇原節度使程宗楚為諸軍行營副都統前朔方節度使唐弘夫為行營司馬數攻賊斬萬級邪將朱玫陽為賊將王玫裒兵俄而殺玫引軍入于王師弘夫進屯渭北河中王重榮營沙苑易定王處存次渭橋鄜延李孝昌夏州拓拔思恭壁武功弘夫拔咸陽棧渭水破尚讓軍乘勝入京師巢竊出至石井宗楚入自延秋門弘夫傅城舍都人共諫曰王師至處存遣銳卒五千以白帟自誌夜入殺賊都人傳言巢已走邪涇軍爭入京師諸軍亦解甲休競掠貨財子女市少年亦冒作帟肆為剽巢伏野使覘城中弛備則遣孟楷率賊數百掩邪涇軍都人猶謂王師謹迎之時軍士得珍賄不勝載聞賊至重負不能走是以甚敗賊執弘夫害之處存走營始王璠破奉天引眾數千隨弘夫及諸將敗獨一軍戰尤力巢復入京師怒民迎王師縱擊殺八萬人血流於路可涉也謂之洗城諸軍退保武功於是中和二年二月也其五月昭義高潯攻華州王重榮與并力克之朱玫以涇岐麟夏兵八萬營興平巢亦遣王璠營黑水攻戰未能勝鄭畋將竄夜率士燔都門殺邏卒賊震懼於時畿民柵山谷自保不得耕米斗錢三十千屑樹皮以食有執柵民鬻賊以為糧人獲數十萬錢士人或賣餅

自業舉奔河中李孝昌拓拔思恭徙壁東渭橋收水北壘數月賊帥朱温尚讓涉渭敗孝昌等軍高潯擊賊李詳不勝賊復取華州巢即授華州刺史以温為同州刺史賊又襲孝昌二軍引去賊破陳敬瑄兵走南山齊克儉營興平為賊所圍決河灌之不克有題尚書省戶譏賊且亡尚讓怒殺吏輒剔目懸之誅郎官門闕卒凡數千人百司逃無在者天子更以王鐸為諸道行營都統崔安潛副之周岌王重榮為左右司馬諸葛爽康寶為左右先鋒平師儒為後軍時溥督漕賦王處存李孝章拓拔思恭為京畿都統處存直左孝章在北思恭直右西門思恭為鐸都監楊復光監行營中書舍人盧胤征為克復制置副使於是鐸以山南劍南軍營靈感祠朱玫以岐夏軍營興平重榮處存營渭北復光以壽滄荆南軍合岌營武功孝章合拓拔思恭營渭橋程宗楚營京右朱温以兵三千掠丹延南鄙趨同州刺史米逢出奔温據州以守六月尚讓寇河中使朱温攻四關敗諸葛爽破重榮數千騎於河上爽閉關不出讓遂拔郃陽攻宜君壘大雨雪盈尺兵死什三七月賊攻鳳翔敗節度李昌言於澇水又遣彊武攻武功槐里涇邠兵卻獨鳳翔兵固壁拓拔思恭以銳士萬八千赴難逗留不進河中糧艘三十道夏陽朱温使兵奪艘重榮以甲士三萬救之温懼鑿沈其舟兵遂圍温温數困又度巢勢感且敗而孟楷方專國温丐師楷沮不報即斬賊大將馬恭降重榮帝進拓拔思恭為京四面都統敕朱玫軍馬鬼温既降重榮遇之厚故李詳亦獻款賊

覺斬之於赤水更以黃思鄴爲刺史十月鐸濬壕於興平左抵馬嵬使將薛韜董之由馬嵬武功入斜谷以通盤屋列屯十四使將梁瓌主之置關於沮水七盤三溪水皮嶺以遮秦隴京左行營都統東方遠禽賊銳將李公迪破堡三十華卒逐黃思鄴巢以王遇爲刺史過降河中明年正月王鐸使鴈門節度使李克用破賊于渭南承制拜東北行營都統會鐸與安潛皆罷克用獨引軍自嵐石出夏陽屯沙苑破黃揆軍遂營乾院二月合河中易定忠武等兵擊巢巢命王璠林言軍居左趙璋尙讓軍居右衆凡十萬與王師大戰梁田陂賊敗執俘數萬僇皆三十里斂爲京觀璠與黃揆襲華州據之遇亡去克用掘塹環州分騎屯渭北命薛志勤康若立夜襲京師火厓聚俘賊而還巢戰數不利軍食竭下不用命陰有遁謀卽發兵三萬搃藍田道使尙讓援華州克用率重榮迎戰零口破之遂拔其城揆引衆出走涇原節度使張鈞說蕃渾與盟共討賊是時諸鎮兵四面至四月克用遣部將楊守宗率河中將白志遷忠武將龐從等最先進擊賊渭橋三戰賊三北於是諸節度兵皆奮無敢後入自光泰門克用身決戰呼聲動天賊崩潰逐北至望春入昇陽殿闌巢夜奔衆猶十五萬聲趨徐州出藍田入商山委輜重珍寶於道諸軍爭取之不復追故賊得整軍去自祿山陷長安宮闕完雄吐蕃所燔唯衢衙廬舍朱泚亂定百餘年治繕神麗如開元時至巢敗方鎮兵互入虜掠火大內惟含元殿獨存火所不及者止西內南內及光啟宮而已楊復光

獻捷行在帝詔陳許延州鳳翔博野軍合東西神策二萬人屯京師命大明宮留守王徽衛諸門撫定居人翻尙書右僕射裴瓌脩復宮省購輦輅仗衛舊章祕籍豫敗巢者神策將橫衝軍使楊守亮驍雲都將高周彝忠順都將胡眞天德將顧彥朗七十人巢已東使孟楷攻蔡州節度使秦宗權迎戰大敗卽臣賊與連和楷擊陳州敗死巢自圍之略鄧許孟洛東入徐竟數十州人大饑倚死牆塹賊俘以食日數千人乃辨列百巨碓糜骨皮於日并啖之時朱全忠爲宣武節度使與周岌時溥帥師救陳趙犖亦乞兵太原巢遣宗權攻許州未克於是糧竭木皮草根皆盡四年二月李克用率山西兵由陝濟河而東會關東諸鎮壁汝州全忠擊賊瓦子堡斬萬餘級諸軍破尙讓於太康亦萬級獲械鎧馬羊萬計又敗黃鄴於西華鄴夜遁巢大恐居三日軍中相驚棄壁走巢退營故陽里其五月大雨震電川谿皆暴溢賊壘盡壞衆潰巢解而去全忠進戍尉氏克用追巢全忠還汴州巢取尉氏攻中牟兵度水半克用擊之賊多溺死巢引殘衆走封丘克用追敗之還營鄭州巢涉汴北引夜復大雨賊驚潰克用聞之急擊巢河瀕巢度河攻汴州全忠拒守克用救之斬賊驍將李周楊景彪等巢夜走胙城入寃句克用悉軍窮蹙賊將李讜楊能霍存葛從周張歸霸張歸厚往降全忠而尙讓以萬人歸時溥巢愈猜忿屢殺大將引衆奔兗州克用追至曹巢兄弟拒戰不勝走兗鄆間獲男女牛馬萬餘乘輿器服等禽巢愛子克用軍晝夜馳糧盡不能得巢

乃還巢衆僅千人走保太山六月時溥遣將陳景瑜與尙讓追戰狼虎谷巢計感謂林言曰我欲討國姦臣沈濯朝廷事成不退亦誤矣若取吾首獻天子可得富貴毋爲佗人利言巢出也不忍巢乃自刎不殊言因斬之及兄存弟鄴揆欽秉萬通思厚并殺其妻子悉函首將詣溥而太原博野軍殺言與巢首俱上溥獻于行在詔以首獻于廟徐州小史李師悅得巢僞符璽上之拜湖州刺史巢從子浩衆七千爲盜江湖間自號浪蕩軍天復初欲據湖南陷瀏陽殺略甚衆湘陰羅家鄧進思率壯士伏山中擊殺浩贊曰廣明元年巢始盜京師自陳唐去丑口而著黃明黃且代唐也嗚呼其言妖歟後巢死秦宗權始張株亂徧天下朱温卒攘神器有之大抵皆巢黨也蓋天託諸人告亡於下乎

秦宗權蔡州上蔡人爲許牙將巢涉淮節度使薛能遣宗權蒐兵淮西而許軍亂殺能宗權外示赴難因逐刺史據蔡以叛周岌代能領節度卽授以州有兵萬人乃遣將從諸軍敗賊於汝州楊復光言之朝擢防禦使寵其軍曰奉國卽爲本軍節度使進檢校司空巢走出關宗權與連和遂圍陳州樹壁相望擾賊梁宋間巢死宗權張甚嘯會連殘有吞噬四海意乃遣弟宗言寇荆南秦誥出山南攻襄州陷之進破東都圍陝州使秦彥寇淮肥秦賢略江南宗衡亂岳鄂賊渠率粟慘所至屠老孺焚屋廬城府窮爲荆萊自關中薄青齊南隸荆郢北亘衛滑皆屬駭雉伏至千里無舍煙惟趙驪保陳朱全忠保汴僅自完而已然

無霸王計惟亂是恃兵出未始轉糧指鄉聚曰啖其人可飽吾衆官軍追躡獲鹽尸數十車僖宗假朱全忠都統節以討賊秦賢略宋及曹全忠好書約和賢遣張調請分地自汴以南歸之蔡全忠陰許而賢引兵濟汴肆燔劫無子餘全忠大怒斬調而還曰我出十將必破此賊進與賊戰殺獲甚衆宗權急攻許節度使鹿晏弘乞師於全忠師未及出已破晏弘進攻鄭州取之擊河橋遂守河陽放兵侵汴西鄙北鄙全忠壁酸棗戰不克宗權屯邊村使秦賢營雙巨侵板橋盧瑋引兵進屯萬勝夾汴而柵將梁以濟師全忠詭擊殺瑋宗權悉軍十五萬列三十六屯逼汴全忠懼求救於兗鄆而朱瑾朱宣皆身自將同拒賊五月全忠閉城大會鼓聞于郊無置聲陰啟北門擊賊壘士譁趨中營兗鄆整兵合擊大敗之宗權忿過鄭焚郟舍驅民入淮西全忠遂有鄭許河陽東都於是合諸鎮兵會上蔡分爲五軍入其地宗權召孫儒儒不應宗權素壁上蔡以扼險要全忠拔其壁遂圍蔡州傅城而壘以羸兵誘賊出戰全忠盡斬之宗權退守中州未能下全忠使大將胡元琮圍之身還汴宗權間許無備襲取其州執守將元琮引兵復收許宗權還爲愛將申叢所囚折一足以待命全忠署叢節度留後叢中悔夷其族宗權至汴全忠以禮迎勞且曰公昔陷許能戢兵賜盟戮力勤王烏有今日乎宗權曰英雄不兩立天亡僕以資公也警然無懼色全忠以檻車上送京師兩神策兵廩護昭宗御延喜樓受俘京兆尹曳以組練徇兩市引頸視車外呼曰宗權

豈反者耶顧輸忠不効耳觀者大笑與妻趙俱斬獨柳下宗權以中和三年叛居六年而誅
董昌杭州臨安人始籍土團軍以功擢累石鏡鎮將中和三年刺史路審中臨州昌率兵拒不得入即自
領州事鎮海節度使周寶不能制因表爲刺史昌已破劉漢宏兵益囑進義勝軍節度使檢校尚書右僕
射僖宗始還京師昌取越民裴氏藏書獻之補祕書之亡授兼諸道採訪圖籍使始爲治廉平人頗安之
當是時天下貢輸不入獨昌賦外獻常參倍旬一遣以五百人爲率人給一刀後期即誅朝廷賴其入故
累拜檢校太尉同中書門下平章事爵隴西郡王視詔書訖字償一緘歸當制官而小人意足寢自侈大
託神以詭衆始立生祠刳香木爲軀內金玉紉素爲肺府冕而坐妻媵侍別帳百倡鼓吹於前屬兵列護
門卍屬州爲土馬獻祠下列牲牢祈請或給言土馬若嘶且汗皆受賞昌自言有饗者我必醉蝗集祠旁
使人捕沈鏡湖告曰不爲災客有言嘗游吳隱之祠止一偶人昌聞怒曰我非吳隱之比支解客祠前始
罷權鹽以悅人豐衣食後稍峭法笞至千百或小過輒夷族血流刑場地爲之赤有五十餘姓當族昌曰
能孝於我貸而死皆曰諾昌厚養之號感恩都刻其臂爲誓親族王號泣相別者凡民訟不視獄但與鄰
博齒不勝者死用人亦取勝者昌得郡王咤曰朝廷負我吾奉金帛不貲何惜越王不吾與吾當自取之
下厭其虐乃勸爲帝近縣舉狂譏諱請昌令曰時至我當應天順人其屬吳繇秦昌裕盧勤朱瓚董庠李

暢薛遼與妖人應智王温巫韓媪皆贊之昌益兵城四縣自防山陰老人僞獻謠曰欲知天子名日從日
上生昌喜賜百緡免稅征命方士朱思遠築壇祠天詭言天符夜降碧楮朱文不可識昌曰讖言兎上金
牀我生於卯明年歲旅其次二月朔之明日皆卯也我以其時當即位客倪德儒曰咸通末越中祕記言
有羅平鳥主越禍福中和時鳥見吳越四目而三足其鳴曰羅平天册民祀以攘難今大王署名文與鳥
類卽圖以示昌昌大喜乾寧二年卽僞位國號大越羅平建元曰天册自稱聖人鑄銀印方四寸文曰順
天治國之印又出細民所上銅鉛石印十牀及它鳥獸龜蛇陳于廷指曰天瑞其下制詔皆自署名或曰
帝王無押詔昌曰不親署何由知我爲天子卽榜南門曰天册樓先是州寢有赤光長十餘丈虺長尺餘
金色見思道亭昌署寢曰明光殿亭曰黃龍殿以自神以次拜置百官監軍與官屬皆西北嚮慟哭乃北
面臣昌或請署近侍昌曰吾假處此位安得如宮禁不許下書屬州曰以某日權卽位然昌荷天子恩死
不敢負國初官屬不徇昌旨者節度副使黃碣山陰令張遜皆誅死鎮海節度使錢鏐書讓昌曰開府領
節度終身富貴不能守閉城作天子滅親族亦何賴願王改圖昌不聽鏐悉兵三萬攻之望城再拜曰大
王位將相乃不臣能改過請諭還諸軍昌懼獻鏐錢二百萬縉犒軍執應智王温韓媪吳繇秦昌裕送於
鏐且待罪鏐乃還表於朝以爲昌不可赦復討之傅城而壘昌又執朱思遠王守真盧勤送鏐軍求解昭

宗道中人李重密勞師除昌官爵授鏐浙東道招討使昌乃求援於淮南楊行密遣將臺濠圍蘇州安仁義田頽攻杭州以救昌鏐將顧全武等數敗昌軍昌將多降遂進圍越州候人言外師疆輒斬以徇給告鏐兵老皆賞昌身閱兵五雲門出金帛傾鏐衆全武等益奮昌軍大潰遽還去僞號曰越人勸我作天子固無益今復爲節度使全武四面攻未克會臺濠取蘇州鏐召全武還全武曰賊根本在甌越今失一州而緩賊不可攻益急城中以口率錢雖簪珥皆輸軍昌從子真得士心昌信讒殺之衆始不用命又滅戰糧欲輟外軍下愈怨反攻昌昌保子城鏐將駱團入見給言奉詔迎公居臨安昌信之全武執昌還及西江斬之投尸于江傳首京師夷其族於是斬僞大臣李邈蔣瓌等百餘人發昌先墓火之昌敗猶積糧三百萬斛金幣大抵五百餘幣而兵不及萬人鏐遂爲鎮海鎮東兩軍節度云

贊曰唐亡諸盜皆生於大中之朝太宗之遺德餘澤去民也久矣而賢臣斥死庸懦在位厚賦深刑天下愁苦方是時也天將去唐諸盜並出歷五姓兵未嘗少解至宋然後天下復安漢之亡也天下大亂至晉然後稍定晉之亡也天下大亂至唐然後復安治少而亂多者古今之勢盛王業業以求治可少忽哉

唐書卷二百二十五下

唐書卷二百二十五下考證

黃巢傳威自將往救敗仙芝于黃梅○舊書賊怒悉精銳擊官軍威軍大敗臣人龍按舊書僖宗紀此時

威未嘗敗也當以新書爲正

漢宏殘衆復奮○沈炳震曰漢宏當作常宏臣西按上文云先此劉漢宏已略地焚廬廡則此處正指劉

漢宏也似不誤

張全○南北監本汲古閣本皆同獨沈炳震作張全議當從之

唐書卷二百二十五下考證

